

DUE DATE SLIP
GOVT. COLLEGE, LIBRARY
KOTA (Raj.)

Students can retain library books only for two weeks at the most.

BORROWER'S No.	DUE DATE	SIGNATURE

मांझल रात

लक्ष्मीकुमारी लूढापत

पंचशील प्रकाशन, जयपुर

© सर्वाधिकार सुरक्षित

प्रकाशक : पंचशील प्रकाशन
फिल्म कॉलोनी, जयपुर-302003

संस्करण : 1984

मूल्य : तीस रुपया

मुद्रक : शीतल प्रिन्टर्स
फिल्म कॉलोनी, जयपुर-302003

समर्पण

मोडू दादा,

वाळपणां में थारी गोद में खेलतां थारा मूंडा सूं ख्यातां अर
वातां घणी सुणीं । कदे ही थूं राजी करवा ने सुणावतो,
कदे ही म्हें जिद्द कर सुणती ।

यां वातां री मेहमा तो यां वातां रा घणियां रा नाम अर
काम सूं है पण यां री भासा अर भाव थारो सिखायोडो है ।

धाभाई दादा, वातां रा ई संग्रह ने थारी याद ने समर्पित
कर री हूं ।

लक्ष्मीकुमारी चूंडावत

भूमिका

आंपणी राजस्थानी भासा, राजस्थान की घरती अर इतिहास की तरै हीज सबळ नै क्षमतावान है। आंपणां गीतड़ा अर भीतड़ा जतरा कीरत उजागर है वसीज मरम भरी स्यातां अर वातां है।

राजस्थानी काव्य तो जगत चावो है, देस विदेस की घणी खरी भासावां में राजस्थानी काव्य रो अनुवाद व्हीयो है पण गद्य साम्हो ध्यान ही नीं दीवो, ईं वास्ते राजस्थानी गद्य रा गुण लोगां की जांण में आणां चावै जस्या आया नीं।

राजस्थानी वातां की सैली आपरा ढंग की अनोखी है। ईं पोथी में म्हुं म्हारी आधुनिक राजस्थानी में लिख्योड़ी चवढा मौलिक वातां नजर कर की हूं।

राजस्थान की जूनी परंपरा अर इतिहास ने अळगो राख नै वातां लिखणीं तो एक राजस्थानी लेखक साहू नामुमकिन ही नीं पण अणखांवणो भी लागै। राजस्थान की संस्कृति अर परम्परा अतरी ओज सूं भरयोड़ी है के कोई वात लिखै अर जीमें यां रो परतवंव नीं भलकै तो वा वात राजस्थान सूं अळगी अळगी अर अपरोगी लागै।

राजस्थानी रो तो एक एक आखर इतिहास है। वात कैवा रो अर लिखवा रो म्हारो जूनो सौक है। हालताईं जतरी वातां म्हुं लिखी है वे सगळी राजस्थानी संस्कृति अर राजस्थानी वीरता सूं रळयोड़ी है।

राजस्थान में सूरमां अर सतियां हीज नीं अठा रा तो बाढ़ायतियां रो ही चरित्र रो दर्जो एक अजब रियो है।

भारत में राजस्थान रो जो महत्वपूर्ण स्थान है वस्यो ही स्थान भारतीय भासावां में राजस्थानी भासा रो है। राजस्थानी रा एक एक सबद रे लारै एक एक स्याखेत बोलै, पींड्यां रो पराकरम भांकै।

म्हारी लिख्योड़ी वाता में सूं थोड़ी सी ये वातां विदवानां रे आगे मेल री हूं। यां रा उपमान, उपमेय, विशेषण, विशेष्य, चरित्र अर वर्णन सैली वगैरा सगळी राजस्थान री आप री अर आप री परंपरा री है। म्हें यां वातां ने रात दिन आपणै घरां मे बोला जीं भासा में लिखी है।

राजस्थानी में वातां कैवा री अर लिखवा री परंपरा घणी जूनी है। राजस्थानी गद्य में लिख्योड़ी वातां अर ख्यातां सोळवीं सताब्दी सूं मिलै। सत्तरवीं अर अठारवीं सताब्दी में तो वात कैवा री अर लिखवा री कळा वराबर तरक्की करती री, घणी परचार व्हीयो। यां साढा तीनसौ चारसौ वरसां में हजारों वातां लिखी गी।

आजकाल हिन्दी में जो का'ण्यां या वातां लिखी जे वारो लहजो बंगाळी अर अंगरेजी भासा सूं लीधो है। बंगाळी भासा में जो वातां लिखी गी वारो ढंग सूधो अंगरेजी सूं लियोड़ो है। अंगरेजी रे देखादेख बंगाळी मे ईं तरै सूं वातां लिखणो सुरू व्हीयो, बंगाळी री नै अंगरेजी री नकल हिन्दी में कीधी गी पण राजस्थानी वातां री सैली अर ढंग विलकुल मौलिक अर जूनी है। सुरू करवा रो ढंग, खतम करवा रो कायदो, वरणन करवा री प्रथा सगळी री सगळी आपणी है, कोई ढूजी भासा री छाप कोयनी।

राजस्थानी में तीन भांत री वातां व्हे। एक तो गद्य में, ढूजी पद्य में तीजी भांत री वातां गद्य पद्य मिल्योड़ी व्हे। वातां भांत भात रा विसय माथै लिख्योड़ी है। देवी देवता, पर्व तिंवार, भूत प्रेतां री, सिकार माथै घणी वातां, सूर ना'र रा भगड़ां री, सिकार कतरी भांत री व्हे, क्रियां करीजे यो वरणन 'यां वातां में घणों विस्तार सूं कह्योड़ो है। सूर ने एक सूरमा रो प्रतीक मान सूर अर भूँडण री वातचीत में एक वीर पुरस रा मन री, इच्छा री अर विचारां री तसवीर सी खैंची है। धाड़ायतियां री हिम्मत री वातां, चोर अर ठगां री चतराई री वातां घणी सुवावणी है। चोर अर ठगां कसी कसी सफाई सूं आप री कळा रा हाथ बताया, घणी रोचक है। अकेला खापरिया चोर री घणी वाता लावै। एक सूं एक बढिया चालाकी अर चोरी री तरकीबां री।

गप्पां रो ही टोटो नीं। असी असी गप्पां हांकी है के सूझ पै अचम्भो आवै। बणजारा, कतारिया, सेठ साहूकार, पसु पंछी, डाकण्यां, जोगण्यां, सोखता, पोखता, इन्दर री परियां, टाबरां री वातां वगैरा अतरी है के जांरो पार नीं। धरम नीति री वातां ने ही असी मनोरंजक वणाय दीधी के सुणतां ओरणी नीं आवै।

सूरवीरां री अर रणखेतां रे वातां कैवतां कैवतां तो राजस्थानी कदे धाप्या ही नीं। वीर रस रो लारै रो लारै श्रृङ्गार चालै, प्रेमी प्रेमिकावां री वातां रा तो खजाना भरचा।

ये बातां जसी मनलुभावण है वस्यो ही चित हरखावण यां रे कैवा रो ढंग है । कैवा रो ढंग अतरो जानदार, जोरदार अर सुवावणो है के सुणवा बाळो सुणतो हीज रै जावै, ऊठवा रो जीव नीं करै । यां बातां री वरणन सक्ति तो गजब री है, वात काई कैवे चित्तर उतार दे । कोई वात रो कैवण्यो व्हे अर वात जमावै जीं वगत सुणवा बाळा ने यूं लागै जाणै दूजा लोक में परा गया हां । एक पल में हंसावै, दूजा पल में रोवणों आवै, तीजा पल में रीस सूं कटकटियां भींचवा लागै । वीरता रो वरणन करै तो रुंम रुंम ऊभो व्हे जावै । एक दांण तो कायर रो हाथ ही तरवार री मूठ पै जाय पड़े । वात रो वो छप्पर बांधै के सुणवा बाळा चतराम री फूतळ्यां व्हे ज्यूं बैठा रै जावै ।

एक जणों वात कै जठे वस्यो ही लारै हूँकारो देवण्यो आवै । हूँकारा बिना वात असी फीकी जसी नंगारा बिना फोज ।

“वात में हूँकारो, फोज में नंगारो”

वात सुरू करवा रा न्यारा न्यारा ढंग व्हे । कोई वात सुरू ही यूं करै,

बातां हंदा मामला दरिया हंदा फेर
नदियां वहै उतावळी दे दे घूमर घेर
केताक नर सोवै केताक जागै
जागतां री पागड़्या ढोल्या रे पागै
ऊंघतां री पागड़्यां जागतड़ा ले भागै

वात कैवणो ही एक पूरी कळा है । वात एक जणों कैवे परा घटना रा दृस्थां ने ईं तरै सूं मूंडागै राखै जाणै नाटक देख रिया हां । वात रा जतरा ही पात्र व्हे जांरो न्यारो न्यारो पार्ट वो अकेलो करतो जावै । एक पल पैलां तो वो डोकरी री नाई गावड़ हिलातो, कंठ बूजातो बोल रियो हो, दूजे ही पल मूँछ मरोड़तो, कमर में बंधी कटार खैंचवा ने हाथ मेलतो दीखै । वात रा चढाव उतार रे लारै पुरो अभिनय करदे ।

सीयाळा री रातां, गावां में घूणी घाल दे, घूणी रे चारुं पासै दानां बूढा, जुवान मोटघार, छोरा छापरा सगळा भेळा व्हे जावै, तपवो करै । गांव रा दानां बूढा, ठावा मिनख डींगा माथै ऊकड़ू बैठ जावै, एक मोटा डींगा पै वात कैवण्यो ही बैठ जावै, पछै जमें वात जो रात जातां खबर नीं पड़े ।

म्हारे पिताजी देवगड़ रावतजी विजैसिधजी रे वात कैवावा रो सोक व्हेणो ही हो, जां दिनां रो रहण सहण ईंज ढंग रो ही हो । जूनी परंपरा रे माफग म्हांके अठै

ही बात कैवा वाळा रैवता, और ही गुणी आवो करता । म्हांके अठ रैवा वाळा में एक तो मूळजी रावळ, दूजा जोरजी बड़वा असी ठाठदार बात जमाता के कांई कैवणो । हजारों वातां, दूहा कवित्त, पुरो पिरथीराज रासो मूंडै याद, भण्यां नीं एक खांडो आखर । वा री चाकरी बात कैवा री ही । सांभ पड़तां हीं रोसनी रो मुजरो करतां ही बात जमती, म्हां सगळा जणां भेळा व्हे बैठ जाता । एक जणो हंकारो देतो, दाना बूढा हाथां में माळा लीधां, बीच बीच माथो हिलावता, “वाह भाई वाह, कांई कैणी बात” री दाद देता, बात रा आगंद ने दूणों कर देता । सियाळा में सिगड़ी कतरी दांण भर भरनै आय जाती, बात चालती रैती । सुणवा वाळा चित्राम ज्यूं बैठा सुणता रैता । चोमासा में भरमर भरमर छांटा पड़ता, अस्या समै में म्हारे पिताजी हुकम देवो करता “आल्हा ऊदल री बात कैवो ।”

आल्हा ऊदल री बात जमती, लारै लारै दूहा रा फटकारा लागता । एक तसवीर खिच जाती, घायलां ने डोळ्यां में घाल रिया है, घोड़ा हणहणाय रिया है, हाथी चरडाय रिया है, रुण्ड बिना मुंड घूम रिया है । कटारियां आंतडियां ने फाड़ती यूं निकळ री है जांणो भरोखा में सूं मेंदी रा रच्योड़ा हाथ निकळचा है ।

सुणतां सुणतां डोकरा हुक्का री नेज ने छोड़ डाढ़ी पै हाथ फेरवा लागता । ओता रोमांचित व्हे जाता, म्हां टाबर आख्या फाड़चां आप रो आप मूल जाता ।

यूं तो बात कैवण्या री कोई खास जात नीं जो कैय जाणै वो ही कैवे । पण रावळ, मोतीसरा, भाट, बड़वा, राणीमंगाळ डाली, नकारची, सरगडा जांगड़ कोम में बात कैवण्यां ज्यादा मिलै पींड्यां सूं याने वातां जबानी याद चाली आवै । एक नीं अनेक, छोटी नीं मोटी मोटी वातां सैकड़ा दूहा सूधी याने जबानी याद रै । भण्यां पढ़्या नीं पण वरणन यांरो अतरो जबरदस्त के कांई कैणो ।

बात रे लारै मोका मोका पै दूहा बोलता जावै । यां दूहा रे बोलता जावा सूं बात रो आगंद और ही चोगणो व्हे जावै । परसग पै गावता ही जावै । छोटा छोटा वाक्य, एक फालतू भरती रो आखर नीं, टाळमा सबद, काळजा में जाय सूधा लागै ।

वातां रा कैवण्यां मिनखां ने राजा माराजा आछी इज्जत अर रोजगार दे आप रे अठ राखता । यां री घणी पूछ ही, सभा ने रीभावाने ये आपरी कळा बताता,

॥ राणीमंगा एक जात व्हे जो सिरफ राणियां ने ही जांचै, आपरी वही में स्त्रियां रा पीडीवार नाम मांडै । राजा माराजां सूं कांई नीं लेवै । राणियां रा जाचक व्हेवा सूं ये राणीमंगा वाजवा लाग्या ।

इतिहास की शिक्षा घणी कर यांरी वातां सूं ही देवता । इतिहास अर ख्यातां री जांणकारी तो यां वातां सूं घणी चोखी व्हे जाती ।

यां वातां ने कोरी जवानी ही नीं कैवै । हजारों री गिणती में ये लिख्योड़ी है । वातां ने लिखाय राखवा रो पै'लां घणों सोक हो । केई वातां तो अस्या रूपाळा अक्षरां में जमाय जमायनै मांड्योड़ी है, मांयने जगां जगां चित्राम उतारयोड़ा है । बढ़िया पुट्टो मुखमल रो, छींट रो चढ़ाय घणी सावधानी सूं राखता । पीढ्यां तांईं अवेरयां राखता, पढ़नै सुणता सुणावता । ख्यातां अर वातां लिखावा रो घणों रिवाज हो । राजा माराजा आपरा घराणां रा जम री आप री सोख री, कविता, वातां लिखायनै चित्तर वणवायनै, आपणै मित्तरां रे, सगा परसंगियां रे अठै भेजवो करता । म्हारे देखणी तक में यो रिवाज हो । डूंगरपुर दरवार विजैसिधजी, सलाणे दरवार जसवंतसिधजी अर म्हारे पिताजी रे आपस में मित्तरता ही जो एक दूजारे यूं कविता, वातां आपरे पसन्द री नकलां कराय भेजवो करता । जनाना सरदारां रे कविता अर वातां भेली करवा रो, वांचणै रो अर भेंट करवा रो सोक घणों हो । म्हारे कने एक जलाल गहाणी री वात रो गुटको है । म्हारे नानी की भुवा को व्याव भालावाड़ दरवार सूं व्हीयो । बां जलाल गहाणी री वात रो यो गुटको लिखायो । बी गुटका ने बां आपरी भोजाई गोड़च (मेवाड़) ठुकराणीसा ने दीघो । गोड़च बाळा, आपरी वेटी अर म्हारा नानीसा (देलवाड़ा) ने दीघो । बा बी गुटका ने म्हने वक्ष्यो ईं तरह सूं वातां री पोथियां एक जगां सूं दूजां जगा तक घणा चाव सूं भेट कीधी जाती । बी गुटका री कथावस्तु रा आधार पै ईं संग्रह मांयली जलाल री म्हें वात लिखी है ।

यां ख्यातां वातां री भासा प्राचीन राजस्थानी है । पाड़ोसी राज्यां री भासा रो ही यां वाता पै असर है । पंजाबी, सिंधी, गुजराती भासा रा सव्दां ने काम में लीवा है ।

यूं तो अठारवी सताब्दी तक गुजराती अर राजस्थानी मामूली फरक सूं एक ही भासा री है । बी भासा ने आजरा गुजराती "प्राचीन गुजराती" रा नाम सूं बोले, राजस्थानी ईं ने डिगल या प्राचीन राजस्थानी कैवे । राजस्थान रा जालोर रा कान्हडदेव री ख्यात जको जानोर रा हीज एक कवि री रच्योड़ी है, बा गुजरात में बी० ए० रा कोर्स में पढाई जावै । गुजरात बाळा बी भासा ने आपरी प्राचीन गुजराती माने ।

वास्तव में अठारवीं सदी मूं पै'लां राजस्थान अर गुजरात रो सामाजिक अर सांस्कृतिक सम्बन्ध एकाकार हो । अंगरेजां रे आयां राजनैतिक ढंग सूं यां ने अलग करवा नूं ये आज न्यारा न्यारा व्हीया । सिव अर पंजाब सूं ही राजस्थान री सीमा

अड़ै । रात दिन रो आवणो जावणो हो । आज सिंघ रो थरपारकर रो जिलो सदिया सूं जोधपुर राज रो हीज हिस्सो हो । वठै अबै ही राजस्थानी बोली जावै । जैसलमेर कानी सिंघी भासा रा घणां ही सब्दा ने काम में लावै । उत्तरी बीकानेर रा नै पंजाबी रा सबद घणां मिलै । सीमा मिलै जठै यूं सबदां रो मिलणो कायदा री वात है । ये सब व्हेतां थका ही यां वातां में ठेठ राजस्थानी भासा है । आखा राजस्थान में ईं खुणां सूं बीं खुणां तक यां रो प्रचार है । लिख्योड़ी मिले, कही जावे । विसेस विसेस जगां री-बोली रो कैवा में लिखवा में थोड़ो घणों फरक पड़ै बाकी यां री आतमा अर सरीर में कोई फरक नीं ।

म्हारी कलम सूं लिख्योड़ी ये वातां जो पोथी में छप री है, यां री गुणगरिमा है वा तो राजस्थान री धरती री उपज है; भासा अर भाव विभूति मातृभासा राजस्थानी री संपदा है । म्हारी कलम अर मूँ तो विदवानां रे मूँडागै यांने राखवा ने निमित्त मात्र हूं ।

लक्ष्मीकुमारी चूँडावत

अनुक्रम

भूमिका/	5
पावूजी/	13
रजपूताणी/	28
पिउसंधी/	35
हूंकार री कलंगी/	45
हाड़ी राणी/	51
ऊगो भाणेज/	58
डाढाळो सूर/	67
लालजी पेमजी/	73
जसमल ओडण/	79
ऊजळी/	88
ढोला माह/	95
लालां मेवाड़ी/	104
सोरठ/	114
जलो/	126

पावूजी

ढोल बाजूरिया, मारवाड़ रा कोठू गांव में भिनख हूरह्या हूरह्या फिररिया ।
केसरिया कसूमल पागां बांध्यां, आयांगियां री अमल री मनवारां चालरी । पावूजी
रे सात सुवागण्यां मिल पीठी कररी, लारै लारै मीठा मीठा गळा सूं पीठी रा गीत
गावती जायरी ।

पावूजी री जान अमरकोट चढरी है । पावूजी उमंग में भरिया मूंछां पै घड़ी घड़ी
रा हाथ फेररिया ।

परणेतू पोसाक त्यार व्हेगी, कलंगी सिरपेच कस्यो टांगणो वो निस्चै व्हेग्यो, तरवार
सोना री ना'रमुखी मूठ री छांट लीवी, ढाल गैडा री आछी सी देख'र टाळी ।
भाला ने ओप देवा ने सिकलीगर ने दे दीघो । आवै घोड़ा री बात सोचै । घोड़ो
पावूजी री जोड़ रो व्हे, अमरकोट रा सोड़ा घोड़ा ने देखतां ही यूथकारो न्हाकवा
लाग जावै जद तो बात ही है । जस्या पावूजी धांका वीर है वस्यो ही बांरी रानां
नीचै घोड़ो व्हेणो चावै । पावूजी रे एक घोड़ो दाय नीं आवै । बांरो जीव जावै'न
एक घोड़ी पै आय अंटकै । केसर काळमी री तीखी कनौती ! कूकड़ा री नाई
खिच्योड़ी गावड़ !! भीणी भीणी हींस !!! केसर काळमी घोड़ी है तो बस वा
एक पावूजी रे लायक । देवळ चारणी, आपरी घोड़ी ने पावूजी ने देवेला के नीं ?
गायां रो दूव पाय पायनै मोटी करीयकी केसर ने, देवळ चारणी आपरा जीव सूं
वत्ती राखै । पावूजी सोची, चावै जो व्हो तोरण मारणो तो ईं केसर घोड़ी री पूठ
पै चढनै हीज । चांदा ने कह्यो, "भाई, मानो मत मानो, म्हुं परणवानै जावू'ला तो
केसर काळमी माथै हीज चढनै ।"

चांदे जाय देवळ ने कह्यो, "पावूजी रो व्याव है, देवळ देवी ! थां केसर ने चार
दिनां सारु देवो, पावूजी परणनै आवै जतरे ।"

देवळ चमकी, "केसर ने दीवां, म्हारे नीं सरै । केसर बिना म्हारी गायां री रखाळी
कुण करै ? खीची तो गायां घेरवा ने ताखड़ो वैठ्यो है ।"

"देवळ ! कांई बात करो, थांरी गायां रा रखाळा म्हे, थांरी केसर कूदणो पै
भालाळो पावू चढैला, थांरी केसर जान रे वीचै चालैला, केसर जसी तो अलल
वछेरी नै बांकड़नी मूंछां रो पावूजी । केसर काळमी ने पावूजी जस्यो सवार नीं

मिलेला, नीं पावूजी ने केसर जसी घोड़ी मिलै । देवळ बाई ! नटो मती । केसर भींणी भींणी हीसती, धीमी धीमी नाचती अमरकोट रा सहर में चालैला, पावूजी भालो भळकातो घोड़ी ने कुदातो तोरण मारैला जद सोढा थारी केसर री कूद देखता रैजावेला । रणवंका राठीडां रा घोड़ां री अर मरदां री जो तारीफ है सोढां ने आख्यां देखवा दो ।

घोड़ो, जोड़ो, पागड़ी, मूँछां तरां मरोड़ ।

ये पांचूँ ही राखली, रजपूती राठीड़ ॥

देवळ चारणी राजी व्हेगी घोड़ी देवानै । पावूजी बीद वण्या, बागो पैरचो छोगा कलंगी टांक्या, ढाल बांधी । केसर ने सिरागारी, मे'दी राच्योड़ा च्यारूं ही सूमां में घूघरा बांध्या, केसवाळी ने लच्छा घाल घाल गूंथी, गळा में सोना रो हालरो घाल्यो । पावूजी रो सारो भायपो भेलो व्हीयो, लुगायां मंगळगीत गावा लागी, ढोल बाजवा लाग्यो, माथै सेवरो बांध्यां, केसर री लगाम पकड़्यां पावूजी ऊभा ।

जोसी घोड़ी री पूजा कीधी, काकी हरिया मूंगां रो दुकड़चो भर केसर रै मूंडांगै राख्यो, मां कांचळी सूं बोबो काढ नै पावूजी रे होठां रे लगायो "ईं दूध ने उजाळजे ।" भौजाई आंख मे काजळ घाल्यो । पावूजी भट पागड़ा में पग दे केसर री पूठ पै चढ्या । लुगायां भट घोड़ी उगेरी, "वछेरी म्हारी ए रमभूम करती जाय ।"

पावूजी री बेतां घोड़ी री लगाम भाल बीद री घोड़ी आगै, मुळकती मुळकती नाची, पावूजी मूठी भर रिपिया बेतां पै निछरावळ करनै फैक्या । सगळां रे होठां पै आणंद री लैरां दौड़ी पण साम्ही ऊभी देवळ डसूका भर रोवा लागी ।

"यो काई ? बारेठणी जी यो काई थारो भूंडो सुभाव है । सुगण रा असुगण कररिया हो, बीद तो घोड़ी चढ्यो हैं नै थां साम्हा ऊभा रोयरिया हो ।"

देवळ तो आय पावूजी री लगाम पकड़ लीधी "थां तो परणवा जायरिया हो म्हारी गायं रो खंखालो कुण ? थारा भाइयां ने छोड़ जावो ।"

"देवळ देवी, भाइयां ने छोज्यां जान री सोभा काई ? भाइयां विनां आगै सौडां रै लारै कुण जीमैला ? कुण सोढां रे साथै मनवारां लेवैला ? कुण सगा परसंगियां सूं रोळ करेला ? म्हारा भाई साथै नी व्हेलां तो सोढियां गाळियां किरा ने गावैला ?

देवळ बोली, "भाइयां ने नीं छोड़ो तो चांदा ने छोड़ जावो ।"

“चांदो अर डामो तो म्हारा भायला भाई है, भाइयां सूं ही सवाया । यांने तो देवळ भवानी, म्हूं करणी तरं छोड़ूं ? ये तो म्हारा डावल्या जीमणां हाथ है । वीचै वीचै तो केसर चालैला, डावे जीमणै चांदा डामा रा अबलक घोड़ा ।”

“अठी ने पावूजी, थारी जान चढ़ी नै बठी ने खीची म्हारी गायां घेरैला, थां सांची मानो, थारे जातां हीं खीची म्हारी गायां तांण ले जाय ।”

पावूजी भरोसो दीवो, “म्हू तीन दिन अमरकोट रेवूला, चौथो दिन वठै नी लगावूं थां भरोसो राखो ।”

“थां सासरे जाय, बीनणी में रम जावोला, साळा साळियां री रोळ में विलम जावोला । थां वठै सोढ़ीजी री सेजां में पोढ़ोला, देवळ चारणी री गायां किरणने याद आवैला ।” देवळ रोवती जावै नै पावूजी ने करड़ा करड़ा बोल सुणाती जावै ।

“देवळ, अै म्हूं थांने वचन देवूं जो थारी गायां ने खीची घेर ले तो थां थारा गुवाळ ने अमरकोट दौड़ा दीजो । म्हूं जीमतो व्हूंला तो चळू अठै आयनै करूंला । गायां घेरवा री खबर सुणातां पांण कसर घोड़ी पै काठी मेल दूंला, और तो और चंवरी पै चढ्यो फेरा खावतो व्हूंला तो फेरा रे अघबीचै ऊठ जावूंला । वारेठणीजी, थें रोवो मती, राजी राजी सीख दो, परगूंला जीं रात सिवा दूजी रात सासरै नीं रुकूंला । म्हारी बात रो भरोसो राखो ।”

देवळ पावूजी कना सूं सोगन लेवाया ।

जान चढ़ी, ऊंट घोड़ा आगै वध्या, पांच सात कोस चाल्या, मंगरी आई देखै तो एक नोहत्थी ना'रड़ी मंगरी माथा सूं उतरनै केस बिखेरियां घाटी रोकनै गैला में ऊभी रेंगी ।

डामै धनुष पै तीर चढायो, पावूजी रोक्वो, “या वन रा राजा री अस्त्री है, आंपां घरती रा ना'र हां, मरद अस्त्री पै हाथ नीं उठावै ।”

डामै तो ना'री रे साम्हें घोड़ा री बाग खैची, रान दवाई, ना'री पूंछ दवाय, मंगरा पाछी चढ़गी पै पाछी चढ़ती ना'रड़ी पै डामै कांकरी फैंकी “हत्थारी ! ना'री व्हेयन पाछी फिरगी थूं ।”

कांकरा री लागतां ईं ना'री पूठी फिरी । दाकळ करनै हाथळ उठाय लपकी, सूधी डामा रा माथा पै आई । डामो वोल्थो, “पैलां थूं वार करलै, मरद पैलां नारी पै ससतर नीं उठावै ।”

ना'री री हाथळ डामा रा माथा पै आई, जीनै डामो आपरी ढाल पै भेल नै पाछी फिरती ना'री रे तरवार री मारी जो ना'री रा दो ढोल व्हेया । जांणै सावण री काकड़ी कटी व्हे ।

जान रे साथै सुगनी हो, आय पावूजी ने अरज कीधी “सुगन अस्या खोटा व्हेता आयरिया है, पै‘लां तो काळो नाग फण कर नै जान रो गैलो रोव्यो, पछै ना‘रडी घाटो रोकनै जावा ने मना कीधी । सुगन देखतां तो आप पाछा फिरजावो, खांडो भेज नै व्याव करलो ।”

पावूजी बोल्या, “अबै जान ने पाछी मोडचां भ्हारी हसी व्हेला । अमरकोट रा सोड़ा हंसेला, एक ना‘रडी सूं डरनै पावू पाछो फिरगियो, कठै पावू रो भालो गियो अ‘र कठै गिया चांदा डामा रा तीर कामठा । ईं वगत तो पाछै फिरियां राठोड़ां री मरदानगी पै काळो दागो लागै, भ्हारी मां कंवळादे रौ दूध लाजै । अमरकोट में आपणी कांई आछी लागैला ? वठै सोड़ा सरदार कमरबन्धा बांध्यां आपणी अगवाणी करवानै कांकड़ पै आय ऊभा व्हेता, साळा साम्हा आवा री त्यारी कररिया व्हेला । साळ्यां डागळै ऊभी कमण गायरी व्हेला । सोढी सहेल्यां सूं वैठी पीठी करायरी व्हेला, नीम पै वैठा कागला ने उड़ाय, केसरवरणी सोढी म्हेने उडीकरी व्हेला । म्हे पाछो फिर जावू तो वे सहेल्यां सोढी ने चिढ़ावेला, “थूं तौ कै‘ती भ्हारी पावूजी वन रो ना‘र है, वो तो एक ना‘रडी सूं डरप पाछो फिरग्यो । देख्यो थारा वीर पावूजी ने जो खांडो परणनै लेजायरियो है ।”

सुगनियां कह्यो, “आपरो मन व्हे ज्यूं कगो, सुगन तो अस्या है के काळ साम्हे आयरियो है ।”

“वीरां ने नामप्यारो व्हे । घड़ अ‘र माथा तो कटता जुड़ता ही रै । कायरां रा माथा घड़ पै व्हेतां लगां ही मरयोड़ा है, वीर माथा कटायनै ही जीवता रै । घूंसा पै डंको पटकाय, बाजतां ढोलां जान आगै चाली ।

चांदा, डामा आपरा घोड़ा ने आगै कीधा, पावूजी केसर काळमी ने हकाळी ।

देखै छै भुरजाळो पावू निजर पसार
कोई चांदै ने डामै ने वूमै पावू मुलक की
किण रा तो दीखै छै ये भूरा भूरा कोट
किण रा तो दीखै छै ये धूंघा धूंघा माळिया

चांदो बोल्हो,

आग्यां छां ओ पावू आपां घोळी घाट रे मांय
कांकड़ तो वड़ग्यां छां आपां अमरकोट रा
घोळा घोळा दीसै सोढ़ां रा गड कोट
धूंघा धूंघा दीसै सोढी रा माळिया

अमरकोट में मूरजमल सोड़ा रे वरै नीजत घुड़री, नरणायां में मीठा नुर बाजरिया ।

लुगायां छाजां पै ऊमी जान देखवाने उड़ीकरी, सोड़ा पोयाकां कीवां, जान रे साम्हा जावाने अमल पान री मनवारां करता तयार व्हेयरिया, सोढ़ीजी री मां वांस री कामइयां बांधती सासू आरती जोड़वा में आपरी सारी कारीगरी लगायरी । सोढ़ीजी ने वारी साथण्यां सिएगाररी, ललाट पै केसर री खोल काढ्यां, हाथ में कांकण डोरड़ा बांध्योड़ी ऊजळ दन्ती सोढ़ी साथण्यां में यूँ लागरी जाणै तारामंडळ में चांद ।

सोढ़ी फूलमदे रे हिया में उथळ पुथळ व्हेयरी ज्यूँ ज्यूँ जान आवा री वेळां व्हे ज्यूँ ज्यूँ आणंद नै भय रा वेग सूँ छाती घड़घड़ कररी । साथण्यां रे लारै डागळा पै जान देखवा ने चढै अर सरमाय पाछी नीची उतर जावै ।

ऊँची चढूँ नीची उतरूँ ए
सइयां जोवूँ ए भालेळा री वाट
सहेल्यां ए आंवो मोड़ियो

जान रा नगारा सुण्या, सूरज री किरणां में भाला भळक्या, घोड़ा री टापां अर हींस सुणी, लुगायां देखणे ने आगती एक दूजी रे माथै पड़ती, गोखड़ां में, छाजां पै जाय चढी ।

आगै आगै पावूजी रा भाई भतीजा नै परवार, छोगा कलंगी लगायां, अलल वछेरा नचावता, बांका मूंडा रा सुरंग, कुमैत, अवलक घोड़ा ने एकी वेकी कराता आया ।

“जान तो रूपाळी है । घोड़ा चोखा सिएगारियोड़ा है । वीद रूपाळो घणो बतावै, वीद ने देखवा तो दो ए ।” लुगायां एक दूजी सूँ वातां करै ।

डावै जीमणै चांदा डामा रा घोड़ा, वीचै केसर काळमी पै पावूजी सवार । केसर रमभम रमभम करती चालरी, ढोल री ताळ माथै केसर रा नेवर भरणक भरणक वाजरिया । कनौती उठायां, छाती फुलायां, मरोड़ मरोड़ बांकी करती गाबड़ पै केसवाळी री गूंध्योड़ी लट्ट्यां हालती जायरी, देखवा वाळा केसर री चाल ने देखता रैग्या । सेवरो बांध्योड़ा पावूजी जाणै दूजो सूरज उग्यो व्हें । चौड़ी छाती ने ऊँची कीवां, एक हाथ सूँ वाग पकड़्यां दूजा सूँ मुजरो भेलता पावूजी केसर री रास घीरै घीरै हिलावता चालरिया जाणै फौजां रो मांभी घूमतो जायरियो । मोटी मोटी आंख्यां, तेज सूँ दम दम करतो ललाट, कुन्दन री नाई दपदप करतो रंग । लांबी लांबी मुजा सेल ने थाम्योड़ी । पसवाड़े लटकती तरवार । सोढा री नजर वीद पै जमी री जमी रैगी । अमराणां रा मिनख पावूजी रो रूप देखता रा देखता रैग्या । सोढियां छाजां पर सूँ थूथकारा न्हांकण लागी, सोढ़ी री मां री छाती वीद रा बखारण सुण सवा हाथ चौड़ी व्हेगी, साथण्यां सोढ़ी ने छाती रे लगाय लीवी “कसी भागवान है यूँ ।” डावड्यां दीड़ी दीड़ी वधाई दीवी “वाईसा, वाईसा, सूरज री किरण नै वीद री किरण एकसी है ।”

फूलमदे रो हिवड़ो हिलोळा लेवा लाग्यो । सोढां रो साथ आपणां जवानां रो नै जांन रा जवानां रो मन ही मन मुकावलो करण लाग्यो । बाथ में बाथ घाल नै सोढा अर राठौड़ मिल्या, अमलां री गैरी गैरी मनवारां खोवा भर भर एक दूजा ने देवा लाग्या । डामो बोल्यो “आपरा खोवा सूं तो म्हारो कान ही तातो नीं व्हे, यो कटोरो ही भेलाय दो ।” एक घूंट में कसूवा रो कटोरो खाली कर डामो, सोढां रे हाथ में पाछो भेलायो । डोढी आंख सूं डामा ने जी बगत तो सोढा देखनै रैग्या ।

बाग में जांन रा डेरा लाग्या । चंपा री हरी डाळ रे बंधी केसर उगाळी कर री, तंबू में पावूजी साथीड़ां लारै बैठ्या, बातां कररिया । रंगीला सोढा आप आप रा घोड़ा ने पलाण बाग मे राठौड़ां सूं मनरळी करवा ने आयग्या । आडी डोढी लाल पीळी जाजमां ढाळदीधी । राठौड़ां रे, सोढां रे हंसी मसकरी री वातां व्हेवा लागी । वातां रा फटकारा लागरिया “केसर रो नाम तो कानां सुण राख्यो हो, जस्यो नाम सुण्यो वसी बीने आंख्यां सूं देखी पण वीरी दौड देखां जद पतो लागै ।” एक सोढे सरदार कह्यो ।

“म्हारी केसर तो कोस पचास चालनै आई है, आपरा घोड़ा तो ठांणां सूं खुलनै आया है, अबार दोड़ रो मुकावलो कस्यो ?” पावूजी जबाब दीधो । पण सोढा तो ज़िद पकड़ लीधी, “थांरा म्हारा घोड़ा री दौड़ तो व्हेला हीज, सोढा रा नै राठौड़ां रा जवानां रो जोहर पतवारणो है”

तै व्ही जो हारे बीरो घोड़ो चारणां ने बगसीस । सोढा आपरा तेज घोड़ा पै जीण माड्यो, पावूजी केसर री पूठ पै थाम दे, “बाप बाप” कैबता चढ़्या । दोई साळा वैनोई होड़ मार घोड़ा फैंक्या ।

ऊभां तो देखै छै सगळा अमराणै रा लोग ।

कोई मे'लां पै निरखै छै सोढां रे घर री कामणी ॥

पावूजी केसर ने ललकारी । केसर तो उड़ी जाणै आसमान में उड़री व्हे । दौड़ती घौड़ी यूं दीखै जाणै जमीन रे मांयनें मिलगी व्हे ।

घर घर में घुड दौड़ री बात व्हेगी, रंगीला सोढा हारग्या, पावूजी राठौड़ जीत्या ।

सोढां ने मन मे घणी रीस आई,

“तोरण री वेळां पावूजी ने अर केसर ने खबर पटकांला ।” घणी ऊंची जगां पै लेजाय तोरण बांध्यो ।

“अबै पावूजी अर केसर कांई करैला ?”

वनड़ा वण्यां पावूजी तोरण पै आया, देखै तो गढ़ रे कांगर आसमान पै जातो तोरण

वांघ राख्यो । पावूजी रे मन में सोच आयो अरु केसर काँई करैला । मन ही मन केसर ने कैवै,

मत नां तो दीजै ए केसर थारो म्हारो पोत ।

मत नां तो लजाये ए राठोड़ां री जातड़ी ॥

पावूजी केसर री पूठ पै थापी दीधी, केसर तोरण साम्ही भांक हींसी, जाणै केयरी व्हे, 'यो कतरोक ऊंचो है कै वो तो चांद सूरज रा कांगरा ने जाय पूगू' ।

पावूजी तंग ने कस लीधो, पागड़ी रे अलिबंध लगायो, रान जमाय काठा पूठ पै वैठचा ।

ढोली रा छोरा थूँ मधरो ढोल बजाय ।

ढोलां के ढमाकै रे म्हारी केसर घोड़ी नाचसी ॥

मधरो मधरो ढोल बाजवा लाग्यो, रमक भमक केसर नाचवा लागी । नाचती नाचती घोड़ी रे पावूजी थापी दीधी, थापी रे थपाकै केसर ऊछळी ।

उछळती गिराई छै सोढ़ां रे गढ़ री भींत ।

खुरिया तो रोप्या छै असमानी गढ़ रे कांगरै ॥

तोरण कने जाय केसर आगला पग रोप्या, पावूजी तोरण मारनै नीचै उतरचा तो घोड़ी गढ़ रा कांगरा खुरां रै लारै लेती आई । चांदे अर डामे मूँछां पै हाथ मेल्यो. राठोड़ां री छाती फूलगी, रिसाळू सोढ़ा नीचा माथा घाललीघा ।

पावूजी री मलफ देख सोढ़ी आख्यां में आंजस भरचां साथण्यां साम्ही भांकी तो साथण्यां बळगी, सोढ़ी फूलगी । वीर पति रे लारै एक घड़ी रैवा मे जतरो सुख है वो कायर रे लारै आखी उमर रैवा में ही नी ।

चंवरी मंडी, पावूजी मांड़ा में सोढ़ी सूँ हथळेवो जोड़चां आया । वेदी रचगी, जोसी वेदी रो पाट पूररियो, सूरजमल जोड़ा सूँ गठजोड़ो बांध्यो. लुगायां मंगळगीत उगेरचा, सोढ़ा रो सारो परवार भेल्लो व्हीयो वैठयो । वीद वींदणी पाटा पै हथळेवो जोड़चा वैठचा । लाल पोसाक पैरचां सोढ़ी रे हाथी दांत रो नवो नवो चीरचोड़ो चूड़ो, कंकुवरणी कळायों में ओपरियो, फेरा फिरवा ने उठचा, आगै आगै हाथ जुड्योड़ी सोढ़ी धीमा धीमा पगल्या धरती, लारै लारै पावूजी सोढ़ी रो हाथ पकड़चा पैलो फेरो फिरचा ।

लुगायां गायो,

पैलै फेरै जुड़ग्या छै बनड़ा बनड़ी रा जीव ।
राठोड़ां अर सोढां रा व्हाला सगपण जुड़ग्या ॥

एक फेरो व्हीयो, दूजो फेरो फिरवा लाग्या, लुगायां गायो,

दूजै फेरै दूध नीर ज्यूं मिल्या दियनड़ा रा जीव ।
सोढां अर राठोड़ां रा गाढ़ा सगपण जुड़ग्या ॥

सोढी री मां रा नैणां में आरांद रा नै मोह रा आंसूं छळछळायग्या । “वेटी पराई व्हेगी, परी जावैला” ईं विचार सूं मां रो काळजो हालगियो । तीजो फेरो फिररिया, केसर टापां पटकै नै मायो घूरणै हींसी, पाबूजी रा कान वठी ने लाग्या, डामो ऊठनै गियो । घोड़ी रस्सी तुडाय दीधी, टापां पटकरी, आंख्यां में आसू भर राख्या, मायो भंभोड़री । ये काई अपसुगण ? घोड़ी ने थापी दे जतरै तो देखै, देवळ चारणी, केस खिड़ायोड़ा रोवती जायरी नै आय हाको कीधो “म्हारी गायानं लेग्या ।” डामो पूछै पूछै जतरै तो देवळ, पाबूजी फेरा खाता जठै जाय पूगी, केस तांगती रोवा लागी, “पाबूजी, थां तो अठै सोढी रा हथळेवा में रीझ्यां बैठचा हो वठीनै म्हारी गायानं खीची ताण नै लेग्या ।”

सुणताई पाबूजी बागो भड़काय उठचा, हथळेवो बंध्यो लगे जीने खोलतां नजर आया । खळभळाटो मचग्यो । एक पल पैला अगती ने साक्षी दे पाबूजी जीं हाथ ने आपरै हाथ में भेल्यो हो वीने छोड़ ऊभा व्हेग्या । सोढी मूरती ज्यूं बैठी री बैठी रैगी । सोढा आंख्यां फाड़ देखता रैग्या ।

पाबूजी केसर साम्हा चाल्या, सोढी ने चेतो आयो वा लाज सरम भूलगी, भूलगी वीरा पीयर रो सारो परवार बैठचो है, जाताथका पाबूजी रा बागा री चाळ पकड़ लीधी, आंख्यां में आंसू भरग्या । कुमळायोड़ा फूल री नाई होठ सूखग्या ।

तीजोड़ा फेरा में जी पाबू किस विध चाल्या छोड़ ।
आधी तो कुंवारी जी म्हानें आधी व्यायोड़ी छोड़ दी ॥

पाबूजी पल्लो छुडाणों चावें परा छुडावणी नीं आयो । एक पल सोढी साम्हा भांक्या दूजै पल कूकावती देवळ ने देखी ।

गुनो तो भरियां छां ए सोढी जी म्हे खास ।
वचनानां रा वांध्योड़ा तीजै फेरै उठ चाल्या ॥

आंसूड़ा रळकावती सोढी रा आंसू आपरा रुमाल सूं पूछता पाबूजी कह्यो, “सोढी, म्हाने सीख दो, देवळ ने म्हारा वचन दियोड़ा है । म्हाने जावा दो, नीं जावूला तो म्हारा नाम पै काळग लागैला ।”

सोढी रोवती रोवती बोली,

भेजूं जी पावूजी बावोसा री फौज,
पकड़ तो मंगवाद् तड़कै जायल जींद को ।
जीमो जी पावूजी बैठ्या जिनवा रा भात,
चोपड़ पासा खेलो जी म्हारे सूं रंग मे'ल में ।

देवळ करळाई, “पावूजी म्हें पै'लां ही कह्यो हो, थां सोढी रा रंगमे'ला में रम जावोला । चारणी री गायां कुण याद करै । नीं चालता व्हो तो नट जावो । म्हेंने म्हारी केसर सूं पो । पावूजी, वचन देणो सोरो है, निभावणो घणो दोरो ।” देवळ जवान रा तीर पै तीर छोड़्या ।

पावूजी ने रीस आयगी, नेहभीणां नैणां में रोस झळकवा लाग्यो, हथळेवा री में'दी सूं भरचोड़ा हाथ तरवार री मूठ पै जाय पड़्या । गठजोड़ा री गांठ खोलनै पावूजी आगै पग दीषा । सोढी गैलो रोकनै आडी ऊभी व्हेगी । आंख्यां सूं आंसूडा कायर मोरड़ी नाई ढळकायरी । हथळेवा री आधी रची में'दी रा भरिया हाथां, वंध्या मोड़, सजोग सूं पै'ला विजोगणी व्ही सोढी, आधा फेरां में सूं ऊळ्या मुरजाळा पावू रो गैलो रोकनै ऊभी रैगी । सारो परवार सण्णाटा में आयो चुप ऊभो । ताजता ढोल रुक्या । मन्तर जोसी रा मूंडा में अघूरा रैग्या । वेदी री पावन अगनी बुझगी । सूरजमल सोढा रो मूंडो स्याह पड़्यो । सोढी री कांचळी आंसूडा सूं आली व्हेगी । साळियां डसूका मरवा लागी ।

पावूजी री नजर सोढी साम्ही, पग देवळ आड़ी नै ।

वारे केसर टापां मारेनै हींस री । देवळ ऊभी माथा रा केस खैचरी । पावूजी उठी नै, करणां करती सोढी साम्हा भांकै तो काळजो कटनै रैजांवै, व्हीने चारणी देवी रो रीद्रूप देखनै रोस सूं वारो रगत उकळवा लागै ।

“सोढी, ये आंसूडा पूंछलो, रोयनै सीख मत दो, एक रजपूतारणी, रजपूत ने सीख दे ज्यूं म्हेंने हँसनै विदा करो । थांरा आंसूडा में म्हूं अटक जावूंला तो जुग में म्हारी मूंछां नीची व्हेजावैला, लोग कैवैला पावू सासरिया में मौजां करै, दियोड़ा वचन भूलग्यो, थां कायर री अस्त्री वाजोला । थां मुरजाळा पावू रो हाथ पकड़ियो है, म्हेंने म्हारा प्रण पूरा करवा दो, केसर पै काठी मांडवा दो, देवळ री गायां पूठी घेर लावा दो । सोढी, राजी व्हे म्हानै सीख दो ।”

सोढी, परणेतू छापल सूं आंसूं पूंछ लीषा, होठां पै मांडारणी हंसी लीयाई, काळजा

पै भाटो मेलनै वा रजपूतारणी ज्यूं वौली “पधारो ।” होठां पै हंसी ही, परण नैणां में दरद रो दरियाव उलळरियो । जीभ “जावो” केयरी ही, परण हिवड़ो फाटरियो,

चढ़ोजी पावू रणवंका भल गायो री वार ।

सैनाणी तो दै जावो जी म्हाने थारै हाथ री ॥

सैनाणी ? कांई चीज असी है जो देता जावै ? हथळेवा री दाभी मुगधा ने, फेरां वीचै उठनै भूँभवा ने जातो वीर पति कांई सैनाणी में देवे ? रंग री रात ने रण री रात मे बदल देण्यो, परणेतू में दी रा रंग ने रगत रा रंग में घोळण्यो रंग दूल्हो आपरी तीन फेरा खायोड़ी लाडी ने सैनाणी में कांई देवै ? पावूजी बोल्या,

जीवांला तो फेर मिलागा थां सूं सोढी आया ।

मर जावांला तो लादैला ओठी म्हारा मेंभद मोळिया ॥

“जीवतो रह्यो तो थां सूं आय मिलूँला । मरगियो तो सवार म्हारी पाग लाय थाने सूंपदेला । या सैनाणी है ।”

पावूजी वागो झड़काता चाल्या । सोढी तड़ाछ खाय नीचै पड़गी । पावूजी री सासू साळियां आय विलूँमगी ।

पावूजी, म्हारा बाई में ओगुण कांई देख्यो जो थां यूँ छोड़ चाल्या ?

पावूजी हाथ जोड़ता बोल्या,

दूधां सरीसी ऊजळी थारी वाई जुग जुग रे मांय

कोई ओगणियो नहीं थारी वाई में गुण मोकळा ।

ओगण तो कहीजै जी सासूजी म्हारे मांय

देवळ तो चारण ने मस्तक वेच्या आपणां ॥

“चांदा, डामा, घोड़ां चढ़ो, देवळ देवी री गायो री वार चालो ।”

पावूजी रो भालो उठ्यो, सोढां री अस्त्रियां पावू रा ईं रूप ने एक टक देखती रैगी “अस्यो वींद सोढां री पोळ नी तो कदे आयो नीं कदे ही आवै, लावो कागज लावो यांरो चित्तर उतारला, अस्यो रूप फेरुं देखण ने नी भिखेला ।”

पावूजी सोढां सूं गुजरा जुहार करिया,

“जीवांगा तो आवांगा म्हे ओजूं सुरंगै सासरै”

केसर री पूठ पै थापी दे सवार व्हीया । सोढी रा गंठजोड़ा री गांठ खोल, वचनां री गांठ में बंध, गायों छुड़ावा चाल्या । साळा साळियां रा प्याला री मनवारां छोड़ तरवारां री मनवारां लेवा चाल्या, रंगभीनो पावू रोसभीनो व्हेग्यो । जीं केसरिया वागा सूं राजकंवरी ने परणी बीज वागा सूं मनु री कुंवारी सेना ने परणवा चाल्या । कंवरी ने चंवरी में छोड़ मंवरी री पूठ पै चढ्या ।

प्रथम नेह भीनो महा क्रोध भीनो पछै
लाभ चमरी समर भोक लागै,
रायकंवरी वरी जैण वागै रसिक
वरी घड़ कंवारी तैण वागै ।

चोईस वरसां रा पावू सोढी री सुखसेज माथै नीं, रण सेज में पौढ गया । गोगाजी ने खबर लागी, खीचियां रा हाथ सूं पावूजी वारां वड़ा भाई वूड़ाजी खेत रंग्या । चांदो अर डामो ही घरी रे लारै कट मर्या ।

गोगाजी भाग्या, आय न देखै लोहियां सूं राता व्हीया रणखेत में लोथां रो ढिगलो पड़्यो है । गायों री रक्षा सारूँ कटकटनै पड़्या भूभारां रै आगै वारो माथो भुकग्यो “घन है या खारी खावड़ री घरती जठै अस्या वचनां साटै माथा देण्यां रतन नीपजै । घन कंवळादे माता ने, पावू जस्यो पूत जायो जो हथळेवो छोड़नै रण में भूँभवा ने दौड़्यो ।” गोगाजी, पावूजी ने हेरै अंग अंग कटचोड़ो पावू कठै ? लोथां पै लोथां रो ढिगलो पड़्यो, जांरे गळडव्वै तरवारा लटक री गँडा री ढालां छळती फिर री, लोहियां सूं भरचोड़ा भाला घूळा में पड़्या । घोड़ा असवारां कने पड़्या, चारूँ पग पसारचोड़ा, मूँडा में घूळ भर री । खावड़ री रेत लोहियां सूं लाल व्हेय री । गिरजां रो डार रो डार वैठ्यो, वां मूँछाळां री आँख्यां काढ काढ खाय री । एवड़ छेवड़ डामो चांदो पड़्यो, बीच में खावड़ रो मूरमो पावू पौढ रियो ।

परणेत री कलंगी पडी चमक री । गोगाजी किलंगी देखतां ही पावूजी ने ओलह्या । सात परकम्मा दे वारी माथा री पागड़ी सभाळी, गठजोड़ो नै कलंगी उठाई । बियाव रा कांकडडोरड़ा खोलवा ने हाथ आगो कीधो तो गोगाजी री आँख्यां सूं आंसुवां रा चोसरा छुटग्या । चुगचुगनै पावूजी रा सँनाण भेळा कर गांठड़ी बांधी । गोगाजी भाटा री सी छाती कीधां वूड़ाजी री पचरंग पाग उतारी । आंगळी में सूं बींटी काढी । राईका ने बुलाय कह्यो “कोलू भाग जा । अठा रा समाचार दे, ये सँनाण यांरी राशियां ने जाय सूँप ।”

राईके मूंगे टोड़ियो पलाण्यो । वसकसनै टोरड़ा रे कामड़्यां री मारै । टोड़ियो भाग्यो जावै, मूँडा सूं भाग पड़ रिया । टोरड़ियो दौड़े जो राती भरी रेत रो

भतूळियो उड़तो जावै, रेत रा रंग जिसो ऊंट रो रंग, रंग में रंग मिलग्यो । राईके ऊंट ने अस्यो दवायो के बीने बौभा उड़ता लागै, पग नीचली घरती भागती दीखै ।

बूड़ाजी री गैलीराणी गोखड़ा में बैठी देखै तो ओठी ऊंट भगायां आय रियो । गैलीराणी जांणगी व्हे न व्हे आपणै ही घरै कोई करड़ै काम आयो है ।

अतराक मे तो आय बूड़ाजी री पोळ आयै कुरिया ने जैकायो । गैलीराणी डावड़ी ने कह्यो, “हीड़ागर ! ओठी ने पूछ कठा सूं आयो, काई काम आयो ?”

हीड़ागर भट नीचे ऊतरी ।

“ओठी ! मन री बात कै ! कठा सूं आयो ? काम काई है बता ।

राईको बोल्यो “मन री बातं दासियां सूं थोड़ी कहीजै, राणी ने नीचै भेजो ।”

आडो पडवो तंणाय गैलीराणी नीचै ऊतरी ।

“ओठी ! बोलो, काई समाचार लाया ? कठा सूं आया ?”

“राणीजी ! गोगाजी रो भेज्योड़ो आयो हूं । राठोड़ां रा नै खीचियां रा भगड़ा रा समाचार लायो हूं ।”

“ओठी ! कै कै भट कै, दोई दलां रा समाचार सुणां । कुण हारचा, कुण जीत्या ?

“खांडां री जीत तो खीचियां री व्ही । जस री जीत थांरा देवर पावूजी री व्ही । भूँभारां री देवळी वन में व्हेणी ।”

या कैतां ही भट बीटा री डोर खोल, बूड़ाजी पचरंग पाग गैलीराणी रे मूडागै मेली । बीटा में हाथ घालतां ईं पावूजी री कलगी, काकणडोरड़ा गैलीराणी ने हाथ में भेलाया ।

सैनाण ओळखतां ही गैलीराणी तो पांखड़ा कटी मोरड़ी री नाई कुरळाई ।

“ओठीड़ा ! थूं म्हारो घरम रो भाई है । अमरकोट जा सोढी आपरे वाप री पोळ में बैठी बाट न्हाळ री व्हेला । ओठी, एक पलक देर मत कर । ये सैनाण जाय सोढी ने दे ।”

राणीजी ! ईं ऊंट रे मूंडा में भाग आय रिया है । अमरकोट रो मारग ईं सूं नी कटै । यो गैला में मर जावेला । थां थांरा ओठी ने अठा सूं भेजो ।”

गैलीराणी बोली, “म्हारे कस्या ओठी है अबै ? म्हारा सवार नै ओठी तो सायब रे लारै, पावूजी रे लारै गिया । म्हारो तो ओठी एक जीवतो नी रियो । भाया ! थूं घरम रो भाई है । वेन रा अटकिया कारज ने कदे ही भाई नटै कै ?”

राईको भट अमरकोट जावा ने तयार व्हेग्यो । गैलीराणी सोढी रे कागद लिख्यो । आगती आगती रोवती गी, चार ओळां मांडी,

“थांरा अर म्हारा सूरज चांद छिपग्या । दिनडो छिपग्यो अंधारी रात आयगी । करमां में वेमाता आंक लिख्या जो टळै नीं । म्हूं सती व्हेयरी हूं । थां ही सती व्हेता व्हो तो भट आयजावो । नीं तो वाप रे घरै बैठ्या माळा फेरजो । ”

सूरज ऊगतां ऊगतां राईको अमरकोट पूग्यो ।

फूलमदे सोढी ऊंट दौडतो लगो आवतो देख्यो । सोढी रो काळजो घूजग्यो ।

ओठी तो आवतां ही सोढां री पोळ उतरचो । जुहार मुजरा कीधा ।

“आओ, पगरखी खोलो । जाजम पै वैठो । कठा सूं आय रिया हो ?”

“कौळू सूं आय रियो हूं, सोढीजी रे कनें आयो हूं ।”

“दळां रा समाचार ?”

“जस तो पावूजी जीत्या, खांडे खीची जीत्या”

सोढां रो सगळो साथ फीको पड़ग्यो । माथा पै सोढां चाळ ओढ़ लीधी । दासी नै बुलाय नै कह्यो, “ओठी ने फूलमदे कने लेजा ।”

ओठी जायनें देखै, साथण्यां रे वीचें सोढी यूं वैठी जांणें कूजा री डार रे वीचें कूज वच्ची वैठी व्हे । भोळो भोळो मूंडो, हाथां रे कांकण डोरडा वंध्योडा, फेरां में पैरचोड़ी पोसाक पैर राखी हाथां पगां रे वियाव री में दी मंज्योड़ी ।

ओठी आगे पग देवें नै पाछा पड़ै । काळजो बळ रियो, सोढी ने जायनें काई कैवला ।

ओठी तो वजर री छाती कर गैलीराणी रो कागद नै पावूजी रा सैनाण सोढी रे आगे कीधा । पावूजी री पाग देखी, सीस री कळंगी ओळखी । कांकणडोरडा ने सोढी उठाय छाती रे लगावा लागी नै तिवाळो खाय नीचें जाय पड़ी ।

एक घड़ी सूं सोढी चेत करचो तो थरथर डील कांप रियो । डसूका भर डाड मारी । आंख्यां सावण भादवो व्हेगी । काठी छाती कर जेठायणी रो कागद वांच्यो । वांचतां ही बोली रथ जुड़ावो । गैलीराणी वाट देख री है । भट करो । पावूजी कनें भट जाय पूगूं ।

मां रा गळा में वाथ घाल सोढी रोवा लागी । मां री सारी कांचळी आंसुवां सूं भीजगी । मां, वेटी रे माथा पै हाथ फेरै नै दोई कुरळावै । वेटी सासरिये जाय री है । कसी आंख्यां सूं वेटी रो वो रूप देखै ? कांई कैयनें आसीस देवै ? सासरा री सीख वेटी ने कांई देवै ?

मां रे मूंडा में तो जीभ सूखगी । पखाण री मूरती व्हे ज्यूं ऊभी । सोढ़ी रा मूंडा रो दूध ही नी सूख्यो । बेमाता ये आक मांडवा लागी जद बीरी दवात क्यूं नी फूटी । सोढ़ी रोय री, 'मां सांवरण रे मी'ने थां कसी बेटी ने बुलावोला ? कुण थां सूं अबै गळा में गळो घाल मिलेला ? मां कींने अबै था हंस हस छाती रे लगावोला ? कसी बेटी ने सासरा रा समाचार पूछोला ? कीने लाड़ कर घी घाल घाल चूरघो जिमावोला ? आंरां रा घर तीजणियां सूं रूपाळा लागैला, मा, थांरा आंगण मे कुण लैरियो ओढ़ फिरैला ?

सोढ़ी ने यूं रोती देखी तो सूरजमल सोढ़ा री करड़ी छाती मेंण री नाईं पिघळगी । बेटी ने छाती रे लगाय डसुका भरवा लाग्या ।

सोढ़ी रोय रोय कंवा लागी, 'बाबाजी, म्हूं तो चाली यो थांरो डायचो म्हारे करम में नी लिख्यो । ये ढोलिया, निवार अठै ही घरचा रैगिया । म्हने था घणा लाड़ लड़ाया, रूस जाती तो हाथ सूं गिरास दे दे जिमाता, गोद मे लेनं खेलावता । थांरी गोद री चिड़ी तो उड़ री है । थां हाथ सूं म्हने सत रो नारेळ दो । म्हूं जावूं ।'

बाप, आखरी बगत माथा पै हाथ मेल्यो, नारेळ भेलायो ।

सोढ़ी बाथ घाल भाई सूं मिली ।

भोजाई सूं मिली, 'आखरी मिलणा है अबै ईं जनम मे तो मिलांला नी ।'

एक एक साधण सू भुजा पसार पसार मिली, 'अबकै बिछड़यां फेर नीं मिलांला । थां म्हारे आंगणै रमवा ने मत आवजो, नी तो म्हारी मां याद करकर ऊभी रोवैला ।' सगळा सूं मिल राम राम कर सोढ़ी रथ पै चढ़ी ।

डायचा में देवा ने रथ ब्रणायो जींरी लाल भूल बैलियां ऊपर सूं उतार धोळी भूल घाली । बळदां रीं लाल रंग री सींगोटी परी उतारी गळा रा घूघरा खोल लीघा ।

पूरी बीनणी नी वणी जठा पै'ली सती व्हेवा ने सोढ़ीजी सासरै चाल्या ।

कोळू में आया । दोई देराणी जेठाणी गळा में गळो घाल रोई जाणै काचो माट फूटियो । गेलीराणी रोवा लागी, 'आज घरै बीनणी आई । करम फूटिया नी व्हेता तो सोढ़ी रा कोड करती, चांवळ भात रांध दोई देराणी जेठाणी भेळें जीमती । वघायनं घर में लेवती । आज म्हारा घर में जगाजोत लागगी व्हेती ।'

सोढ़ी बोली, 'म्हने पावूजी रा मे'ल तो दिखावो ।'

गेलीराणी, सोढ़ी ने ले पावूजी रा सूना माळिया में आया ।

“सोड़ीजी, अठै थारा स्याम रैवता या वारी वैठवा री जगां, अठै चांदो अर डामो वैठता । यो कमवजिया रो भालो पड़्यो । वारा हाथ में भालो रियो जतरै कोई जूँकारो नीं कीवो । यो गोखड़ो अठै पावूजी वैठता ।”

सोड़ी वैठक री रज लेनै माथा रे लगाई । गोखड़ा ने सलाम कीधी । भाला ने उठाय छाती रे लगायो ।

“भाला, थारो खोटो भाग । थनै वावणिया अठै खुरा में छोड़ परा गया । गोखड़ा में अवे कइतरा बूँवाळा घालेला ।”

सोड़ी डसूका भर पावूजी री एक एक चीज देखवा लागी, यां मे'लां री सोभा म्हारा मन ने बाळ दीवो, अवै तन ने अगनी बाळेला । 'पोळचा, रंग रो डावो भट ला । पोळ पै छापो लगावूँ । पोळिये संदूर में रंग घोळनै लायो । सोड़ी संदूर में हाथ भर पोळ रे माथै हाथ रा छाप लगाया । सती व्हेवा ने तयार व्हेगिया । देराणी जेठाणी, नेखचख सूँ भिणगार कर लीला घोड़ा पै सवार व्ही ।

आगँ आगँ ढोल बाजता जाय रिया, पाछै बसती रा लोगां रा “हर हर” रा जँकारा सूँ गगन गुँज गियो । घोड़ा रोक सतियां नीचै ऊतरी । रेसम डोर लगाय कुआं सूँ पाणी खँच्यो । कपड़ा पैरियां सूबां ही खळखळ पाणी कूढनै सतियां सनान कीवो । सतियां माथां पै गंगाजळ री भारी रा मूँडा खोल दीघा । जो घन माल हो सगळो वामणां ने पुत्र कर दीवो । चारण पावूजी री दीरता रो वखाण कीवो, जाने घोवा भर भर सोना रो गहणो देय दीवो ।

चन्नण नै नारेळां री चिण्योड़ी चिता में दोई सतियां वैठगी ।

रजपूतारणी

रेत रा टीवा बळरिया । ऊनी ऊनी लू असी चाल री जो कानां रा केसां ने बाळती नीतर जावै । नीचै धरती तपरी, ऊंचो अकास बळरियो । खेजड़ा री छाया में वैठ्यो सोढो जवान भीतर सूं अर बाहर सूं दोनूं कानी सूं बाझ रियो । बारला ताप सूं बत्ती हिया में सळगती होळी री भाळां बाळ री । दुपैरी रा सूरज री सूधी मूंडा साम्हीं किरणां आंख्यां में गवोड़ा पाड़ री पण बीने ईं री सुब नीं । वो तो ऊंडा विचार में अस्थो डूबरियो के चारूं दिसा एक सी लाग री । आज बीरे होवण बाळा सासरा नूं सुसरा रो सनेसो ले आदमी आयो,

“परणणो व्हे तो पनरासौ रिपिया तीन दिनां में आय गिरा जावो, नीं तो आखा तीज ने थांरी मांग रो दूजा रे सागै वियाव करवांला ।”

“सुणतां ही सोढा जवान री आंख्यां में भाळां उठी । अपणै आप ही हाथ तरवार री मूठ पै पड़ग्यो । दांता सूं होठां ने काट रैग्यो । बीं री मांग दूसरा री होजासी, जीरी खोळ बीरी मां रिपियो नारेळ घाल आज सूं दस बरसां पै’लां भरी अर बांरो वियाव कर देणै रा मनचूवा करतां करतां मां वाप दोई मरग्या । घर में नैनपण पड़गी । कुण खेती वड़ी, गाय भैंस सम्हाळतो । अवै पनरासौ रिपिया कठा नूं लावै ? “ए रिपिया दीघां विना बींरी मांग दूसरा री होजासी, जीरा सपना दस दस बरसां सूं वो देखतो आयो, बी मांग ईंज आखा तीज ने दूजा रे लारै कर देला ।”

सोढा जवान री आंख्यां में खून उतर आयो । आज तक कदे ही असी व्ही है मांग रे वास्ते तो माथा कट जावै, म्हुं जीवतो फिरूं अर म्हारी मांग ने दूजो परणै, हरगिज नीं, हरगिज नीं ।

“बोहरा काका, म्हारी लाज थारे हाथां है ।”

“लाज तो म्हे धरणी ही राखी है । थूं बता कस्या खेतां पै पनरासौ गिरा दूं ? अडारणै कांई राखैला ?

“म्हारे कने है ही काई ? रजपूत री आवरु एक तरवार रो खांपो म्हारे कने वच्यो है ।”

“तो भाई, कीं दूजा वोहरा रो वारणी देख ।”

सोढो तड़फग्यो । देख काका, ये म्हारा घर री सळी सळी, म्हारा नैनपण में भूठा सांचा खत मांड मांड लेय लीघी । म्हारा घर में ठीकरो तक नीं छोड़्यो । म्हे थनें सारो दीघो, अर जो ही मांगतो व्हे देवण तयार हूं । पण ईं वगत म्हारी, म्हारा घराणां री लाज राखलै । जींरी मांग दूजा रे लारै परी जावै वो जीवतो ही मरचां वरावर है । ईं तरवार, जगदम्बा ने माथै मेल सोगन खावूं थारो पीसो पीसो दूध सूं धोयनै चुकावूं । थारे दाय आवै जतरों व्याज मांडलै । ईं वेळां म्हने रिपिया गिरा दे ।

“रजपूत रो जायो व्हे तो ये अस्या कोल करजे । म्हूं खत पै जो माड दूं वीं पै थूं दसगत कर देवैला कै ?

“मायो चावै तो दे दूं पण अवार म्हारी लाज राखलै ।”

वाणिये खत माड'र आगो कीवो । कान पै मेली लगी कलम ने उठाय हाथ में भेलाई ।

“वांचलै खत ने, छाती व्हे अर असल रजपूत व्हे तो दसगत करजे ।”

खत वांच्यो, मांड राख्यो “ये रिपिया व्याज सूधी नीं चुकावूं जतरें म्हारी परणी लगी ने वेन ज्यूं समझूं ला ।”

होठां ने दांता वीचें दवाय, राती राती भाळां निकळती आंख्यां सूं भांकतो दसगत कर दीघा ।

वरसां सूं सोढा रो सूनो घर आज वस्यो । आज बींरी मेड़ी में दीवो वळ्यो । दीमकां लाग्यो, लेवड़ा पड़्यो घर, लींप्यो चूंप्यो हंस रियो । घणा वरसां पछै आज चौर घर में घूघरां री छम छम व्ही । पीयर सूं डावजा में आयोडा गाडो मरचा असवाव सूं गिरस्थी जमाई । सोढो जीमवा वैठ्यो, वीनणी हाथ सूं पोयोड़ी चीड़ां री बींभणी ले पवन घालवा लागी । दांत रो चूड़ो पैरचां हाथां सूं पळस री । सारो घर आज काई रो काई सोढा ने लाग रियो । रजपूतानी री आंख्यां में नेह उभळ रियो पण सोढा री आंख्यां गम्भीर । वा पळसती री यो जीमतो रियो । सोढो बोलणो चावै पण बोलणो आवै नीं वा तो आनै व्हे बोलै ही किर तरह ? खाय, चळू करण लागो, रजपूतानी भट ऊठ लोटा सूं हाथां पै पाणी कूढवा लागी, सोढा री नजर घूंगटा में पसीना री दूंडा सूं चमकता मूंडा पै पड़ी, बींरी आंख्यां रे

आगै बाणिया रो खत भाटा री चट्टान ज्यूं आय ऊभो व्हेग्यो, वीरा हाथ कांपग्या । लोटा सूं पड़ती पाणी री धार जमीं पै पड़ बैयगी । रात पड़ी, सोणै री वेळा आई । सासरा सूं आयोड़ा ढोल्या पै सूता । भट म्यान सूं तरवार काढ़ दोय जणां रे बीच में मेल, मूडो फेर सोयग्यो ।

रजपूताणी सहमगी । “थूं क्यूं, म्हारा सूं काई नाराज है ?”

एक, दो, तीन, दस पनरा रातां बीतगी । या हीज तरवार काळी नागरा ज्यूं रोज दोवां रे बीचै । दिन में बोलै, बात करै जद तो जाणै सोढा रे मूंडा सूं अमरत भरै, आख्यां सूं नेह टपकै पण रात पड़तां ही बीज मूंडा सूं एक बोल नीं निकळै वे हीज आख्यांसांम्ही तक नी भांकै । रात भर अतरा नजीक रैवता थकां ही घणां दूरा । दिन मे घणां दूरा रैवतां थकां ही घणां नजीक ।

रजपूताणी बारीकी सूं सोढा रो ढंग देखै गैराई सूं सोचै । बी सूं रियो नी गियो । ज्यूं ही तरवार काढ़ ढोल्या पै सोवा लाग्यो, भुक पग पकड़ लीघा ।

“म्हारो काई दोस है ? म्हारा पै नाराज क्यूं ? गलती कीधी तो म्हारा मा बाप जो थाने रिपिया सारू फोड़ा पाड़्या ।” टळ टळ करता आंसू सोढा रे पगां पै जाय पड़्या ।

“कुण कै मूं थारा पै नाराज हूं । थूं म्हारी, म्हारा घर री धणियाणी है ।” आपरा हाथ सूं वीरा हाथा ने पगां सूं दूरा करतो सोढो बोल्यो ।

“तो अतरा नजीक रैवतां लगां, म्हासू अतरा दूरा क्यूं ?” सोढा रे ललाट पै दो सळ पड़ग्या ।

“थूं जाणणो ही चावै ?”

“हां ।”

“तो ले बांच ई खत ने ।”

दीवा री वाती ऊची कर टमटम करता दीवा रा चानणां मे खत बांचवा लागी ।

ज्यूं बांचती गी ज्यूं ज्यूं बी रा मूंडा पै जोत सी जागती गी । आजस अर संतोस सूं बीरो मूंडो चमकवा लाग्यो । खत भेलाती लगी, वेफिकी री सांस लेती बोली “ई री कोई चिंता नी, म्हेने तो डर हो थारी नाराजगी रो । वरत पाळणो तो घरणो सोरो ।”

दिन ऊगतां ही आपरो छोटोमोटो गैणोगांठों, माल असबाब रो ढिगलो सोढा रे मूंडा आगै जाय कीधो,

“ई ने वेच घोड़ा लावो, करजो उतारणो सत्रसूं पैलो धरम है। घरै बैठ्या तो करसा चोखा लागै। रजपूत चाकरी सूं सोभा देवै। कोई राजा री जाय चाकरी करां।”

“थनै पीयर छोड़ दूं ? थूं कठै रैवेला ?”

“पीयर क्यूं ? जठै थां वठै म्हुं, दो घोड़ा ले आवो।”

“परण, परण थूं साथे निभेला कस्यां ?”

“क्यूं नीं, म्हुं किसी रजपूत री जायोड़ी नीं कै, रजपूताणी रा चूख्या नीं कै ? म्हुंने ही थांरी नाई तरवार बांधणो आवै, म्हे ही म्हारा बाप रा घोड़ा दौड़ाया है।”

“थारो मन, सोचले।”

“सोच्योड़ो है।”

तेज सूं चमकतो मूंडो सोढो देखतो रैग्यो।

सवा हाथ सूरज आकास में ऊंचो चढ्या व्हेगा। चित्तोड़ री तल्लेटी सूं कोस दो एक पै दो घोड़ा एकीवेकी करता चित्तोड़ साम्हा जाय रिया। दोई जवान सवार एक सी उमर एक सी पोसाक पैरचां, घोड़ां ने रानां नीचै दवायां दौड़ायां जाय रिया।

हाथ रा भाला, ऊगता सूरज री किरणां सूं चमक चमक कर रिया। कमर में बंधी तरवारां घोड़ा रे दौड़वा रे साथै साथै रगड़ा खाय री। बां ने देख कुण केवै के यां में एक स्त्री है। रजपूताणी ईं वगत एक सूरापण भरचा जवान सी लाग री। दांत रो चूड़ो पैरचां कंवळी कळायीं नी री। मजबूत हाथ भाला ने गाढो पकड़ियां लगां। लाजती लाजती धीरै धीरै कोयल री सी बोली री जगां अरवै मेरी रो सो कण्ठ सुर बराय लीघो। घूंघटा में ही सरम सूं लाल लाल पड़जावा बाळा कपोल नीं रिया। सूरज री किरणां री नाई मूंडा सूं तेज फूट रियो। लाली लीधां लोयणां सूं नेहचो ऊफण रियो। जारौ सागी दुरगा रो सरूप व्हे।

घोड़ा दौड़ता, एक झपाटा में चित्तोड़ री तल्लेटी में जाय पूग्या। वठी ने राणाजी : दरवाजा वारे निकळ्या। नजर सूधी बांरा पै पड़ी, दो पल बी जोड़ी पै नजर रुकगी घोड़ा री लगाम खैच पूछ्यो,

“कस्या रजपूत ?”

“सोढा।”

“अठी किसतरै आया ?”

“सेर बाजरी सारूं, अन्नदाता।”

“सिकार में साथै हाजर व्हेजावो ।”

मूजरो कर दोई जवानां घोड़ां री बाग मोड़, लारै घोड़ा कीधा ।

सूरां रे लारै घुड़दौड़ व्ही । आगै आगै सूर भागरियो वारे लारै हाथ में भाला लीघाँ सिरदार घोड़ां ने नटाट्ट फँकरिया । एकल सूर दूँड री मारतो विकराळ रूप करचां घोड़ां रा घेरा ने चीरतो वारै निकल्चो । चारू कानी हाको व्हीयो, एकल गियो, गियो, जावा नीं पावै, मारो मारो ।”

सगळा ही घोड़ां री रासां एकल कानी मुड़ी, जतराक मे तो एक घोडो बीजळी री नाईं आगै आयो, सवार भाला रो वार कीधो जो पेट ने फाड़तो, आंतड़ा रो ढिगलो करतो आर पार जाय निकल्चो । राणाजी दूरां सूं देखतां ही सावासी दीधी ।

पसीनो पूंछतो लगे सवार नीचै उतर मुजरो कर घोड़ा री पूठ पै पाछो जाय बैठचो । कुण सोच सकै के भाला रा एक हाथ में एकल सूर ने घूळ भेलै करवा वाली लुगाई है ।

राणाजी राजी व्हे हुकम दीधो “थे वीर हो, आज सूं थां दोई भाई म्हारा ढोल्या रा पैरा री चाकरी दो ।”

खम्मा अन्दाता कर चाकरी भेली ।

सावण रो मीनों, खळ खळ करता खाल बैय रिया । तळाव चादर डाक रिया । डेडका हाका कर रिया । एक तो अंधारो पख, ऊपरै चौमासा री काळी रात, काळा काळा बादळा छांय रिया । बीजां सळाका लेवै तों असी के आख्यां मिच जावै, खोल्यां खुलै नीं । इन्दर गाजै तो अस्यो के जासै परथी ने ही पीस दूँ । अंधारी भयावणी रात हाथ सूं हाथ नीं सूभै । राणाजी तो पोढ्या, दोई रजपूत पैरो देवै ।

हाथ में नांगी तरवारां लेय राखी । बीजळी चमकै जो यांरी नांगी तरवारां वीं चमक में भलमल करै । आधी रात रो वगत, राणाजी ने तो नींद आयगी पण राणी री आख्यां में नींद नीं । सूती सूती कुदरत रा रूप रा अदभुद मेळ देख री ।

दोई रजपूत तरवारां काढ्यां मेलां रे वारणा आगै ऊभा ।

उत्तर में बीजळी चमकी रजपूताणी ने याद आई म्हारा देस कानी चमक री है । ईं याद रे लारै केई बातां याद आयगी । आज कमावा खातर यो मरदानो भेस करचां विदेस में आधी रात पैरो देयरी हूँ ।

दूजी अस्त्रियां घरां में आडा वन्द कर सोय री है । म्हुं नांगी तरवार लीवां ऊभी ऊभी रातां काटूं । अतराक में कने ही पपैयो बोल्यो “पी पी” । नारी हिरदे री दुखळता जागी । “पी कठै ? घरणोई खने है पण कांई व्हे ? म्हारी गिणती नीं तो संजोगण में है, नीं विजोगण में । म्हांसूं तो चकवा चकवी बोखा जो दूरा दूरा बैठ वियोग काढें । म्हुं तो रात दिन साथै रैवती लगी ही विजोगण सूं भूंडी ।” वीरो बांध टूट गियो । जाय’र सोढा रा कांधा पै हाथ मेल्यो, जाणै बीजळी पड़ी व्हे । दोई जणां कांपग्या । सोढो चेत्यो, “चेतो कर रजपूतारणी ।” रजपूतारणी सम्हळी । एक निसासो न्हांकती बोली,

देस विया घर पारका, पिय बांधव रे भेस ।

जिण दिन जास्यां देस में, बांधव पीव करेस ॥

देस छुटग्यो, परदेस में हां । पति है वो भाई रा रूप में है । कदे ही देस में जावांला जद ईं ने पति बणांवाला ।

राणी सूती सूती या लीला देख री । दिन ऊगतां ही राणी राणाजी ने कह्यो, “यां सोढा भाइयां बीचै तो कोई भेद है ।”

“क्यूं कांई बात है ? माथो तोड़ दूं ?”

“तोड़णै री नीं जोड़णै री बात है । यां में एक लुगाई है ।”

“राणी भोळी बात मत करो । या सूरता, यो आंख रो तौर, या मरदानगी, लुगाई में व्हे कदी ?”

“आप मानो भले ही मत मानो । यां में एक लुगाई है अर कोई आफत में है ।”

“यां रो पतो कस्यां लगावां ?”

“ईं री परीक्षा म्हुं करूं । आप मे’लां में विराज जावो, जाळी, में सूं भांकता रीजो वां दोई भाइयां ने बुलावूं ।”

चूल्हा पै दूध चढाय दीवो, डावड़ी ने इसारो कीवो, वा वारै निकळगी । दूध उफणतो देख्यो तो रजपूतारणी हाको कर दीवो, “दूध उफणै दूध उफणै ।” सोढो आंख रो इसारो करै जतरै तो राणीजी वारै निकळ पूछ्यो, “वेटी, सांच वता थूं कुण है । म्हारा सूं छिपा मती ।” रजपूतारणी आंख्यां आणै हाथ दे राणीजी री छाती में मूंढो घाल दीवो ।

सोड़े सारी बात सुनाई । राणीजी वणां राजी न्हीया ।

“यांरा करजा रा रिपिया व्याज मूवां न्हूं सांडणी सवार रे सायै थारे गांव नेई ।
थां अठै रैवो गिरस्थी बसाथो ।”

सोड़े हाथ जोड़्या “अन्नदाता रो हुकम माया पै परा जठा तांई न्हूं जाय न्हारा
हाथ सुं रिण चुकाय खत फाड़ नीं न्हांकू जतरै हुकम री तानील कियां न्हें । न्हाने
सीख बगसावो ।”

राणाजी करजा रा रिपिया अर गिरस्थी बसाथै रो वणां सारो सामान दे बांनि
सीख दीवी ।

वीं पड़वा री रात रा आखंड रो विचार ही कतरो मीठो है ।

पिउसंधी

“या अल्ला !” पीड़ा सून टसकतै बूढ़े बिलोच कलूंट फेरी ।

कनें ही वैठचोड़ी वेटी झेलो देवा ने हाथ आगो कीधो । बाप री लांबी चोड़ी देह साम्ही देखवा लागी । बिलूचिस्तान सून आयोड़ा बिलोचियां रो सरदार कांगड़ो माचा पै पड़चो मौत सून लड़ रियो, जमराज रा दूत लेजाण ने खैच रिया । बरस चवदा पनराक री पिउसंधी सिराणै ऊभी बाप री पीड़ा देख छटपटाय री । सारी ऊमर घोड़ा री पृठ माथै घर बसावणियो बिलोच प्राणां ने कंठा में अटकाय राख्या । वा पीड़ा ही सिकारपुर रा पठाणां सून व्हीयोड़ी हार । वीं वेइज्जती रो बदलो लेण ने पठाणां री घोड़्यां खोस ले आवा री घणी कोसीस कीधी परा जतरी दांण गियो, नाक रगड़तो, खाली हाथां पाछो फिरणो पड़चो । पिउसंधी बीरा मन रा दुख ने देख री, बाप रा माथा पै हाथ फेरती बोली, “तुस्सांभे जीव नून चैण रक्ख ।”

कांगड़ो बिलोच, घणी पीड़ा अर निरासा रा आंसू भरचां बोल्यो,

“अस्सांभे पुत्तर नीं, पुत्तर होय तो सिकारपुर पठाणां दी घोड़ी ल्यावै ।”

वेटो नीं जो घोड़्यां लाय बाप रो बैर ले, ईं दुख सून बाप रो जीव नीं निकळ रियो है । पिउसंधी रा बिलोच रगत मे सरणाटो आयग्यो, लोही दौड़ग्यो । बाप रे साम्हे छाती तांणती बोली,

“मैंड़ा बोल सच्चा जांणै, जै तुस्सांभी पुत्तरी हूं तो घोड़ी ल्यावूं ।”

बूढ़ा बाप रे कानां में जाणी अमरत बरस्यो ।

“तो ला पंजा दे ।” हाथ लांबो पसारियो ।

पिनसंधी हाथ पै हाथ राख बचउ दीधो । सन्तोख री सांस रे सागै बिलोच रा प्राण उड़ग्या ।

पिउसंधी माथा रा केसां रो जटाजूट बांध्यो, माथै लपेटो बांध्यो । बाप रा घोड़ा पै जीण कस्यो । बाप रो तीर कवांण संभाळ्यो । बिलोच जवानां रे लारै सस्तर विद्या सीखै । रोज घोड़ो दौड़ावै । सारो दिन कवांण पै तीर चलावै, रात पड़्या विद्याणां पै सूती २ सपना देखै तो पठाणां पै तीर फँकवा रा । खावतां, पीवतां, उठतां, बैठतां तीर अर कवांण । ग्यान ध्यान सगळो तीर कवांण ! वा भूलगी के वा एक सोळा बरसां री सुदरी है । बीने चेतो ही नीं रियो के मिनख जाति रा अस्त्री अर पुरम दो भेद है । वा सोचती के वा कांगड़ा बिलोच रो बेटो है, बीरो मन कैवतो, वा बेटो है, आत्मा हूँकारो भरती वा बेटो है, दुनियां कैवती अर जांणती के या कांगड़ा बिलोच रो बेटो है ।

बाप री पोसाक पैरचां, बाप रा ही सस्तर बांध्यां, बाप रा घोड़ा पै सवार व्हे निकळती जद लोगां री आंख्यां बीरा मूंडा पै एक पल तो अटक ही जाती । नित री कसरत सूं कस्योड़ो सरीर, सूरज री किरणां री नाईं फूटतो मूंडा ऊपरै तेज । देखवा बाळा देखता रै जाता । बूढां रा मूंडा सूं निकळ जातो “कोई जवान है ।” जवानां री नजर बी सूं हट आपणै सरीर माथै बराबरी करण ने अपणै आप परी जाती अर दूजै ही पल पलकां भुक जाती । मांवां देखती तो एक अभलाखा मन में आय जाती, “म्हारो बेटो ही अस्यो व्हे ।” जवान स्त्रियां अपणै पति रा मन में मांड्या चित्तर में ईंरो रंग घोळवा लागती ।

पिउसंधी बिलोच जवानां रे सागै तीर चलाणै रो अभ्यास करती जद मजाल कांई के कोई ईं रा मुकाबला में आय तो जावै ।

कान तांई खैच'र तीर छोड़ती जद हजार पांवडा दूरो जाय निसाणो लागतो ।

दाना बूढा दाद देता, “ईं रां बाप रो तीर पांचसौ पांवडा पूगतो यो हजार पांवडा दूरा री खबर ले ।”

सांभ रो वगत, सूरज भगवान आपरी किरणां ने भेली कर घरै पधार रिया । आखा दिन डाळी डाळी फदक नाच'र पंछी घरां साम्हां मूंडा कीधा । सूरज री किरणां सूं सुनैरी रंग्योड़ी पांखां पसारचां लीला आभा रे नीचै उड़ रिया । घूंसाला में सूं छोटा छोटा मूंडा काढ्यां बच्चा मांवां रे आणै री “चूँ चूँ” करता बाट न्हाळ रिया ।

रेत रा टीवां रे ढाळ में, छोटी सी तळाई पै एक जुवान बैठ्यो, पाणी में भांकतो कांई सोच रियो । कनें ही एक मोटो हिरण मरचो पड़्यो, बीरी गावड़ में धंस्योड़ा तीर कनें सूं टपकती लोही री बूदां वताय री के अवार अवार ही सिकार कीधी

है। खेजड़ रे गोड़ सूं बंध्यो घोड़ो हींस रियो, तीरां सूं भरचो माथो जीण रा सिधाड़ा में लटक रियो।

टीवां रे पाछली कानी, मिनखां रे बोलणै री, घोड़ां रे टापां री आवाज सुण जवान ऊंचो माथो कीवो। टीवा रे ऊपरै ऊभो एक आदमी हाथ सूं आणै रो इसारो करतां आपरा साथ बाळां ने हेलो मारचो, “तळाई में पाणी है, आय जावो।”

घोड़ी ही देर में, कतरा ही तिसाया घोड़ां रा मूंडा पाणी सूं जाय लागा। आयोड़ा घोड़ा घोड़्या ने देख वीं जवान रो घोड़ो ऊंचो मूंडो कर जोर सूं हींसवा लाग्यो। आयोड़ा मिनख डोढी डोढी आंख्यां सूं वीं जवान साम्हां देखै, मन में केवै, रूप अर तेज रो अस्यो मेळ देखणै में नीं आयो, ईं सूरज री किरणां तो डूब री है अर ईं रा मूंडा सूं किरणां फूट री है। कुण व्हेला यो। एक सवार सूं रियो नीं गियो, जाणै कोई सगती वींने खैच'र वठै लेजाय री व्हे। घोड़ा सूं उतर वीरे कानी चाल्यो।

“काळेर तो ठाढो है, कठै मिल्यो?” सिकार करचोड़ा हिरण रे कानी भांकतै, सवार पूछ्यो।

“अगला ताल में। आओ बैठो विश्राम करो।”

या ही तो चावतो वो। सवार बैठ्यो, जवान सरक'र बिछयोड़ा जीण पै आधी जगां सवार ने दीवी। बातां व्हेण लागी। आपणी आपणी ओळखांण कराई।

“म्हंने भीमजी भाटी केवै, पाटण गांव रो हूं।”

“म्हूं कांगड़ा बिलोच रो बेटो।”

“आप तो सिव रा रैवासी हो, अठी ने कियां आया?”

“सिकारपुर जाणै रो मनसूवो है।”

“सिकारपुर जाणै रा मता सूं तो म्हे ही आया हां। पठाणां री घोड़्यां रो नाम तो आप ही सुण्यो व्हेला।”

“सुण्यो कांई वारी खातर तो अतरा दूरां सूं चाल'र आयो ही हूं।”

“आछो! घरणो आछो!” भीमजी राजी व्हेन्यो। आछो साथ व्हीयो। म्हारे साथै तीन सौ रतपूत है। आपरे साथै कतरोक साथ है?”

पिडसंघो भीमजी साम्ही मुळकती बोली, “म्हारा साथी तो म्हां हीज हां।”

कंथा रण में पैसकै, काँई जोवै छै साथ ।
साथी थारा तीन है, हियो, कटारी, हाथ ॥

ठाकरा ! म्हारा तो ये हीज तीन साथी है । तीन सौ कोनी ।”

भीमजी राजी राजी, साथ बाळां नें वठै हीज ठैर जाणै रो कह्यो । एक आदमी ने भेज्यो सिकारपुर पठाणां री घोड़्यां चरवा ने कठी ने जावै जीरो पतो लगायनै आवै ज्यूं ।

खबर लाया, घोड़्यां बीड में चर री है, दस बारा आदमी रुखाळी में साथै है । ये गया जो घोड़्यां ने घेरी, जो आदमी साम्हो व्हीयो बीरे माथा में मारी । रुखाळा भाग'र गांव मे जाय हाको कीघो, पठाण तीर कवांग ले घोड़ा पै सवार लारै रा ला रै भाग्या । घोड़ां रा खुरां सूं उडी खेह रो बादलो छायाग्यो । भीमजी कह्यो, “पठाण आयग्या है भट भागो ।”

“कोरा भाग्यां काम नी चालै, भीमजी, यां आवतां पठाणां ने रोको । एक काम थांरो, एक काम म्हारो । कै तो रुकनै पठाणां ने रोको, कै घोड़्यां घेर आगै बढो । बोलो भट ।” विलोच जवान दाकल कीधी । घोड़्यां घणी है, म्हां ले'र आगे बढ़ां, थां याने रोको ।”

“घणी आछी बात । याने एक पग आगै नीं देवा दूं, थां धीरै धीरै खड़ो, पाछलो सोच ही मत करजो ।”

भीमजी अर बांरा तीनसौ ही साथी घोड़्या घेर आगै बढ़्या । पिउसंधी कवांग पै तीर चढ़ाय, मारग में ऊभी व्हेगी । पठाणा रो भुण्ड, दांता सूं होठ चावतो, भाळ मे भरचो, घोड़ा दपटातो आयो ।

“ठैर जावो, वठै रा वठै, आगै पग दीघो तो मारद्या जावोला । जीरी ग्यारासौ पावडा तीर फैकवां री हिम्मत व्हे जो आगै आवजो ।”

लारै रो लारै तरण करतो तीर गियो । हजार पांवडा पै ऊभा एक पठाण री छाती में जाय गळ्यो । पठाणा रा आगै बढ़ता घोड़ा धीमा पड़ग्या । पठाण ताण ताण'र तीर फैकै जो कीरो ही तीनसो पांवडा पै पड़ै तो कीरो ही साढा तीनसो पावडा पै, हृद जो एक दो जणां रो चारसो पावडा तक पूग्यो । पिउसंधी पागड़ा पै पग दे ऊभी व्हे'र तीर फैकै जो हजार पांवडा दूरां ऊभा पठाणां रा जत्था में जाय जवानां ने बीधै । छाती बाळा दस बीस जणां, घोड़ा दौड़ायां आगै बढ़णो चाह्या पण गैला रा गैला में हीज पिउसंधी रा तीर बाने अर बारा घोड़ां ने ठिकारै राख दाधा । एक रो ही तीर पिउसंधी तक पूग्यो नीं ।

पठाए ढीला पड़ पाछा फिरया, पिउसंधी पाछै फिर फिर देखती जावै, घोड़्यां रे खोजां खोजां चाली ।

“वाह ! विलोच वाह !! कमाल करग्यो भाईड़ा आज ।”

“कमाल वमाल कुछ नी, भीमजी । लाओ घोड़्यां री पांती करां, आधी थारी आधी म्हारी ।”

“या किया होवै ? आधी थारी अर आधी म्हारी क्यूं ? थां एक म्हां अतरा ।” भीमजी रा साथ बाळा खलभलिया ।

“आधी क्यूं नीं ? आधो काम थां सगळा मिल'र कीधो, आधो काम म्हें एकलै कीधो । थां घोड़्यां घेरी, म्हें पठाणां ने रोक्या ।”

“या नीं व्हे, जतरा मूंडका वतरी पांती ।”

पिउसंधी ने आई रीस, कवांण पैं तीर चढायो “आय जावो सामने, जो जीतै वीरी घोड़्यां, सणण सणण करता दो तीनेक तीर खेजड़ा रा गोड ने आर पार करता निकल्यो । एक री छाती नीं चाली आगै आवा री । भीमजी घोड़ां री आधी पांती कीधी । एक सांड घोड़ो वत्तो । भाट्यां पाछो रगड़ो कीधो “यो तो म्हे ले जावांला ।”

पिउसंधी तो काढ तरवार वीं सांड घोड़ा रे कमर में भाटकी जो दो वटका । आपरी पांती री आधो आध घोड़्यां घेर वढी, पांवडा पचासेक तो गी अर पाछी फिरी । “भीमजी, लो ये घोड़्यां थां ही राखो । म्हांरे कांई करणो । लेणी ही जो ले लीधी, अवे थाने दीधी ।”

या कैतांई पिउसंधी तो घोड़ा रे एड लगाई, घोड़ो वायरा सूं वातां करवा लाग्यो । साथ बाळा देखता ही रैग्या ।

भीमजी साथ बाळा ने समझाया, “थां खोटी कीधी जो ईं विलोच ने नाराज कर दीधो । म्हां जावूं ईं ने राजी करूं । अस्यो वादर आडी वगत काम आवै । अस्यां सूरमा सूं वणांया राखणी चावै ।”

भीमजी लारै, खोज देखतो चल्यो जावै । एक वावड़ी गैला में आई । कांई मन में आई जौ भींत री कोचर में सूं भांक्यो । देखै तो ऊपरलो सांस ऊपरै, नीचै रो नीचै रैग्यो । विलोच जवान री जगां एक सुन्दरी पाणी में डील रगड़ न्हाय री, कर्ने पगत्या पै विलोच रा मर्दाना कपड़ा, तीर कवांण पड़्या । अतरा दिनां सूं आज एकांत जगां देख, पिउसंधी कपड़ा उतार न्हावण वैठी । कमर कमर तांई लटकता कैसा रे मांयने सोना रो सो सरीर चमक रियो । भीमजी री छाती नी पड़ी के ईंने

बतलावै, पाछा पगां फिरयो, सौ पांवडा दूरा जाय, खैंखारा करतो खांसतो खांसनो बावड़ी कानी आयो । अतरा में तो पिउसंधी कपड़ा पैर कबांण नै हाथ में नचावती बारै निकल ही गी । भीमजी आंख्यां में रस भरचा मुळकता लगा कह्यो,

“नाराज क्यूं बैग्या ? घोड़ा ही हाजर म्हूं ही हाजर । चालो गांव चालो, थां हुकम दो म्हां चाकरी करां ।” डोढी डोढी आख्यां करधां, मधरो मधरो मुळकतो, हाथ पकड़तो बोल्यो, “चालो ।”

“सांच साच कैदो, भीमजी, थां थोड़ी देर पैलां बावड़ी में आया हा काई ?”

“चाहे मारो चाहे जिवावो, या तरवार लो यो म्हारो माथो । जीवणों तो थारै साथै साथै, मरणो तो थारै हाथ सूं ।” भीमजी आपरी तरवार काढ पिउसंधी रे हाथ में भेलाण लाग्यो । “थारा हाथ सूं तो मरणो ही भीठो ।”

तरवार ने अलगी करती पिउसंधी कह्यो,

“म्हूं बिलोच मुसलमान, थां भाटी सिरदार थारै घर बाळा.....”

“भीमजी मूंडा पै हाथ राख दीधो “ऊं हूं” जांत पांत तो गुंवार देखै । रजपूत री जात वीरता । जो आंपां एक जात रा हां हीज ।”

मूंडा पै सूं हाथ दूरो करती पीउसंधी बोली,

“म्हूं टाबर ही जद म्हारी सगाई आंटा भील रे साथै व्ही, म्हूं वीरी मांग हूं, वो बैर लीधा बिना मानेला नीं जो सोच लीजो ।”

“वीरो काई सोच ! थाने मंजूर ?”

पिउसंधी रा गाल लाल व्हेग्या, नींची आंख्या कर मुळक दीधो । भीमजी ने लाग्यो जाणें आसमान में उड़ रियो है ।

अंधारी रात, हाथ सूं हाथ दीखै नीं, भरमर भरमर छांटा पड़ रिया । पिउसंधी अर भीमजी ढोल्या पै सोय रिया । कनें ही ढोलणी माथै पिउसंधी रा दो वेटा गहरी नीद में सूता ।

भीमजी तो नसा में, जो गाढा सूता पड़चा पण पिउसंधी ने नींद नीं । बीजली रो पल्लको पड़्यो, पल्लाका में पिउसंधी ने दीख्यो भींत पै चढतो दांतां में तरवार पकड़यां एक आदमी, पिउसंधी चमक गी, आंटे भील ! जरूर आंटे भील !! दूजो कोई नीं आंटे भील देख्यो बीजली रा पल्लाका में, पिउसंधी ने अर भीमजी ने एक ढोल्या पै सूता थका । नस नस में वासदी लागगी । “आज दोवां रा ही एक भटका में टुकड़ा करूं । घण्टां दिन व्हेग्या घात घालतां ने, नींठ आज मोको मिल्यो ।” धीरै धीरै पग बजायां बिना वो भींत सूं नीचै उतरयो ।

पिउसंधी ढोल्या सूं धीरै सी नीचै उतरी सिराणा सूं नांगी तरवार उठाय हाथ में तोल्यां ऊभी । सांस रोक राख्यो तरवार ने पूरी ऊंची हाथ में उठाय राखी । आंटी भील ज्यूं ही ढोल्या कनें आयो अर सोची के दोवां ने एक साथ ही बाढूं, जठा पै'ली तो पिउसंधी री तरवार आंटा भील पै पड़ी जो माथो दूट पगात्यां कानी गुड़ग्यो, घड़ वठै हीज ढोल्या कनें पड़ग्यो । लोह्यां सूं आंगणों आलो व्हेग्यो ।

तरवार ने सिराणै मेल पिउसंधी सोयगी ।

पाछली पो'र रा भीमजी रो नसो उतरचो, नीचै उतरचा तो लोह्यां में पग पड़चो, चप चप करता पग भरग्या, जाण्यो परनाळा रो पाणी भरचो दीखै, बोल्या, “रात अंधारी चीखलो”

भट पिउसंधी बोली, “आंटी बीखरियो”

मैं पिउसंधी भाटकियो, सो भीमो ऊवरियो”

जखड़ा मुखड़ा दोई वेटा ने पिउसंधी आप तीर कवांग चलावणो सिखावै, तरवार रा हाथ बतावै ।

गांव रे वारै, साथियां रे साथै दोई भाई खेल रिया । एक गुवाळ दौड़यो आयो, छाती में सांस नीं माय रियो, गांव साम्हों भाग्यो आवै । जखड़ै रोकतै लगै पूछचो,

“काई व्हीयो ? भाग्यो क्यूं जाय रियो है ?”

“ना'र ना'र, गाय ने मार रियो है, मोटो ना'र ।”

“कठै कठै ?” जखड़ै मुखड़ै साथै साथै पूछचो ।

“यो कनें ही ।”

“चाल, चाल बता” गुवाळ रे लारै जखड़ो व्हेग्यो ।

देखै तो ना'र गाय ने पकड़, छाती नीचै दवायां वैठचो, चारूं कानी भांक रियो ।

यां ने देखतां ही ना'र भपटचो, जखड़ै तो आवता ना'र रे साम्है माथै तरवार री भापटी सो भेजो खुलग्यो । “हो, हो” करतो ना'र जमीं पै ढळग्यो । पूंछ पकड़'र घोंसता लगा धरै लेग्या ।

भीमजी राजी तो व्हीया पण बोल्या, “ना’र सिंध रा धणी री सिकार है । ओलम्भो आवैला ।”

सांचै ही दूजे दिन तो सिंध रा नवाब रा सवार आयग्या, ना’र मारचो व्हे जीने हाजर करो ।

भीमजी जखड़ा ने ले नवाब रे कने गया ।

नवाब डपटतै लगै पूछ्यो, “ना’र कुण मारचो ?”

जखड़ो ऊभो व्हीयो, “म्हे मारचो ।” नवाब मूंडो देखतो रैग्यो । ईं दस वरस रा टावर रा निस्संक पणां पै अचंभो आयो ।

“क्यूं ?” नवाब सवाल कीधो ।

“ना’र गाय ने मार रियो जो वीने वचावा ने, दूजो बस्ती रे कनें आयग्यो ज्यूं, मारतो नीं तो मिनखां रो नुकसाण व्हेवा देतो ?”

नवाब चुप रैग्यो । माथा सूं लगाय एड़ी तक गौर सूं वीने देख्यो । लड़का रो डील, मूंडा रो तेवर, चेहरा रो रोव, बोलणै री हिम्मत । भीमजी कांनी देख्यो । भीमजी डील डील सकल रो तो आछो पण जखड़ा री तो वात ही और । नवाब सोच्यो, टावर कै तो मां पै व्हे कै बाप पै व्हे । यो जरूर ईं री मां पै है । ईं री मां ने देखणी चाहीजै, कसीक है ।

भीमजी सूं कह्यो, “ईं जखड़ा रो खेत बतावो, जीं खेत में यो नीपज्यो, वीने देखण री लालसा है । थां घरां जावो पण जखड़ा रो खेत बताणो ही पड़ेला ।”

भीमजी ढीला ढीला घरै आया । पिउसंधी पूछ्यो, “कांईं वात व्ही ? अतरा उदास क्यूं ?”

“उदास कांईं है, कै तो घर छूटैला कै मनख जमारा पै कळंक लागैला । और कांईं नीं व्हेणी है । नवाब जखड़ै रो खेत देखणै री जिद्द करै । म्हुं म्हारी लुगाई ने कीने वताऊं ? भीमजी उदास व्हे ढोल्या पै पड़ग्या ।

पिउसंधी वीं दिन भीमजी ने अमल रो दूणो गाळमो दीधो । भीमजी ने गैरो नसो व्हेग्यो, वांने सुवा देय पिउसंधी आपरी पुराणी पोसाक काढी, आपरा घोड़ा पै जीण कीधो । सुरज ऊगतां ऊगतां, नवाब रा दरवाजा वारै आय ऊभी री ।

चोबदार रे सागै अरज कराई कांगड़ा बिलोच रो वेटो आयो है, मुजरा री अरज करा वै ।

नवाव बुलायो, मुजरो कर अदव सूं वैठी ।

“थारो नाम ?”

“सिकार खां । आपरै सिकार री तारीफ सुणी है, म्हारे ही सिकार रो सोक है । सिकार पधारो तो सिकार खेलां, देखां अर दिखावां । सिकार करां अर करावां ।”

नवाव भट सिकार री त्यारी रो हुकम दीधो, करनाळ कराई, सिकारी कुत्ता साथै लीधा, हाथां रे बाज बांध्या, सिकार चाल्या ।

जठी ने पिउसंधी निकल जावै, वठी ने जिनावरां रो ढिगलो व्हेतो जावै । वीरा निसाणा देख देख, नवाव साबास, साबास करै । तीरां री मार देख दांता तळै आंगळी देय दीधी ।

सांभ ताई सिकार रम्या, घणो आणंद आयो । ना'र सूरां रो ढिगलो कर दीधो पिउसंधी तो । सामर, हिरणां सूं गाडा भरचा ।

पिउसंधी घरै जाणै री सीख मांगी । नवाव कह्यो, दो दिन और ठैरो । थारे साथै घणो आणंद रियो सिकार रो । काले और चालांला ।

पिउसंधी सलाम कीधी, “फेर दो चार दिन पछै हाजर वूला, आज तो जरूरी जाणो ही है । नवाव कड़ा सिरोपाव दे सीख दीधी ।

पिउसंधी घरै आई जतरै भीमजी ढोल्या पै पड़्या आळस मोड़ रिया हा । दूजे दिन तो नवाव रा सिपाही भीमजी ने आय ताकीद कीधी हीज जखड़ा रा खेत ने बतायै री । पिउसंधी कड़ा सिरोपाव भीमजी रे हाथ में दीधा, ये नवाव रे मूंडागे राख दीजो पछै वो खेत ने देखवा रो नाम नीं लेवै । भीमजी ने देखतां ही नवाव आंख्यां काढी ।

“एकला एकला आया ? म्हें देखवा ने कह्यो वा चीज कठै है ?”

“वा तो नजर गुजार कद की ही व्हेगी ।” भीमजी हंसते हंसते कह्यो ।

नवाव लाल पड़ग्यो, “भीमजी ! तमोज सूं बात करो ।”

“तमीज ही सूं तो कर रियो हूं । ये कड़ा सिरोपाव म्हारै पैरवाने है जाने ओळखो ।
कालै सिकारखां आप सूं मिल्यो कोनीं हो के ?”

नवाब अचम्भा सूं बाको फाड़ दीघो ।

“वाह रे वाह सिकारखां ! असी मां हीज अस्या पूत जणै । गाबड़ हलावतो, दूहो
बोल्हो,

भुंई परक्खो हे नरां, कांई परक्खो विंद ।

. भुंई बिन भला न नीपजै, कण तृण, तुरी, नरिंद ॥

घरती (मां) ने देखो । विना उत्तम घरती (मां) रे, तृण, घान चोड़ा अर नर
आछा पैदा नीं व्हे सकै ।

हंकार री कलंगी

“यां मरुं तो पूरो घोइयो घाल राख्यो है।” उदपुर रा मेलां में राणाजी मूंडागें वैठ्या परवान रे साम्हां झंकता बोल्या। बांरा ललाट पै चिता रा सळ पड़ग्या। आंल्यां में लंडा लंडा भाव भरग्या।

“घोइयो कांई घाल राख्यो है, अन्दाता, सारी मेवाड़ तवाह व्हेयगी। लूट मार सिवाय ये तो कांई करै ही नीं, गांवां में वासदी लगाता आगै बढै।” कनें वैठ्यो एक जणो बोल्थो।

“असी दुखसा तो दादसावां रा अर मुसलमानां रा हमला सूं ही कोयनी व्ही जसी यां मराठां रा उत्पात सूं व्हेगी है। वे लड़ता तो डंग सूं हा, ये तो जाणै कै तो वामदी लगाणो, कै लूटणो।” दूजे जणै हंकारो भरयो।

राणाजी रा मूंडा ऊपरला भाव और ही गंभीर व्हेग्या।

मराठां री फोज मेवाड़ ने बाळती, लूटती आगै बढ री ही जिए सूं मुकाबलो करणै री त्वारी रा सल्लासूत व्हेय रिया। रात आवी परी गी पण सोवा रो यो बगत योड़ो ही हो। खास खास काम करण्यां आदमियां ने बुलाय, बन्दोबस्त री सलाह व्हेय री।

“खजाना में रिपियो नीं, रात दिन रा कस्टां अर हमला सूं लोगों में भय अस्यो जमग्यो के मराठां रो नाम सुणतां ही गांव खाली कर कर मिनख भाग जावै। रजपूत पैलां सरीखा जोरदार रिया नीं जो छाती पै हाथी रा दांतां रा घमाका झेलै।” परवान जी सारी हालत पै गौर कर समझावता बोल्या।

कनें वैठ्यो एक सरदार तड़फग्यो, “रजपूत कांई रिया कोयनी? कदे ही पाछा रियां व्हां तो बतावो। वेटी रा बापां! गाजर मूळी ज्यूं माया कटाय रियां हां। पूरा पूरा दोयसो वरसा सूं मेवाड़ पै हमला व्हेता आय रिया है। पैलां मुसलमान अर

अबै ये मराठा । रात दिन रा जुद्धां सून म्हांरां घरां री कांइ दसा व्ही है जो गांवा में पघार'र देखो तो खबर पड़ै । एक एक घर में दस दस रांडां वैठी है ।”

राणाजी ऊंचो माथो कर ठिमरास सून बोल्या, “घरती रा घणी वाजै जाने तौ गाजर मूळी ज्यूं माथा कटावणां ही पड़ै । घणी वणणां सोरो कोयनी । बाप दादां री पीढ्यां री पीढ्यां ईं भोम री इज्जत अर मान सारूं काम आई, वीं भोम ने यां घाड़ायतियां रा हाथां सून लूटवा देणी के ? लुगायां रा माथा री ओढण्यां खैचवा देणी के ? वैठ्या बहन करणी है के काम करणां ? बोलो, सारा जणां भेळा व्हीया हो, कांई कांई वन्दोवस्त करणो ?

एक पल सारूं सारा चुप व्हेग्या । छाती पै चढ़ी थकी विपदा रो भीसण रूप सारा री आंख्यां आगै आयग्यो । कठै कतरि तोपां लगाणी । कीनें फोज मुसाहिब वणावणां, रिपिया अर धान रो परबंघ कठा सून अर किय तरह करणां, फौज भेळी करणी, सारी वातां पै विचार व्हेण लाग्यो ।

मेवाड़ रा सारा सरदारां रे नाम हुकम लिख्यो गियो ।

“सारा सरदार आप री पूरी जमीन अर पूरा ससतरां सूधी उदैपुर हुकम पोचतां ही हाजर व्हे जावै । देर नीं करै ।” हुकम रे ऊपरै राणाजी आप रा दसगतां सून दो ओळां लिखी, “जो हाजर नीं व्हेला बी री जागीर एकदम जव्त करली जावैला । कांई तरै री रियायत कोनी होसी । देस री विपद नी वेळा में हाजर नीं व्हेणां हरामखोरी मानी जासी ।”

सवारां ने हुकम रा कागद दे दोड़ाय दीघा ।

कोसीथळ रा कामदार रा हाथ में सवार जाय हुकम पकड़ायो, रसीद पाई कराई । वांच्यो, वांच्यो, वांचतां ही कामदार रो मूंडो उतरग्यो । कोसीथळ चूंडावतां री छोटी भी जागीर ही । वठा रा ठाकर दो तीन वरस पैलां एक भगड़ा में काम आयग्या । दो वरस रा टावर ने छोड़ग्या । ठिकारणां में नैनपण ! राणाजी रो यो करडो हुकम !! भगवान चोखी वणाई !!!

टावर ठाकर, री मां ईं वालक माथै आसां रा दीवा जोवती, आपरो रंडापो काट री ।

कामदार जनानी डोढी पै जाय अरज कराई, “भाजी साव ने अरज करो, जरूर वात अरज करणी है ।”

डावड़ी जाय कह्यो, “ठिकारै रा कामदार फोजदार डोटी पै ऊभा है। आप मूं मुंडामूं वात करवा ने हाजर व्हेवा री कै है।”

“माजी री छाती घड़ घड़ करवा लागी, “फेर कोई नवो दुख तो नीं आयग्यो।”

डावड़ी ने कह्यो, “वारणा पै पड़दो बांध दे, वाने मांयने बुलाय ला।”

बेटा री आंगळी पकड़, पड़दा रे सारै मांयने ऊभी व्हेयगी। कामदार फोजदार, मुजरो कर पड़दा सूं वारै ऊभा व्हेय्या। हाथ लांवां कर राणाजी रा हुकम रो कागद पड़दा में माजी ने भेलायो।

“अवै?” वांचतां ही माजी रा मूं डा सूं कोरा दो अक्खर ही निकळ्या। “अवै आप हुकम दो जो ही करां। ठाकरसा तो पूरा पांच वरस रा ही कोयनी व्हीया, चाकरी में लेर जावां तो किस तरै ले जावां।” माजी री नजर आंगळी पकड़नै ऊभा बेटा री काळी काळी भोली भोली आंख्यां सूं जाय टकराई। मां री ममता जाग गी। रूं रूं ऊभो व्हेय्यो, छाती में दूध उतरवा रो सो सरणाटो आयग्यो। लारै रो लारै “जो हाजर नी व्हेला वीरी जागीर जव्त करली जासी” हुकम री ओळां चळवळना खीरा री नाई आंख्यां आगै चमकगी।

मन में एक साथै कतरा ही विचार आयग्या। “जागीर जव्त हो जासी? म्हारो बेटो बाप दादां रा राज वाहिरो व्हे जावैलो। वीं री पांच भायां में कांई इज्जत रैवैला? वीं रे बाप नी रिया पण म्हूं तो हूं। म्हारे जीवतां जीव बेटा रो हक छूटै, धिरकार है, म्हारे मिनख जमारा पै। म्हूं असी खोड़ली हूं कांई जो पीढ्यां री भोम ने गमाय दूं। म्हारा वंस पै दाग नीं लागै?”

वींरी आंख्यां रे आगै एक तसवीर सी आयगी जांरै वीरो जवान बेटो ऊभो है, सगा परसंगी रोळ में मोसो मार रिया है, “ये लड़ाई में नीं पधारया सा जो कोसीयळ ने राणाजी खोस लीवी। हें हें हें! यां चूंडावतां ने आपरी वीरता रो घरां चमड है।” हुजे ही पल दांतां री कटकट्यां भौंचता बेटा रो नीचो माथो, नीची नजर व्हेती लगी दीखी।

माजी रा माथा में चक्कर आयग्यो। जवान व्हीयां बेटो ईं मां ने जतरो धिक्कारे थोड़ी। वाने याद आयगी आपरे बाप रा मूं डा सूं सुराणी जूनी काण्यां, लुगायां कसी कसी वीरतां सूं भगडा कीधा। अरे ईंज खानदान में पत्ताजी चूण्डावत री ठुकराणी अकबर री फोज सूं लड़ी, गोळियां री रीठ बजाय दीवी। पछै म्हूं क्यूं नीं जावूं?

ईं विचार सूं वांरा हालता मन में थिरता आयगी । नेत्र चमकिया । जीव सोरो व्हेग्यो । घरां ठिमरास सूं पड़रा री आड में सूं बोली, “घरियां रो हुकम माथा पै । करो, जमीत री तयारी करो । घोड़ा, आदमियां ने तयार होण रो हुकम दो ।”

“वो तो ठीक है । पण घरी बिना फोज कसी ?”

“क्यूं ? म्हुं हूं के घरी । म्हुं जावूं ला ।”

“आप ?” अचम्भा सूं कामदार अर फोजदार दोवां रा मूंडा सूं एक साथ ही निकळग्यो ।

“हां म्हुं । अचम्भा री काईं बात है । थारे ईंज घराणा में कतरी ठुकराणियां लड़ाई में भूँभी है के नीं ? थां कस्या जांणो कोयनी ? म्हुं कोई अणूती बात कर री हूं के ? पत्ताजी री मां अर वांरी ठुकराणी अकबर सूं लड़ता लड़ता मरचा कै नीं ? म्हुं ही वांरा हीज घराणा में आई हूं । म्हुं क्यूं नीं जावूं ?”

जमीत सजगी । नंगारा पै कूच रो डंको पड़्यो । निसाण री फरियां खोल दीधी । पाखर घल्यो घोड़ो आय ऊभो व्हीयो । माथै टोप, जिरह वस्तर रा काळा लोह सूं ढंक्का हाथ वेटा री कंवळी कंवळी वांहां ने पकड़ गोद में उठावा ने आगै व्ही । टावर सहमग्यो । बोली तो मां सरीखी अर यो अजब भेख रो आदमी कुण । गालां रे होठ अड़ातां अड़ातां मां री पलकां आली व्हेगी, “बेटा, यो सब थारै वास्तै, थारी इज्जत वास्तै ।”

एक ठडी सांस रे साथै वांरा होठ हाल्या ।

आगै आगै घोड़ा पै भालो भळकावतो फोज रो मांभी अर लारै लारै सारी जमीत उदैपुर आय हाजरी में नामों मड़ायो, “कोसीथळ रा फलाणसिघ चूंडावत मय जमीत रे हाजर ।”

हमलो व्हीयो । हड़ोल चूंडावतां री । हमलो करै तो पैलां हड़ोल वाळा ही आगै बढै अर सत्रुवां रो हमलो भेलै तो ही हड़ोल पै ही जोर आवै । सिधु राग गावण लाग्या । हड़ोल रे अधवीचै, चूंडावतां रा पाटवी सळूंवर रावजी ऊभा व्हे बोल्या, “मरदां ! दुसमणा पै घोड़ा ऊर दो । मर जाणों पण पण पाछो नी देणों । या हड़ोल मे रैवा री इज्जत, आपां पीढ्या सूं निभाय रिया हां, आज ईं आपणीं जिम्मेदारी ने पूरी निभावजो, देस सारुं मरणों अमर व्हेणो है । हां, खैचो लगामां ।”

एक हाथ सूं लगाम खैची दूजा हाथ में तरवारां तुलगी ।

मांझल रात

हड़ोल बाळां रा घोड़ा उड़्या जारे भेले माजी घोड़ा ने उड़ायो । खचाख सरे व्ही ।
तरवारों रा बटका व्हेण लाग्या अर मायां रा भटका ।

माजी री तरवार ही पळका लेय री, एक जणां पै तरवार रो वार कीघो, वीं फुरती
सूं वार ने हाल पै भेल पाछो भालो मारयो जो पांसळी ने पोवतो लगो वार
निकळयो । माजी री रान झूटगी साय रे साय घोड़ा सूं नीचें ढळक्या । -

सांभ पड़ी । भगड़ो वंद हुयो । वेत संभाळवा लाग्या । घायलां ने उठाय चठाय पाटा
पींड करवा लाग्या । लोह री टोप सूं वारें केस लटक रिया । पाटो बांधवा ने हाथ
लगायो तो देखै लुगाई । वठै रा वठै ठवक्या रैय्या ।

“या कुण अर क्यूं ?”

राणाजी ने अरज व्ही,

“घायलां में एक लुगाई पूरा वीर भेस में मिली । नाम पतो पूछां तो बतावै नों ।”

राणाजी गिया । लोह री टोप नीचें गज गज लांडा केस लटक रिया, लोयां सूं
भर्या चिपक रिया ।

“सांच सांच बतावो नाम ठिकारों । छिपावो मत दुसमण व्हेला तो ही मूं थारो
आदर करूं । म्हारे वेन ज्यूं हो ।”

“कोसीयळ ठाकर री मां हूं अन्दाता” माजी बोल्या ।

“हैं ! राणाजी अचम्भा सूं कूदया । थां लड़ाई में क्यूं आया ?”

“अन्दाता रो हुकम हो । जो लड़ाई में हाजर नों व्हे जीरी जागीर जव्त व्हे जावेला
म्हारे टावर छोटो है । हाजर नों व्हेणो मालकां री अर मेवाड़ री हरामखोरी
व्हेती ।”

कहणा अर गुमान रा आसूं राणाजी रे आंख्यां में झलक गिया । “बल्ल है यूं !”
राणाजी नदगद व्हेया । “यो मेवाड़ बरसां नूं आन राख रियो जो थां जसी देवियां
रो परताप है । थां देवियां म्हारो अर मेवाड़ रो मायो ऊंचो कर राख्यो है । जठ
तक असी मांवा है जतरै आपां रो देस पराधीन कोनी व्हे ।”

ई वीरता री एवज में, थाने ईज्जत देणों चावूं, दोलो थां ही बतावो, जो थारो
इच्छा व्हे ।”

माजी सोच में पड़ग्या, कांई मांगै, कोई इच्छा व्हे तो मांगै ।

वांरी आंख्यां आगै बेटा री बे काळी काळी भोळी भोळी आंख्यां फिरगी । मां री समता भटको खाय जागगी ।

“अन्दाता राजी हो अर मरजी हीज है तो कोई असी चीज वगसावो जीसूँ म्हारो बेटो पांचां में ऊंचो माथो करनै बैठै ।”

“हूँकार री कलंगी थाने वगसी जो थांरो बेटो ही नीं पीढ़्यां लग या कलंगी पैर ऊंचो माथो कर थांरी वीरता ने याद रखावैला ।”



हाड़ी राणी

रूपनगढ़ रा रावळा में अचाणचक सण्णांटो व्हेग्यो । सीळो वाजतो वायरो जांणै तातो व्हेग्यो व्हे । डावड़्यां रा छमछम वाजता घूघरा थम गिया । गादी पै बैठी राणियां रा मूंडा घोळा पड़ग्या । वायरो करती दासियां री मुठ्ठी में वींभणी री डांडी यूं री यूं रैगी ।

श्रीनाथजी रा मंदर में आरती रा दरसण करता राजाजी रा हाथ में वादसा ओरंगजेव रा हुकम रो कागद पकड़ायो । हुकम बांचता बांचता राजाजी री आख्यां आगै काळा पीळा आयग्या ।

हुकम कांई हो, जहर रो प्यालो हो, जीरी घूंट नीं तो गळा नीचै उतारणी आवै अर नीं थूंकणी आवै ।

राजकंवरी चारुमती रे साथै ओरंगजेव रा व्याव रो पैगाम ! कोरो पैगाम ही नीं हुकम अर जुल्मी हुकम, तिथि समै सब निरुचै ।

एक कानसू दूजा कान में गी, दूजा सू तीजा में । मरदां री रीस सू मुट्टियां बंधगी, वूढां रा सरम सू माथा नीचा भुकग्या । कै तो ई अपमान री कड़वी घूंट ने नीचो माथो कर गळै उतारणी कै काळ ने नूतणों । रणचंडी री तसबीर आख्यां आगै फिरगी । कायरां री छाती घड़घड़ करवा लागी । चारुमती सुण्यो, काची केळ ज्यूं कांपगी जांणै बीजळी पड़ी । रीस सू राती पड़गी ।

“वेइज्जती री कोई हद व्हे ? वादसा लुगायां ने समझ कांई राखी है ? वे कोई खेलवा रो खेलकणो है ? इज्जत ही लुगाई रो संसार में सब सू अमोलक धन व्हे । मरजाणों मंजूर पण इज्जत रे साथै । वादसा रो यो जोर जुलम कदे ही मंजूर नीं ! नीं !! नीं !!!

चारुमती बीफरगी । माथा री नसां तंगणी । छाती में सांस नीं मावै । बाप ने साफ नां केवाय दीघो “मरजावूं पण वादसा ने नीं परणू ।”

अपमान सूं दाइयोड़ा, नीचो माथो घाल्यां, कसक ने कालजा में दबायां, बाप गळगळा व्हे समभाण लाग्या, “वेटा, थूं केवै जो सारी सांची है परण वता ओर उपाय कांई है जो म्हुं करूं ? आलमगीर री फोजां सूं टक्कर लैण री आपां मे तागत नीं । बीरी एक पलटण आपणां सारा सैर ने उजाड़ देला । हजारों घर वरवाद व्हे जावैला । थारा जसी सैकड़ां बहू बेट्यां रांडां व्हे जावैला अर बां पै जो सिपाही जुलम करैला वो तो सोचणी नीं आवै ।”

हमेसां अदब सूं भुकी रैती वे आंख्यां आज पूरा जोर सूं तंणगी, हाथ जोड़ नरमी सूं बात करवा बाळी चारुमती, छाती तांण साम्ही ऊभी व्हेगी ।

“जुलम, वेइज्जती भेलवा सूं तो वरवाद व्हे जाणो आछो । ओरत री इज्जत सारूं थां नी मर सको तो मत मरो, म्हुं जीवते जीव कदे ही नीं मानूं ।”

थां अतराजणां हाथां मे तरवारा लीधां फिर रिया हो, वयूं नीं एक झटको म्हारे माथा रे मारो ? सारो भगड़ो ही खत्म व्हे जावै ।”

हरणी जसी आंख्यां में आंसू भरचां माथो आगो कीघो ।

“थूं नीं जांणै ईं रो नतीजो कांई निकळ ही ।” गलानि अर अफसोच सूं राजाजी माथो पकड़ बैठग्या ।

चारुमती ने अत दीखै नीं गत । दिन पनरा रैग्या । पैरवा रा गावा बैरी व्हे रिया जांणै खीरां पै लोटै । भीत पै टंग्योड़ा दरपण साम्ही नजर पड़ी । मूंडा रा परतीबंव सूं दरपण भळमळाय उठयो । चारुमती मूंडो फेर लीघो । एक ठंडी सांस काळजो चीरती निकळगी, “यो रूप ही पापां रो फळ है । पैली पदमणी ने बाळी, अवै म्हारो ओसरो है ।”

लारै री लारै याद आई पदमणी री इज्जत सारू माथा कटावण्यां बीरां री ।

रूम रूम ऊभो व्हेग्यो । “आज वा री वा म्हारा में वीत री है परण मरवा बाळो कोई है ? बीरी आंख आगें चित्तोड़ रा सूरमा चमक गिया । लारै री लार राणा राजसिंघजी री तसबीर आंख्यां आगै नाचगी । जोतदान रा चित्तरां में राणा राजसिंघजी र्हे जीं दिन बीं चित्तर देख्यो हो तो देखती रैगी । कस्यो रोवदार चेहरो, आंजस सूं भरचा नेत्र । वारी वीरता री काण्चां, ओरंगजेब सूं अड़वा री वातां बीं घणी दांण उछळतै काळजै सुणी ही । राजसिंघजी रा जस गीत याद आया ।

पदमणी सारूं लोहचा रा खाल बैवावा बाळा री संतान राजसिंघजी म्हारी रक्षा नी करैला ? जरूर करैला । ईं विचार सूं चारुमती री आंख्यां चमकगी ।

‘वे व्याव करले तो ?’ मीठा विचार सूँ कुँवरी रा नैए मिचग्या ।

“अस्या सूरमा परतावी पति सूँ वत्तो रजपूत री वेटी ने चावै काँई ? दो पल दूसरा ही जगत में चारुमती परी गी ।”

भट्ट कलम ले, राणा राजसिंघजी ने एक कागद लिख्यो, “म्हें आपने मन वचन सूँ पति अंगीकार कर लीया है । आप म्हुंने ले जावो । ज्यूँ किसन, रुकमणी री सिसुपाल सूँ रक्षा कीधी ज्यूँ ही अबै म्हारी करो । म्हुँ आपकी व्हे चुकी ।

“बोलो, अबै काँई करणो ?” दरिखाना में कागद बाँच राणाजी सारा सरदारों कानी पूछता नजर न्हांकी ।

कीरा ही तो हाथ मूँछों पै पड़ग्या, कीं री ही रीस सूँ अखियां में सूँ भाळां छूटवा लागी, कीरे ही रगत रो संचार वधग्यो । घणों करां रा मूँडा उतरग्या ।

“करणो काँई है ? है जो चौड़े है, वाईजी ने परण पधारो ।” एक जणो आगतो बोल्यो ।

“आगली पाछली सोच ने बात करो, दिल्ली रा घणी सूँ लोहो लेवणो है ।” दूजे थोड़ी सोच‘र कह्यो ।

“दिल्ली रा घणी सूँ कदे ही अड़्या कोयनी हां काँई ? घणो व्हे ही मर जावां, और नवी बात काँई व्हेला ?”

वहच मुवाहिसो व्हेण लाग्यो । आप आपरी कैण लाग्या ।

“यो काम जाणों जस्यो सोरो नीं है ।”

“सवान लुगाई जाति री इज्जत रो है ।”

“घर री तागत देखणी पै‘लां जरूरी है ।”

“सरण में आया री रक्षा करणों सब सूँ मोटो घरम है ।”

राणाजी कह्यो, “फळ ईं रो चावै जो व्हीजो । मरणो एक दांण है, आगै कै पाछै । लुगाई री बीणती टाळ दे वो मरद ही नीं । नारी रो अपमान नजरचां देखणों ही मवसूँ मोटो पाप है, जीवता जीव नरक भोगणो है । करो फोज री तयारी करो, म्हुँ परणवा ने जावूँला । थां फोज ले, दिल्ली रा गैला ने रोक्कां राख जो, व्याव नीं व्हे जावै जतरै । खबरदार, बादसा रूपनगढ़ री सीमा में पग नीं देण पावै । सळूवर रावतजी ने खबर भेजो, फोज मुसाहिबी रो जिम्मो संभाळै ।”

एक जगै अठीने उठीने भांक हाथ जोड़चा, “अन्दाता ! सलूँवर बाळा तो परणन काले हीज घरै आया है । बांरा हाथ रा कांकण डोरड़ा ही नीं खुल्या ।”

“हूँ” ललाट पै गैरा गैरा घणां सारा सल पड़ग्या विचार में थोड़ी देर डूबग्या, धीरै धीरै ऊंची गावड़ कर, घणां ठिमरास सूं वोल्या “आपां जीं जोखम ने उठावा जाय रिया हां वीं ने तो देखो । करतव भाटा सूं ही ज्यादा करड़ो व्हे ।”

एक लांबी सांस खैचता राणाजी धीरै मन ही मन में वोल्या, “आपणां देस री मान मरजादां राखवा सारू थां कतरा कतरा बलिदान कीधा है ।” आखी उमर जुद्धां में रैण्यां राणाजी रो आख्यां में ही पाणी आयग्यो ।

सलूँवर रा गढ में राग रंग रा फुंवारा छूट रिया । सरणाई में वधावा वनड़ा गाईज रिया । लुगांयां रा भूमका रा भूमका अठीने वठीने गोटा कांगरी री ओढाणया ओढचां फिर रिया । नीचै बैठी डोलणियां मांड में दूहा देय री । ऊपर मे'ल में मखमल री गादी पै मनसद रो सहारो लीधां रावत रतनमिघजी बैठचा, कनें ही नवी परणी वीनणी हाड़ीजी, लाल परणेतू पोसाक अर लाल हाथीदांत रो चूड़ो पैरचां बैठचा । हींगलू री पोट सरीखा लाल हीठां री भाई, वीं रूप री राणी रा गालां री लाली ने और ही गैरी कर री । अतर रा दीवां रा भलमल करता चानणा मे, कंचन सरीखा रंग दूणां दूणां दमक दमक जावतो । रावतजी एक टक वारे साम्हा चोघरिया, जाणै मंतरचोड़ो सांप भोला लेवै । बांरी तिसाई आख्यां एक ही नजर मे आखो रूप पी जावा ने आगता व्हेय री । वे हाड़ीजी साम्हा-भांक्या, वीं नजर रो अरथ समझनै लांबी लांबी कैरी री फांक जसी आख्यां लाज सूं नीची व्हेनी, भींणी भीणीं पसीनां री वूँदा आयगी । रावतजी रा लुभाया नैणां रो नसो चोगणो व्हेग्यो । हुकम री बाट में हाथ जोड़चां ऊभी डावड़ी चतरसाळा सूं वारै खिमकगी । वारै बैठी डावड़चां कलाळी उगेरी ।

कंवळा कंवळा कंवळ सरीखा हाथा ने हाथ मे ले नैणां रा प्याला सूं सारो रस ऊंधाता रावतजी वोल्या, “हाड़ीजी, थें म्हने मिलग्या, तिलोक री संपत मिलगी । नो निधि मिलगी । अबै काई नीं चावै म्हने ।”

पडूँतर देण ने हाड़ीजी रा होठ हाल्या पण बोल निकळचा नीं । नैण नीचा कीधां मन ही मन आणंद रा सागर में तिरवा लाग्या ।

“थां सरीखो रतन म्हने मिल्यो देखो मिनख तो काई देवता ही म्हारा भाग पै इसको कर रिया है । आवो म्हारा कनें ।”

आणंद रा भार सूं हाड़ीजी री आख्यां आधी मीचणी आयगी । अतराक में तो

डावड़ी, हाथ में परवानो लीधां मायने आई, झुकर कागद नजर करयो ।

“यो वगत है ?” रावतजी आंख काढ़ी ।

“तम्मा परयीनाय । उदैपुर सूं सवार आयो । जरूरी हुकम है ज्यूं तावेदार हाजर व्ही ।”

परवानो बांच्यो । जांगै आमा में चमकता चांद पै काळो बादळो आयग्यो व्हे, न्ळमळ करता दिवला री दाती पै गुल आयग्यो व्हे । मे'लां रा हंमता लगा थांभा पूमनुम व्हेग्या । रावतजी रो मूंडो पीळो पड़ग्यो ।

“बात काई है ?” हाड़ीजी हाथ सूं कागद लेतां बांच्यो । काळजो कटग्यो । नैणां में करणा री देवी जांगै सैंसरीर विराजमान व्हेयगी । यो अयाग नेह अर यो विजोग ! यो वंवर अर काचा सूत ज्यूं टूट्वा बाळो !!

रावतजी बैठ्या रा बैठ्या रंग्या जांगै पाखाण री पूतळी व्हे । घणी देर पछै हाल्या ।

“लड़ाई में मूं नीं जावूं ला ।”

हाड़ीजी आंख्यां फाड़्यां देखता रंग्या । कांतां पै भरोसो नीं आयो ।

“नीं मूं नीं जावूं । यांने छोड़ कठै ही नीं जावूं ।” कांपता कंठा सूं बोल निकळ्या ।

हाड़ीजी सनस्ती, “म्हारो मोह यांने जावा नीं देव ।”

नैणां री कोरां में पाणी भरग्यो । मन तो कह्यो हाथ पकड़ अठै ही राख लूं परा आदमा अंतस सूं घक्को दीवो, रजपूत अर जुद्ध सूं मूंडो फेरे ? विककार !

हाड़ीजी पूछ्यो, “काई फरमा रिया हो ?”

“सांच कैय रियो हूं । यांने छोडणी नीं आवै ।”

हाड़ीजी रो दरप जाग्यो ।

“ये सबद आप रा मूंडा सूं सुण री हूं ? आज बरियां ने, जनम भीम ने आप री जरूरत है ।”

“जनम भीम रो मूं एकलो बेटो नीं और घणां ही है ।”

“आप जूंडाजी रा वंसज अर या कायरता ? जूंडावतां री बादरी री बातां घणी सुणी । या हीज है नीं आप लोगां री बादरी ? देख लीधी । कुछ री मरजादा रो

ध्यान है के नीं ? आप री सारी पीढ़ियां रणभूमि में सूती अर आप नट रिया हो । तवारीख में काई नाम मंडेला ?”

“तवारीख अर मरजादा री बातें थें म्हंने काई सुणावो हाड़ीजी, सब समझूं । कायर कोनी हूं, म्हारी वादरी री बातें सुणाणी व्हे तो म्हारा ई खांडा ने पूछो । अबार म्हारो धरम करम, मान मरजादा सब थें हो । सुरग नरक री चिन्ता नीं । म्हंने चिन्ता है थारी, कोरी थारी ।”

हाड़ीजी सुण्यो । काले अमीज नेह री बातें अमरत सू मीठी लाग री पण अबार वल्लवळता खीरा ज्यूं लागी । वीं ने याद आयगी, वां रे हीज भूवा जोधपुर जसवन्त-सिधजी री हाड़ीराणी री । वां भाग'र आया पति ने किला में कोनी घुसण दीघा । किला रा दरवाजा बन्द कर दीघा । “भाग्योड़ा पति रो मूंडो कोनी देखूं ।”

हाड़ीजी री सांस जोर सू चालण लागगी, रगत में उवाळो आयग्यो ।

“म्हारी चिन्ता मत करो । तरवार हाथ में पकड़ो । जीत'र आया तो अठै आरांठ करांला, मरग्या तो सुरग में म्हूं ही लारै री लारै आवूं ।”

“कतरा कठोर हो हाड़ीजी थें ।”

हाड़ीजी रो आवेग सू मूंडो रातो व्हेग्यो, “कायर पति ने बाध में घाल नै धर मे घाल्यां राखवा सू तो वीर पति री रांड व्हे जाणो लाख दांण चोखो ।”

रावतजी एक लाबी सास लेता लळचाया नैण सू भाक्या, “म्हूं तो जुद्ध में खैर आवूं ही हूं पण पाछा सू थारो काई व्हेला । थारा हथळेवा री मे'दी नीं सूखी ।”

हाड़ी तड़फगी, “म्हारो काई व्हेला ? लो यो वचन । आप जो लड़ाई में काम आयग्या तो लारै री लारै म्हूं सती व्हे जावूं ।”

रावतजी कूच री तयारी पै लाग्या पण अणमणा मन सू । तयारी करे पण जीव हाड़ीजी मे । घोड़ा पै सवार व्हीया, पाछा फिर फिरने भांकता जावे । हाड़ीजी रा गोखड़ा रे नीचें घोड़े निकळयो । घोड़ा री वाग खैब लीधी । ऊपर भांक्या, परणेतू पोसाक मे जीरा हथळेवा री मे'दी रो रग ही नी फीको पड़्यो, वे हाड़ीजी भरखा री जाळी मे बीजळी ज्यूं चमकता दीख्या । घोड़ो रुक्यो । हजुरी ने हेलो पाड़्यो, “जा हाड़ीजी ने अरज कर कोई सैनाणी म्हारे खातर लावे ।”

रावतजी री आख्यां गोखड़ा री जाळी सू आगै नीं डिगै ।

हाड़ीजी देख्यो, “यो मोह ! ये रण जाय काई फते करैला ? पीढ़ियां रा नाम रे काळो लागवा रा दिन है । उठी ने तो कायर पति रा उमीरां, म्हारी साथण्यां म्हंने सुणावैला, वठी ने चूंडावतां रा ऊजळा इतिहास पै पैली दांण यो कायरता रो दाग लागैला । ई सगळा रो कारण म्हूं । म्हारो मोह ही तो सगळा अनरथ री जड़

है।" बाने याद आयग्या वे हीज जोवपुर बाळा मूवा, हाडीराणी जो आपरा हाथां सूं पेट चीर ओरंगजेव री फोज रे लारै जुद्ध कर मरघा। "म्हूं ही तो वीं खानदान में जनम लीघो है।" अतराक में डावडी आय हाथ जोड़्यां बोली, "अन्दाता आप री सैनांगी मगावै, लारै ले जावा ने।"

"हां हूं थोड़ी वा तरवार भेलाजे।"

तरवार म्यान सूं काढ़ता बोल्या, "अन्दाता ने अरज कर दीजे, या सैनांगी तो ले पवारो जीं में आपरो जीव है वा आप सूं पैलां जाय री है। अब आप पाछा पग मत दीजो।"

या कंवतां ही हाडीजी तो तरवार ने हाथ में काठी पकड़ आपरी हीज गावड़ पै जोर रो भटको मारयो। तड़ाक देतां लोह्यां रा फुंवारा रै साथै माथो बम्म देणी को जमीं पै जाय पड़यो। जारौ चांद बरती पै टूट पड़यो व्हे।

राजसमंद री पाळ ऊपरला मेंलां री चानणी पै राजसिंघजी बांरी राणी चारुमती रे साथै ऊभा। नीचै नजर पड़ै जतरै तळाव रो पाणी पाणी दीखै। ऊपरै पूनम रो चांद चमक रियो, बीरो चलको नीचै पाणी में करोड़ करोड़ रूप वारण कर नांच रियो।

चारुमती उछाव, कल्या अर सरवा री तिरवेणी नैणां में भरघां, राणाजी ने पूछ री "हाडीजी आपरा हाथ सूं हीज आपरो माथो काट सैनांगी देय दीवी? पछै?"

"रावतजी आपो मूलग्या, बीरा कट्या माथा ने केसां री लट सूं आपरे गळा में बांध लीघो। छाती पर बांरो मुण्ड लटकतो रियो। जांगै बांरी आंख्या में भून लड़ रिया व्हे, हूजो मादेव रणभौम में उतर आयो दुसमणां रो गैलो रोकनै ऊभा रैग्या। एक आगळ पाछा नीं सरक्या, कटकट'र बांरा बटका बटका नीं व्हीया जतरै। अस्यो दृश्य कदे देख्यो नीं, सुण्यो नीं।" भरघा कंठा सूं राणाजी सुणायो।

"पछै?"

"पछै काई? बांरा परताप सूं थां अठै म्हारे कने बैठ्या हो।"

चारुमती रो सरवा सूं माथो झुक्यो, पलकां आली व्हेगी।

ऊगो भारणेज

रतनागर सागर हलोळा लेय रियो, गरजना कर रियो, लैरां रा टोळ रा टोळ उंछाळा खाय रिया, पाणी रा हड्डाटा लाग रिया, टापू पै वस्या, पाटण नगर रा गढ़ री भीत रे पाणी री पछांट लाग पाणी पाछो नीचै पड़ै । राजा अणतराय साखलो आपरी सभा लगायां ईं पाणी रा परकोटा ने देख देख मन में मावै नीं । आपरा लांबा चोड़ा परवार रे बीचै बैठचो वो पाटण री लंका सूं होड़ करै ।

जाजम बिछ री, जाजम पै सफेदभक चांदणी लाग री, भाई भतीजा सिरदार डावा जीमणां बैठ्या, आप गादी पै छतर छांगेड़ लगायां बैठचो, साम्हा साम्ह मरदंग मजीरा बजाता कलामत बैठ्या ।

बीच में सवासोक छोटा मोटा राजावां ने हाथां में हथकड़चां पैरायां ऊभा कर राख्या । वाने देख देख राजा ने भरम व्हेय रियो के वो सांचै ही लंकापुरी रा राजा सूं कम कोयनी ।

कैदी राजावां ने सलाम करवा रो हुक्म व्हीयो । सारा ही भुक्का । आज ही कोई नवी बात तो ही नीं, यो तो रोज सुबै रो नेम हो । नित रा कायदा रे माफग भूंगड़ा चांदणी पै बिखेरण री वगत व्ही घोळी घोळी चांदणी पै काळा काळा भूंगड़ा छांट दीधा । वापड़ा कैदी भुक्का, गोळ्यां टेक, नीचो मूंडो कर दांता सूं होठा सूं चुगवा लाग्या, जो नी भुक्को वी रे तीखी तीखी लोह री आरां चुभावता जाय रिया, पींड़ा सूं कळमळाय ज्यूं ही होठा में भूंगड़ा रो दाणां पकड़तो ज्यूं ही हंसी री लैर ईं कूणां सूं वी कूणां तक पूग जाती ।

चुगणै वाळा री आंख्यां में रीस, लाचारी गलानि अर सरम रा भाव राजा अणतराय रा दरप ने दूरां कर देता ।

“जाड़ेचा सरदार व्हेग्या है सूधा ।” एक सिरदार, एक कैदी राजा साम्ही आंगळी कीची ।

“तीन दिन री मरोड़ व्हे, चोये दिन सारा ही सूधा व्हे जावै अपणै आप ।”

“सारी गुजरात ने भेली कर नाथ दीधी है आपा । अबै बाकी रियो ही कुण है । सारा आयग्या ।” कैदियां ने न्यारा न्यारा गौर सूं गिरता राजाजी फुरमायो ।

“एक बाकी रियो अबै बस गिरनार रो राजा केवाट ।”

“हां” केवाट । याद आई, वीं ने बाकी क्यूं छोड़ो । “आज ही लावो” डावा जीमणां वैठ्या सिरदारां ने हुकम मिल्यो ।

परधान सुजाण साह हंसी कीधी, “ये जदी जावै जदी हजारों आदमी अर घोड़ां रो नास करनै आवै । म्हारा जस्यो व्हे तो बातां ही बातां में पकड़ ले आवै ।”

सिरदारां हाथ जोड़्या, “परधान जी ने हीज हुकम व्हे जावा रो । म्हे ही देखां, बातां ही बातां में पकड़ लागै रो चमत्कार ।”

अणतराय, परधान साम्हा फिर्या, “कह्यो जीने करलै वो मिनख व्हे ।”

“हाजर, सीख बगसाओ ।”

बाळद भरूं मजीठ की, कोडी न देऊं डांण ।

लावूं सरवरिया कुवाट ने, तो म्हें साह सुजाण ॥

सुजाण साह मुजरो कर विदा व्हीयो ।

“ऊगा भाणोज व्हे तो थां जस्यो । अदखी दगत में आडा आवण्या थोड़ा व्हे । थां कह्यो जो कर बतायो ।”

बादळां सूं बातां करता गिरनार पहाड़ रे गढ़ में राजा केवाट, आपरे भाणोज ऊगा राठेड़ ने वधाय रिया । बां पै व्हीया हमला में जीं चतराई सूं ऊगै खून खरावो करयां दिना ही मामला ने सम्हाळ, मामा ने वचाय दीधो, वीं चतराई पै मामा मुगध व्हे, ऊगा ने आपरे कनें गिरनार में राख लीधो ।

गिरनार रो ऊंचो पहाड़, वीं पै ऊंचो गढ़ जींरा ऊंचा गोखड़ा में ऊभा मामा भाणोज बन री सोभा देख रिया । तर भंरग पहाड़ ऊंडा ऊंडा खाळचा, भर भर भरता भरणां, नाचता मोरया, उछळता हिरण, जाणै देखवो ही करो । बांरा सरीर रे अड़ती लगी बादली अठी सूं आई वठी ने निकळगी, कपड़ा पै नमी रा सैनाण छोड़गी ।

नीच पहाड़ री तलेटी में लाखी दणजारो पड़्यो, घणो सामान बेचवा रो लीधां । बांरा डेरा साम्हीं आंगळी करता केवाट कह्यो, “भाणोज, ईं दणजारा कनें ढाल घणो बढिया, सुणी है ।”

“मंगवो मामाजी ! बुलावो भेजूं ?”

बणजारो आयो । ढालां नजर कीधी । वां में असल गैडा री एक ढाल । तरवारों रा वार कर परीक्षा कीधी, एक खुरडो पड़्यो नीं, रामचंगी रो गोळो ढाल माथे बाह्यो, रंग री चटक तक नीं उतरी । ढाल मामा भाणेज रे हिया में उत्तरगी ।

“बतावो ईं ढाल री कीमत काई ?”

“कीमत ? जो वसत पिराणां री रक्षा करे वी रो मोल ही काई ?” बणजारें चतराई रो उत्तर दीवो ।

“बा तो खैर है ही, परण मोल बतावो ।”

“मोल काई अरज करूं ? पसन्द आयगी तो म्हारी तरफ सूं नजर है । आपरा सरीर री रक्षा करैला तो मोल वसूल व्हे जावैला ।”

“नां नां” करता राजा रे हाथ में बणजारें ढाल नजर कर ही दीधी ।

“मामाजी या ढाल तो म्हूं राखूंला ” कैता कैता ऊगै, ढाल ने आपरा हाथ मे लेय लीधी ।

“यूं एक हाथ सूं तो ताळी मत बजावो, भाणेज ।”

“ऊगो तो एक हाथ सूं ही ताळी बजावै आप देख ही राखी है ।”

“यो तो खैर भाई बन्वां रो मामलो हो परण कदी अब्खी पड़ैला जद देखां, एक हाथ हूं ताळी किस तरै बजावो” मामाजी बोल्या ।

“बगत आबैला जद ऊगो बताय देला । नीं बतावै तो रजपूताणी रा नीं बूल्या ।”

ढाल री बगसीस रो मामाजी सूं मुजरो कर ऊगो नीचै उतरयो ।

मोको देख बणजारें अरज कीधी, “या ढाल ही आप सिरदारों रे अतरी पसन्द आई तो आप घोड़ा देखावो तो काई करो । एक तो जळहर घोड़ा है, पसन्द आवै तो आप रखावो ।”

“मंगवो अवार रो अवार ।”

बणजारें हाथ जोड़्या, “माफ करावो, अठें तो आय नीं सकै । वीं घोड़ा ने तो सदा ओढायां राखूं, खाली चार सूम सूम उघाड़ा रैवै । रोज घूप खेवीजै, लूण उतारीजै, पाणी पीवा तक ने वारै नीं काढूं, डेरा में ही पाणी पाऊं । मुलाहिजै करवा ने तो नीचै हीज पधारणो पड़ेला ।

केवाट सूं घोड़ा री तारीफ सुण रियो नीं गियो, वणजारा रे लारै वीरे डेरे गियो । घोड़ा ने देखतां ही मन राजी व्हेग्यो, असली जळहर घोड़ो, पुट्टा पै थाप देवतो, देखतो रैग्यो ।

“घोड़ो कांई है चीज है, थां कह्यो जीं सूं सवायो ।” केवाट रो मन वाग वाग व्हेग्यो ।

“मन तो राजी व्हेला आपरो ईं री चाल देख्यां ।”

“कसावो जीए ।”

एक घोड़ा पै केवाट अर दूजा घोड़ा पै वणजारो ।

“च्यार कोस दोड़ै नीं जतरै तो ईं री चाल ही नीं जमै । दोड़ायनै ईं री चाल तो देखावै ।”

घोड़ा छकड़ी करता दोड़व । लाग्या जांणै पाणी रो रेलो जाय रियो व्हे । च्यार कोस तांई एक पट्टी भाग्यां गिया ।

“ठैरो” री आवाज रे लारै पनरा बीसेक सवार ससतरां सूं सज्या केवाट रा घोड़ा रे घेरो देव दीघो ।

वणजारो घोड़ा सूं नीचै कूदयो, ठळोकळी करतो मुजरो कीघो, “खम्माघणी । म्हुं पाटण रो परधान हूं । पाटण पधारो ।” खणण करती केवाट रे हथकड़्यां पड़गी ।

“कर सलाम” ! कैदी राजांवां री ओळ में हथकड़्यां पैरचां केवाट ने अणतराय हुकम दीघो ।

“कांई वात रो मुजरो करूं ? मुजरो करावा रो सोक व्हे तो वेटी ने परणा, जमाई वणां जो सुसराजी ने मुजरो करूं ।”

जतरा रोव सूं अणतराय हुकम दीघो, वतरा ही रोव सूं केवाट जवाव दीघो । चांदणी पै भूंगड़ा विखेरचा, केवाट रे दीखी तीखी आर चुभाई पण नीं तो सलाम कीघी नीं भूगड़ा ही चुग्या । रोज सुबै या री या व्हे पण केवाट नमै नीं ।

अणतराय हैरान व्हे, एक कठपीजरा में केवाट ने वन्द कर दीघो । तीनूं पासै तीखा तीखा खीला गडाय काढ्या जो पसवाड़ो फेरचां चुमै, गैला रे माथै कठपीजरो मेलाय दीघो । आता जाता आदमी कठपीजरा माथै पग देता निकळै ।

“राजा आज दरीखाना में नीं पधारचा ?”

“नीं, कालै ही नीं पधारचा, रावळा में विराज रिया है ।”

“तीन दिनां सूं गैर मे’लां में हीज पोढणो व्हेय रियो है के ?” एक जगों धीरेक रो बोल्यो ।

ऊगै कह्यो, “जनाना में खबर करो, मन राजी नीं है कांई, बारै क्यूं नीं पधारचा ?”

पाछा आय खबर दीघी, राबळा में तो तीन दिन व्हेग्या पधारचा ने ।

खलभळो मचग्यो । एक दूजा ने पूछवा लाग्या । “बणजारा रे साथै घोड़ो दोड़ावा ने पधारचा जठा पछै री म्हुं नीं जाणू” खास खवास बतायो ।

“बणजारा रो डेरो ही बी सांभ ने लदग्यो ।”

ऊगो बोल्यो “गजब व्हेगी, धोखो । वैम अणतराय रो आवै, राजावां ने पकड़ पकड़ भेळा करवा रो बी घघो कर राख्यो है ।”

मैंगळ भाट ने कह्यो, “जावो पाटण में जाय नीगै करो । श्रीरां री तो पाटण में पूग व्हे नीं, पैरा रो इस्तजाम घणो करड़ो, भाट तो गावतो बजावतो, मांगतो खावतो परो जाय कोई पूछै नीं ।”

अणतराय सभा जोड़्यां, कैदी राजावां ने भूंगड़ा चुगाय रियो । जोम में भरचो आरां चुभाय रियो । कलामत गाणों कर रिया ।

मैंगळ भाट साम्हे ऊभो व्हे सुभराज दीघो ।

“राजावां रा मान ने मरोड़ण्यां, गढपतियां रा गरब ने गालण्यां, छत्रपतियां ने नमावणहार, राजा अणतराय आज रा वगत में थारा जस्यो कोई व्हीयो नीं व्हे ।”

अणतराय री जोम में चढ़ी आंख्यां ओर ऊंचो चढगी, “भाटराज, कठै रैवास ?”

“गढ़ गिरनार रो हूं ।”

“घर रा घणी ने सुभराज दे आया कांई ?” अणतराय घमंड में भूमतै पूछ्यो ।

“हाल तो दीघो नी, हुकम व्हे तो दे आवूं ।”

“हां हां जरूर, देख आवो, घण्यां री सोभा ।”

कठपीजरा कनै जाय मैंगळ भाट सुभराज दीघो । केवाट पीजरा में सूतै सूतै कुरव दीघो, वैठणी तो आवै नी पीजरा में ऊपर लांवा लांवा भाला लाग रिया ज्यूं । केवाट दूहो कह्यो,

मैंगळ ऊगा ने कहे, कठपींजर केवाट,
छाती ऊपर सेलड़ा, माथा ऊपर वाट ।

थूँ कहतो तिरण बार, ताळागढी वाळा धरणी,
ताळी हमें वजाव, एकरा हाथै ऊगडा ॥

“मैंगळ ऊगा ने कीजै केवाट कठपींजरा में पड़्यो है । माथा ऊपरै गैलो वैय रियो है । छाती ऊपर सेलड़ा लाग रिया है । ऊगा, थूँ कैवतो, एक हाथ सूँ ताळी बजावूँ जो अबै वगत पड़ी है, वजाव ।”

मैंगळ जो आंख्यां देखी सारी हगीगत ऊगा ने आय सुणाई ।

ऊगो, रावळा में आयो । मूँडागै थाळी पड़ी जीरे आंगळी नीं अड़ाई । वंधी कमर यूँ रो यूँ बैठयो, आधी रात व्हेगी पण ढोल्या पै पग नीं दीघो । अतरा ऊंडा सोच में पड़्यो के बीने खबर ही नीं के दो घड़ी सूँ गेहलोतणी बैठी बींरा पग दाव रो है । वठीने वो भांक्यो ही नीं । पग दबाय लीघा, ध्यान खैचवा ने मोकळो खांस लीघो, दीवा री वाती ऊंची नीची कर अंधारो उजाळो कर थाकी पण ऊगो ऊची आंख कर कठी ने ही नी भांक्यो । हैरान व्हे गहलोतणी बोली ।

“काई सोच में पड़्या हो ?”

“काई सोच में पड़्या हो ? सुण्यो कोय नी काई ? कोई कसर री है अबै ?” ऊगो चिगड़्यो ।

“आप सोच मत करो” गहलोतणी बोली, “मूँ वाळपणां में पाटण में रह्योड़ी हूं म्हारी मासी रे घरै, मूँ जाणूँ वठा री सारी हगीगत ।”

“वता वता” ऊगारी आंख्यां चमक गी । “जाणूँ जाणूँ जो वठा री सारी बात वता ।”

“एक तरकीब है, समंदर चारूँ कानी व्हेवा सूँ घोड़ा रे चारा री धरणी अबकाई रैवे, वठै रातव वारों तो घोड़ा ने धरणो ही खुवावै पण चारा रो तोड़ो रैवै जो वारां सूँ कोरड़ अर घोव मांगणी पड़े । घोव अर कोरड़ लेर जावो तो काम वण जावै ।”

“साबास रजपूताणी । म्हारा माथा री मोटी गाळ उतारी ,”

गहलोतणी और ही वठा री फोज फांटा, गैला घाटा, अणतराय रो सुभाव, उठगै बैठगै रो वगत सारी वातां वताई ।

पाटण रा गढ़ री पोळ कनें करसां रो साथ ऊभो ।

“राजाजी रे अरजाऊ आया हां” सुण'र पौळचे रोक्या नीं । आगै आगै करसां रो पटेल, लारै लारै करसा । गोडा गोडा ताई ऊंची विना पाण काढ़ी घोवत्यां, रेजा री

अंगरखी पैरचां । माथै पांच पांच हाथ लांबा पोत्या वांध्यां । हाथां में मोटी मोटी डांगा ले राखी । पटेल हाथ में ढाल तरवार लीधां, माथै पागड़ी बांध्यां, राजाजी कने हाजिर व्हीयो ।

पटेल करसां री बोली में बोल्हो, “राम राम, राजाजी, राम राम । समाज्या तो हो ?”

राजाजी बांरा गंवार पणां पै मुळक्या ।

पटेल बोल्हो, “म्हां करसा तो कांकड़ रा रोझ हां । बोल्हो, थोड़ो ही आवै माफ करियो ।”

राजा पूछ्यो, “कठै रैवो, अतरा दूरा क्यूं आया ?”

“माळवा रा रैण बाळा हां, आधी पांती देवां तो ही राज खैचल घणी करै । बैठ वेगार घणी ले । घणी रे आगै सुणाई नीं । सुणी एक थारे राज मे रैत ने सुख है, जो थां कने आया हां ।”

राजा कह्यो, “थां अठै वसो, आध में ही थारे रैवायत करांला । आछा खेत टाळने थांने देवांला ।”

अतराक में एक करसो, थोड़ा रा मूंडागै पड़्या चारा रो पूछो उठाय, पटेल ने देखावतो बोल्हो, “पटेल ! देखो, राजा रा थोड़ा अस्यो चारो खावै ।”

पटेल बोल्हो, “माराज म्हारे कनें घोव कोरड़ है, थां देखो ।” पांच दस पूछा काढ राजा रे आगै राख्या, भाई भतीजा सारा ही कोरड़ सराई ।

“असी घोव कोरड़ आपणां थोड़ा रे आवै जदी है ।”

“म्हांने आवा दो, बांरा ही मी'नां थांरा थोड़ा ने असी घोव सूं घपाय दांला ।”

“असी घोव कोरड़ थां म्हांके थोड़ा सारू देवता रैवोला तो आध में ही म्हें थांने रैवायत दांलां ।”

“म्हांरे लारै घोव कोरड़ लायां हां जो थांरा थोड़ा रे राखलो ।”

राजा राजी व्हे साळू री पाग बांधाय, पटेल ने सीख दीधी ।

“थांरे पोळयां ने कै दो जो म्हांने रोकै नीं कालै चारो लेय'र म्हां आवांला” जात जात पटेल कह्यो ।

समदर रे किनारे नावां लाग री । सातसो ही चारा रा भारा सातसो ही गांठां कोरड़

री बंधी लगी जां में ससतर छिपाय राख्या । सातसो ही आदमी गांठां ने ले नावां पै चढ पाटण में उतरचा ।

राजा, दरीखाने बैठ्यो, कोरड़ घोव लाय नजर कीधी, सगळा जणां सुवापंखी घोव रा भारा देखनै राजी व्हीया ।

“कठै न्हांखां ईं चारा ने ?” पटेल पूछ्यो ।

“बुरज मे”

भारा न्हांकवा ने गया, भटा भट भारा खोल तरवारां काढ़ी । एक दम अणतराय री सभा पैट्ट पड़्या । जाणै खेत काटवा लाग्या । राजा ने ढालां री ओट दे पकड़ लीधो । कोळाहळ मचग्यो । तरवारां री भणभणट केवाट कठपींजरा में पड़्यो सुणी, आणंद सूं उछळतो बोल्यो,

कोळाहळ कटकेह, कहीजै पाटण में किसो ।

भींक लागी भटकेह, आयो दीसै ऊगलो ॥

पाटण में सेना रो कोळाहळ व्हे रियो है । भटका री भींक लाग री है । जरूर ऊगो आयो है ।

रूंका वागी रीठ, भोट पड़ी माथां भड़ां ।

तोड़ण मामा त्रीठ, आयो दीसै ऊगलो ॥

तरवारां री रीठ वाज री है, भड़ां रा माथा पै भोट पड़ री है, मामा रा बंध तोड़वा ने ऊगो आयो दीखै ।

पाटण रा वींज गढ़ में सभा लाग री । पण आज कैदी गादयां पै बैठ्या है । अणतराय वींरा परवार नै सिरदारां सूधी हथकड्यां पैरचां, ऊभो । गादी मसनद पै चंवर छतर लगायां केवाट बैठ्यो, कनें ऊगो बेटा री जगां बैठ्यो । ऊगै हुकम दीधो,

“सगळा कैदी राजावां ने सलाम कर ।”

वींज सफेद चांदणी पै भूंगड़ा विखेरचा, “चुग” । वे हीज तीखी तीखी आरां अणतराय रे चुभोई । सलाम कराई भूंगड़ा चुगाया, ऊगै कह्यो,

“विना काईं कारण रे थें यां वेकसूरां ने अतरो दुख दीधो, जींरो फळ थांने मिलग्यो वसूला सूं कटाय थांरा टुकड़ा टुकड़ा करदे तो सजा थोड़ी । पण थनें माफ कीधो, या सजा मिली जो ही घणी ।”

सुजाणराय साम्हो भांक्यो, “क्यूं ? बता थनें काईं सजा मिलै ?”

परधान भट बोल्यो, “म्हारी काईं गलती ? जीरो लुण खावां वीरा हुकम री तामील करां । धरियां रा भला ने दोड़ां, अवै आप धरणी, आप हुकम देवोला जो ही करांला ।”

“थनें अर थारा धरणी ने छोड़ां परा म्हां कैवां ज्यूं कर । अणतराय री बेटी ने तो राजा केवाट ने परणा और दूजा सारा राजावां ने परवार री बेट्यां परणा ।”

दूजे ही दिन चंवरयां मंडायनै सगळां रा व्याव कर दीघा ।

ऊगै कड़ा सिरुपाव दे घोड़ा पै बैठाय, अणतराय ने पाछो पाटण देय दीघो । “म्हारा सगा है सगां री सी इज्जत व्हेणी चावै ।”

केवाट, ऊगा राठोड़ रा कांधा थपेड़ता कह्यो,

राठोड़ां री कुळ त्रिया, सीळा गरभ न धरंत ।

ज्यां भरतार न भज्जणां, सो भज्जणां न जणंत ॥

केवाट राजा ने अणतराय री बेटी अर दूजा कैदी राजां ने वीरा भाइयां री बेटियां ने परणाय, जवाईं वणाय सीख दीघी । जुहारी रो नारेळ भेलतां केवाट अणतराय सूं मुजरो कीघो, “सुसराजी, मुजरो । जवाईं वणनै मुजरो कर रियो हूं ।”

—————

डाढ़ालो सूर

एक समै री बात, आवू रा पहाड़ में एक डाढ़ालो नूर रैवै । सूर मूंडण नै बांरा च्यार छेवरचा ! आवू रो पहाड़ तर भंगर व्हीयो लगो, भांत भांत री वनसपती ज्योड़ी । जगां जगां पाणी रा भरणां वैंय रिया । सूर खूब चरै, आछा नरमळ पाणी में कलोळा करै, मूंडण अर छेवरचा रे लारै मस्त रै । घणां आणंद में दिन बीतै, आछो खाय खायनै सूर मच रियो । मोटी मोटी दांतळ्यां वारै निकळ री अर पेट जमीं के अड़ै । खांवता पीवतां, मौज करतां घणां दिन व्हेग्या पहाड़ पै मोटा मोटा हंख, झाड़ू सूं झाड़ू अड़ रियो, भगवान रे करणी जो बांस सूं बांस रगड़ाय बासदी लागी । बासदी लागी तो अत्ती लागी के आखो आवू रो मंगरो सळग्यो, हंख वळग्या, सारो जंगळ भस्म व्हेग्यो ।

खळ खळ बँवता लगा भरणां सूखग्या । आवू रो रूप ही कुरूप वैंग्यो । चरवा ने चारो रियो नीं, खावा नै वनसपती री नीं । मूंडण छेवरचां ने लीवा अठीने वठीने हळै पण पेट भरै नीं । भूखा पाछा आयनै थोह मांयने पड़ै । जदी एक दिन मूंडण बोली “भूखा कतराक दिन रैवां, यूं भूखां मरतां तो दिन काढ़णी आवै नीं, चालो कठै ही ओर कठै चालां जो पेट भरनै तो खावां ।”

डाढ़ालो सूर बोल्हो “एक जगां तो है, जठै खावाने ही घणो पण पाछा जीवता आवां के नीं ।”

मूंडण कह्यो, “भूखां मरतां मरां जींरी जगां लड़ता तो मरां । क्यूं जीवतै जीव यां छेवरचा ने भूखां मारो ।”

सूर कह्यो, “चालो सिरोही राजाजी रा राज में चालो, व्हो म्हारे लारै । आगं आगं तो डाढ़ालो सूर चालै अर पाछै पाछै मूंडण अर छेवरचा । आडै मंगरै उतरचा खाम खाम व्हेता आदू रे नीचै सिरोही रा राज में आया । देखै तो सांठा रा दाड़

ऊभा, जो गेहूँ आड़ै माळ ऊभा । हरचो पट्ट पड़चो कोसां ताई धान ही धान । भूँडण तो ले छेवरचा ने राजाजी री घर खेती में जाय वळी । भूखा ! जाय पड़चा खावा ने । खावो तो थोड़ो नै बगाड़ कीधो घणीं । पेट भरनै जाय सूत्या । खूब धान चरै, सांठा रा बाड़ तोड़ै । एक एक बिलांत घरती ने खोद दीधी । खाय खायनै मस्त व्हेग्या । एक दिन सूर तो चरनै भाड़ में पड़चो, भूँडण छाया में वैठी, छेवरचा रम रिया । अतराक में रुखाळा आया, देखै तो खेत ने तो ऊँघो कर राख्यो, सांठा भांग्या पड़चा, खेत खुदचोड़ो पड़चो, धान मरोड़चा पड़चा, छेवरचा रम रिया । रुखाळा ने आई रीस उठायनै एक भाटो फैंक्यो ।

भाटो फैंकणों व्हीयो नै तो छेवरचा खो खो ' करता रुखाळा रे लारै व्हीया । आगै रुखाळा नै पाछै छेवरचा, खेत बारै काड़ दीधो । रुखाळै जायनै दूजा रुखाला ने बुलाय लायो । दस वांस जणां लाठचां भाला गोफणां लीघां आया ।

गोफण भाड़ में बाही, भूँडण डकरनै निकळी, भूँडण व्ही लारै, भाला अर लाठ्यां हाथां री हाथां में रैगी । मार मार दूंडा री रुखाळा ने भगाय दीधा । ले छेवरचां ने चरवा लागगी ।

रुखाळा भांग्या भांग्या राजाजी कनें पुकारू गिया के एक डाढाळो सूर थोह घाल्यां वैठ्यो है । आगै देखै तो राजाजी तो रावळा में पधारचा थका । घोड़ा ने तो हरचा बाघ दीधा, सिरदारां ने घरै जावा री सीख देय दीधी अर आप रावळा में दो मीनां सारू दाखल व्हेग्या । हुकम देय राख्यो कोई खास काम व्हे तो मांयने अरज कराय दीजो । रुखाळा पुकारू गिया तो चोकी रा सिरदार कह्यो, “मायने राजाजी ने अतरीक बात री काई अरज करावां कोई गनीम चढनै तो आयो नी है । आयो तो सूर है, चालो सिकार आई ।”

मे'लां रा सारा ही सिरदार भाला ले जाड़चां बांध घोड़ा चढ़चा । जाय थोह ने घेरी । घोड़ा री कलहल सुणनै भूँडण भांकी तो थोह ने तो घेर राखी ।

सूरो सूतो भाड़ में, भूँडण पैरा देय ।

जाग निंदाळु सायवा, कटक हिलोळा लेय ॥

वट्टूकां रा फेर व्हीया, गोळियां छूटवा लागी, भूँडण रीस में आय बारै निकळी । घोड़ा रे साम्ही व्ही । भालां रा बार व्हेवा लाग्या, गोळचां री रीठ वाजवा लागी । भूँडण तो खोखारा करती रपटी जो घोड़ां ने दूँड सू उछाळती, सवारां ने धूळ भेळा करती अठीने वठीने निकळगी ।

भूँडण छेवरचां ने छाती रे लगाय बैठगी । घोड़ां रा भूँडा पाछा फिरग्या, चढ़नै आया लगा सवार आपरी पागड़चां संभाळता, फीका भूँडा कीधां पाछा फिरग्या ।

सूर, भूँडण छेवरचां ने लीधा खूब चरै, आणंद करै और घणां ही जणां सूर पै चढ़ चढ़नै आवै पण आपआप रा भूँडा लेयनै पाछा फिरै । सारा खेत ने उजाड़ काढ़्यो । राजाजी रा घोड़ा हरचा बंध्या जारे हरचा जौ कठा सूं आवै ? हवालो तो सूर चर रिया, रुखाळां रो जोर चाले नीं । मीना डोढ़ सूं राजाजी रावळा सूं बारै पधारचा, हुकम व्हीयो, “घोड़ा मुलाहिजा करावो । हरचा चरनै घोड़ा कस्याक निकळचा है ?”

राजाजी गोखड़ा में विराज्या, घोड़ा मुलाहिजा व्हेवा लाग्या । घोड़ा माता नीं दूवळा दूवळा दीख्या । राजाजी साहणी पै नाराज व्हीया, “अरे घोड़ा मच्या क्यूं नीं ?”

साहणी हाथ जोड़ अरज कीधी, “अन्दाता, घोड़ा मचै कठा सूं ? हरचा जौ तो पूरा चरवा ने ही नीं मिल्या । एक एकल सूर हवाला में बड़ रियो जीं सारा हवाला ने ऊंधो कर दीधो ।”

राजाजी तो रीस सूं बळग्या । रीस कीधी, “थां अठै अतरा भेळा व्हे रिया जो कांई काम रा, थां सब नाजोगा हो ।”

कोटवाळ हाथ जोड़चा, “परथीनाथ, यूं हुकम नीं व्हे । वीं सूर ने मारवा ने ये सगळा ही भड़ चढ़ चढ़नै गिया पण खाटल्यां में भर भरनै घायलां ने पाछा लाया । सूर कांई है काल रो अवतार है ।”

या सुणनै तो राजाजी ने घणीज रीस आई, हुकम दीधो, “करावो त्यारी अव्वार री अव्वार ! वीं सूर ने मारनै लावूं ।”

सिकार री त्यारी व्हेवा लागी । नगरां पै चोव पड़ी लुहार भाला सुधारवा लाग्या ।

एरण ठमक्को म्हें सुण्यो, लोहो घड़े लुहार ।

सूरां सारूं सेलड़ो, भूँडण सारूं भाल ॥

दूजे नंगारे पाखर मंडी । तीजो नंगारो असवारी रो व्हीयो । नगरा पै डंको पड़्यो, “कडिंग घींग कडिंग घींग” नै सूती लगी भूँडण चमकी । “डाढ़ाळा ! ये नंगारा आपां पै वाज रिया है । अवै खैर नी ।”

डाढ़ाळो बोल्यो, “भूंडण सोच मत कर वाजवा दे निसाण । आज थारा भरतार रा हाथ रण में देख जे ।”

डाढ़ाळो दांतळियां घिसतो घिसतो भूंडण ने कैवा लाग्यो, “आज कै तो मे'लाई में पदमणियां हीज रोवैला, कै म्हारो मांस हीज बटेला ।”

“काय रोवणू पदमणी, कै मंस बटाऊं हट्ट”

नंगारा पै रणताल वाज री, निसाण फरक रिया, रावजी सिकार पै चाल्या ।
नंगारखाना री सरणयां वाजी,

“सूरारिया रे धीमो मधरो चाल ।

भाखर रा भोमियां धीरो मधरो चाल ॥”

अठीने तो रावजी रा रसोवड़ा में सूरा रो मांस रांधवा ने सिल बट्टा पै वेसवार बांटवा लागी । वठीने डाढ़ाळो दांतळिया घिस घिसनै पांण लगावा लाग्यो ।

राजाजी सिकार चढ़्या । आगें आगें नौकरचा चाल्या, पाछै फोजां । अड़वी तासा वाजवा लाग्या । घोड़ा हणगाय रिया । हाथी भूम रिया । सिकारी भाला हाथां मे लीघां घाड़ां री बागां मरोड़ रिया । बाका मूंडा, रा घोड़ा एकी बेकी खेलता चाल्या, जाय जंगल ने घेरचो । हाको लाग्यो, हाका रा आदमी भाटा फैंकवा लाग्या, घोड़ां रो घेरो घाल दीघो, नग्का नाका पै हाथी ऊभा कर दीघा । भालां री अणियां सूं अणियां अड़गी ।

भूंडण बोली, “डाढ़ाळा ! सूतो काई है ऊठ थारे माथै कटक हिलोळा लेय रियो है ।”

डाढ़ाळो बोल्यो, “नचीती रै ! यां घोड़ां ने अबार टूंड सूं उलाळ फैंकू तो जाणजे थारो भरतार है ।”

तुरी उलाळू टूंड सूं, पाखरिया हजार ।

पाला मारू पांचसो, तो भूंडण भरतार ॥

भूंडण बोली, “डाढ़ाळा ! थोड़ो ठैर । दो घड़ी थारी भूंडण रा हाथ ही देखलै ।”
या कैर भूंडण रौद्ररूप कीधां । भाड़ वारै निकली ।

हाको व्हीयो, “आयो आयो ।”

मूंडा आगला रावजी ने अरज कीधी, “मुलाहिजो व्हे, वो एकल ऊभो।”

रावजी री नजर पड़ी, “अरे या तो मूंडण है, दांतळियां कठै ? फिट रजपूतां, ईं लुगाईं सूं थां लड़ लड़नै हारचा आज ताईं । डूव मरो रे कै !”

मूंडण तो घोड़ां माथै रपटी । बंदूकां रा भड़ाका व्हेवा लाग्या नै वरछां रा वार । वल्लम हाथां में लीधां घोड़ां ने छोड़चा लारै । मूंडण रे लोही भर रियो, डील में गोळ्यां गरक व्हेय री अर वा रपट रपटनै घोड़ां ने उलाळ री । घड़ी दीय ताईं मूंडण भूँभती री, लोह्यां सूं लथपथ व्हेगी, मूंडै भाग आयग्या । मूंडण तो कर हिम्मत नै दीधी एक दड़बड़ी जो घोड़ां रा घेरा ने फाड़ती थोह मे डाढ़ाळ तीरै जाय पूगी । ऊभी रै डील घंघूण्यो तो वरछां अर फाळां रो सवा मण लोह डील सूं उछट नीचै जाय पड़्यो ।

डाढ़ाळो वोल्यो, “साबास ! मूंडण साबास !! अबै थारा भरतार रा हाथ ही देखलै ।”

डाढ़ाळो आयो । टेकड़ी माथै ऊभो रैयनै फोज साम्हो भांक्यो । रावजी री नजर सूर माथै पड़ी । सिकारचां ने हेलो पाड़्यो,

“अरे, डाढ़ाळो ऊभो । खबरदार, जावा नीं पावै । जींरा कनें व्हेयनै थो बारै निकळ्यो बीने देस निकालो ।”

डाढ़ाळै मन में विचारी, “कीं वापड़ा री रोजी गमाऊं व्हे न व्हे तो रावजी साम्हो हीज जावूँ ।”

गावड फुलाय कान ऊंचा कर डाढ़ाळो तो लगाईं रवड़की । सूधो रावजी रा घोड़ा साम्हो । रावजी वल्लम उठावै उठावै जतरै तो घोड़ा रे पेट रे नीचै वळ नै ठोकी दूंड री, घोड़ो उछळनै पड़्यो दस हाथ दूरो, लारै रा लारै रावजी घड़ाक । “खमा खमा” करनै रावजी ने उठावा ने मिनख दोड़चा । घोड़ा रो पेट चीरणी आयग्यो । रावजी भट दूजा घोड़ा पै सवार व्हे लगाम खैची । अबै जुद्ध व्हेवा लाग्यो ।

साठ वरस रो तो सूर, पांच वरस रो घोड़ो अर पच्चीस वरस रो सवार । यांरो जदी जुद्ध व्हेवा लागै तो देखवा ने एक घड़ी सूरज रथ रोक दे वो गैदन्तो डकर डकरनै रपटै, घोड़ां ने दांतळ्यां सूं चीर न्हांक्या, पैदलां ने दूंड सूं उलाळ दीधा । हाथ्यां रे पगां वीचै निकळतो, जोर रो जुद्ध मचायो । घोड़ां रा मूंडा में भाग आयग्या, सवारां रे पसीनों टपक रियो, घायल कुरणाय रिया, डाढ़ाळो लोह्यां

में भगावोळ व्हीयो ऊभो । वीरी चंपा बरणी दांतळ्यां लोह्यां में लाल व्हेयगी ।

फोजां दल ने फेरनै, जीतण ऊभो जंग ।

चम्पा वरणी दांतळी, भरी कसूमल रंग ॥

गोळियां री रीठ वाज री है, बल्लमां रा फाळ डाढाळा रे डील में जगां जगां घंस रिया है । डाढाळो रपटै जांगै तोप रो गोळो छुट्यो व्हे । जठीने रुंगी मार'न निकळ जावै वठीने घायलां रा ढेर व्हेता जावै । साहजांही तोल रो दो मण लोह गोळियां रो नै फालरो डाढाळा रा डील में रैग्यो । यूं युद्ध करतां करतां सांभ पड़गी । डाढालो तो अंधारो पड़तो देख दे दड़वड़ी आपरी थोह आड़ी ने भाग्यो ।



लालजी पेमजी

भाटीपा में जसलमेर कानी एक लालजी भाटी रैवै ! वे चोरी नी कळा में घणां हुंस्यार ! आपरी जवानी रा दिनां में वां घणी हाथ री चतराई कीधी ! अवै बूढ़ा व्हेग्या पण मन में उछाह घणों, काम पड़ै तो अवै ही पांचसो कोस री मुसाफरी कर आपरी कळा ने बतावा ने त्यार । लालजी ने एक सोच घणों, आपरी दाई रा डोकरां साथै बैठ्या, निसासा भर कैवो करै,

“आजकाल रा छोरां में काई तन्त नीं । कोई हुंस्यारी नीं, फुरती नीं, चतराई नीं । कोई ई कळा ने सीखवा री हूस ही नीं राखें । सिखावां तो कीने सिखावां ? म्हारे बेटो व्हे तो दुनियां देखती अस्यो सिखातो ।”

घरवाळी डोकरी समभावै “पार रे दुख ये हूवळा क्यूं ? आखी ऊमर घणां ही बंधा कीधा, अवै तो रामजी रामजी करो ।”

पण लालजी तो ईं दुख मे ही घुल्य़ा जावै के या विद्या तो लुपत व्हेती जाय री है । म्हारी विद्या कोई सुपातर मिलै तो बीने सिखावूं पण यां पाछला छोरां में तो कोई ऊरमा बाळो दीखै ही नीं । अठिने वठीने नींगै करता रैवै । वांरा कान में पेमजी सेखावत रे नाम रो भणकारो पड़्यो । सुणी, पेमजी जुवान छोरो है, हुंस्यार है अर पांच सात जगां आछी चतराई रा हाथ बताया है । डोकरा रो जीव थोड़ो ठंडो पड़्यो चालो कोई बण्यो तो है । यूं घरती माता कसी बांभड़ी थोड़ी ही व्हे । लालजी रे मन मे पेमजी ने देखणै रा, बीरी हुंस्यारी पतवारणा री खांत घणी ।

डोकरी रै नटतां नटतां एक दिन आपरो काळो ऊंट पलाण ही लीघो । अमल रा ठामड़ा खड़िया में घाल सेखावाटी रा भारण में ऊंट रे एड़ लगाई ।

तिरकाल दुपैरी तप री । नीचै रेत तपै, ऊंचै आकास में सूरज तपै । गैला रे माथै, एक रूखड़ा री छाया में लालजी बैठ्या दुपैरी गाळ रिया । कनें ही ऊंट छाया में बैठ्यो चर रियो । आप जाजम विद्यायां बैठ्या, हुक्का री नेज ने पकड़्यां, धीरै

धीरै पी रिया, विसराम ले रिया । अमल रो गाळमो व्हे रियो । नीचै चांदी री प्याली पड़ी जीं में एक एक टोपा नितर नितर अमल रो पाणी टपक रियो ।

मारग में एक ऊंट खड़चो आवै । ऊंट कनें आयो । आवा वाळो छाया री जगां देख ऊंट जेखायो नीचै उतरचो । आपस मे जैमाताजी री व्ही ।

“पधारो पधारो, कठै विराजवो है ?”

“सेखावाटी कानी रैवूँ । आपरो विराजवो ?”

“भाटीपा मे ?”

“भाटीपा में ? घणी आछी बात म्हूँ ही बठीने ही जाय रियो हूँ । लालजी रो नाम घणो सुण्यो । वारी तारीफ सुण सुण मिलण री घणी इच्छा व्ही । देखां तो सरी कस्याक है ।”

“लालजी तो मिनख म्हने ही कैवै है” डोकरो मुळक्यो । “आपरो नाम ?”

“पेमजी”

“भली बात म्हूँ तो आपसूँ ही मिलण ने आय रियो हो !” उठ बाय में बाथ धाल मल्या । हुक्का री मनवारां व्ही । अमल पाणी कीधा । वातांचीतां व्हेवा लागी । दोवां रे ही एक दूसरा ने परखवा री अर आपरी चतराई बतावा री मन में ।

“चालो तो कठै ही चालां ।”

“पधारो, और आया कीं सारू हां ”

“थां जुवान हो, थां काई चतराई बताओ ।”

“आप दानां हो, पैलां आप ही बताओ ।”

“पेमजी, आपां चालां तो हां पण पैलां सुगन तो लेलां ।”

“देखो ईं रुंख रे माथै, वा कुड़दांतळी बोलै, वा अंडा सेय री है । बोलवा रो टूंकरो मारै जीरे सागै एक पल सारूँ या ऊंची व्हे भट पाछी अंडां माथै बैठ जावै । थें जाओ, चतराई सूँ ईं पंछी रा अंडा काढ लावो ।”

पेमजी उठ्या, ऊंट रा चार मीगणा ले रुंख माथै चढ़्या । धीरै धीरै पंछी रे कने गिया । ज्यूँ ही वा टूंकरो मारवा रे सागै ऊंची व्हे ज्यूँ ही अंडो तो उठाय ले अर मीगणां बीरे नोचै राख दे ।

पेमजी ने ऊपरै जावा देय, लालजी धीरै धीरै लारै रा लारै चढ़्या । ज्यूँ पेमजी

मींगणों मेल अंडा ने आपरी जेव में घालै ज्यू लालजी पेमजी री जेव में सू अंडो तो काढले अर मींगणों घालदे ।

एक ! दो !! तीन !!! चार !!!!

चार ही अंडा पेमजी री जेव में सू काढ, मींगणां घाल भट नीचै उतर आपरी सागी जगां, हुक्का री नेज ने मूंडा में घाल बैठग्या । जांणै कठै ही गिया ही नीं । पेमजी राजी राजी आया ।

“ले आया ?”

“हां” गरव सू माथो ऊंचो करता पेमजी बोल्या ।

“अै लो” जेव में हाथ घाल साम्हो कीधो ।

लालजी हंस्या, हाथ में मींगणां । पेमजी चकराग्या, “ओ काई व्हीयो”

हंसता हंसता लालजी आपरी जेव सू अंडा काढ्या ।

पेमजी सुगन बिगाड़ न्हांक्या, “खैर माल तो आवैला पण एक र हाथ सू निकळयां पछै ।”

ठै, ठै, ठै, ज्यू घड़ियाल रे माथै इंको पड़ै जीरे लारै री लारै खीलां माथै लालजी नै पेमजी हथोड़ा री मारै । रात रो बगत, बारा बजी, घड़ियाल पै बारा डका पड़्या अर बारा ही साख्या लाग्या । बारा र बारा चौईस डंका रे लारै रा लारै चौईस खीला गाड़ता अेमदावाद रा किला री भीत पै लालजी पेमजी चढ़ग्या । वठै घुमटा पै सोना रा कळसां काटै ।

आधी रात रो बगत, सारी दुनियां सोय री । किला रे कनें एक सुनार रो घर ।

“सुनारी, सुण, कठै ही सोना माथै करोत चाल री है, म्हूं जावूं नीगै करूं ।”

सुनार वारै पाछै लाग्यो, मसाणां में आया । सुनार मुरदां रे वीचै जाय सोयग्यो ।

“पेमजी, यां चारूं ही कळसां ने जमीं में गाडां जीसूं पै लां थां देखतो लो यां मुरदा में कोई जीवतो आदमी तो नीं सूतो है ।”

पेमजी रे हाथ में भालो । एक एक मुरदा कनें जावै अर जांघ में भाला री मारै । देखले, लोही तो लाग्यो नीं । मुरदा रो लोही कठा सू लागै । ज्यू ही सुनार रे भालो मारयो लोही सू भालो लाल व्हेणो ही हो पण सुनार वारै निकळता निकळता भाला रा फळ ने आपरा हमाल सू पूंछ लीधो । लोही लाग्योड़ो दीखै कठा सू ।

“सारा मुरदा है, कोई सोच नी, गाडो कळसां ने । कालै आय कळस काढ ले जांवाला ।”

पेमजी लालजी तो गाड खाना व्हीया । सुनार उठ्यो जो कळसां ने खोद, आपरे घर ले आयो ।

“कळस तो कोई लेग्यो, खाडो पड़्यो है”

“गजब व्ही । जरूर कोई मुरदां भेले सूतो देख रियो हो ।”

दिन ऊगतां जाय कचैरी में ठेको भरयो, सिवाय म्हाके, म्हाारी दुकान रे नगरी में कोई कांदो हळदी बेच नी सकै ।

सुनार धावां री बळत सूं तडफै । अतरी देर व्हेगी, सुनारी हालतांही पाछी आई नी कांई गैला में ही रैगी, अस्या कांदा हळदी समंदा पार परा गया के ।

“यो कांई रे, कांदा हळदी रो ही ठेको, फिरती फिरती थाक गी ।”

सुनारी बड़ बड़ करती आई ।

“हैं ? कांदा हळदी रो ठेको ? गजब व्हेगी, भारचा, जा दोड़ आपां रा घर रे बारै देख कोई नवो निसाण तो नी है, देख ।”

“पेमजी, घर रे निसाण कर आया ?”

“कर आयो चालो ।”

दोई जणां आया । देख तो वसी ही चोकड़ी रो सैनाण सारी गळी रे घरां पै लाग रियो ।

“ईंज हुंस्यारी पै घमंड खाता हा के ? देख ली थांरी चतराई । थां जाओ घरै, म्हुं देख लूँला ।” लालजी लाल लाल आंख्यां काढी ।

पेमजी नीचो माथो घाल ऊभो ।

घर घर रे पछवाड़ै कान लगायो । सुनार रे बळत, नींद नी आवै । पड़्यो पड़्यो कुरणावै ।

“यो घर अर यो मिनख । म्हाारी परीक्षा कदे ही गलत नी निकळै । लगावो सांतो माल काढां ।”

गैला फंटै, एक सेखावाटी कानी दूजो भाटीपा री दिसा में । लालजी पेमजी माल री पांती करै । दो दो कलस पांती रा लीघा । अवे सुनार रा माल री पांती करवा लाग्या । बराबर आधी आधी कीधी । सुनार वादसा री वेटी रा रमभोळ घड़्या, घणां सुवावणां, सोना रा घूघरा लाग्योड़ा ।

“या जोड़ी, फूटरी घणी, पांती करचां जोड़ खंडत व्हे जावेला, थां पूरी जोड़ ले लो, पेमजी ।”

“या कदी व्हे, पांती में तो एक एक ही आवेला, म्हूं अस्यो घरमहार नीं ।”

“मान जाओ पेमजी, घर में कलस व्हेला एक रमभोळ लेग्यां । म्हारी घरवाळी तो डोकरी है । कांई पैरै, थां लेजाओ ।”

“म्हारी लुगाई असी नीं जो म्हंने कांई कैवै । एक थारो एक म्हारो ।”

सोना रो ढेर देख, पेमजी री लुगाई हरखी नीं मगवै । सारो गैणो, पांती में आयो जीने भट पैरचो । पग ऊंचो कीघो पैरवा ने तो एक रमभोळ ।

“दूजो रमभोळ कठै ?”

“वो तो पांती में दूजा रे गियो ।”

क्यूं भूठ वोलो, कोई रांड ने देनै आया हो । म्हंने भोळावो मत ।”

घर में कलस व्हेवा लाग्यो । लुगाई तो अणखण ले सोयगी ।

“दूजो रमभोळ नीं आवै जतरै अन्न नीं खावूं ।”

पेमजी ने लालजी रा बोल याद आया । “अवै मांगू तो म्हारो कांई माजनो जांणै । छानै ले आवूं, म्हारा पै वम थोड़ो ही करै ।”

डोकरी पोसाक कर एक पग में रमभोळ पैर सूती जो जाय खोल ले आयो ।

‘दिन उग्यां देखै तो एक पग में रमभोळ नीं । लालजी ने रीस आई । म्हारी लुगाई रा पग में सूं काढ़नै लेग्यो । म्हारे ही साथै चोट ? मांगतो तो म्हूं यूं ही दे देतो । म्हें तो पेलां ही कह्यो यूं लेजा ।”

लालजी रीस भरचा विदा व्हीया । पेमजी री बहू राजी व्हे दोई पगां में रमभोळ पैर सूती । खेत सूं कपास आयो जो मेडी में पड़यो । लालजी कपास में वासदी भेली, पेमजी री बहू ने उठाय ऊंट पै लाद आपरे घर ले आया ।

“वासदी लागी, वासदी लागी” गांव रा मिनख भेळा व्हे बुभाई। पेमजी री व्हू तो वळग्या। पेमजी घरां रोया, विलख्या। किरया करम सारो करायो।

मीना छै: बोल्या। पेमजी दूसरा व्याव री सोची, आछी लडकी देखण ने नीसरचा।

भाटीपा कानी गिया, लालजी जाण्यां, चांने आपरे घरें बुलाया, ठैराया, व्हू मरगी, समाचार पूछ्या। पेमजी रोय रोय, वासदी में वळ मर जावा री हकीगत सुणाई।

लालजी ने हंसी आयगी, बोल्या, “थांने कह्यो हो पेमजी, रमभोळ ले लो पिछ्छतावोला। वा ही वात व्ही? लो संभाळो थांरी लुगाई ने। थां परणवा आया हो, या म्हारी वेटी है, लो परणो।”

पेमजी ने चांरी लुगाई सूपी अर घरां ही गैणो गावो दे वेटी ज्यू विदा कीधी।



जसमल ओडगा

ओडां रा डेरा रा डेरा गुजरात साम्हा खड़चा जाय रिया है। माळवा, मेवाड़, मारवाड़ सून ओडा ने गुजरात में राव खंगार बुलाया। राव खंगार एक मोटो तळाव खुदावा रो मनसूबो कीधो, अस्यो मोटो तळाव जो राव रा नाम ने अमर करदे।

देस देस रा ओडां ने घणी खतारी रा कागद दे'र बुलाया। ओड ओडणियां आप आप रा परवार सूधी, कोड सून भरचां गुजरात रो गैलो पकड़यो। रासबा पै आपणों असबाव लादचा, रात पड़चां तो रुख रे तळै सोय जावै, दिन में वातां करता, रासबा घेरता, तळाव रा सतुना बांधता मारग चालता जाय रिया।

माळवा सून ही ओडां रा डेरा गुजरात चाल्या। रासबां रा गळां में मोरपांखां में पोयोड़ा घूघरा भूमभूम वाजता जाय रिया। ओडणियां रासबा माथै बैठी गीत गावती गैलो काट री, कीरी कांख में छोरा छोरी रोय रिया, कोई कुदाळी फावड़ा ने सूधा सामती जाय री। राजी राजी हंसती बोलती गुजरात पूगवा ने आगती गैलै चाल री।

“अस्यो मोटो तळाव खुद रियो है के दो बरसां ताई तो गुजरात सून हालवा रो नाम ही नीं लेणो पड़ै।”

“दो बरसां ताई? अतरा दिन माळवा सून बारै गुजरात में रैणो पड़ैला? ये तो घणां दिन व्हे।” जसमल ओडणी केरी री फांक आख्यां में भोळप भरचां पूछ्यो।

“थून गैली है, वीनणी। गुजरात कांई अर माळवो कांई? आपारे मजूरी सून काम, जठै मजूरी मिल जावै जो ही आपणों देस।” रासबा रे टचकारी मारती एक अघकड़ सी ओडण बोलै।

जसमल पाछी बोलै तो नीं पण जाणै क्यून वीरो काळजो अणजाण्या में सून कांपयो।

जसमल ही तो तळावां री माटी खोदण वळी ओडणी । वाळपणा सूं कांई पींड्यां सूं माटी खोदण रो काम करता आय रिया । परा वीने देह्यां कुण कै या ओडणी ? रूप रा कंचन में सीळ री सुगंध ही । हिरणी जसी भोळी आंत्यां में सीळ रो सुरमो और ही रूप ने वधाय दीघो । ओडां रा फाट्योडा तंवूडा में वा बोलती तो लागतो जाणें वन में कोई वीण रा तार हिलाय गियो ।

तड़कता तावड़ा मे माटी खोदती, खोदती रे मूंडा पै पत्तीनो यूं लागतो जाणें कंवळ री पांखड़्यां पै पड़ी पाणी री वूदां ।

तळाव रो काम चाल रियो अर घणां जोर सूं चाल रियो । राव खंगार ने घणी हूस तळाव त्यार करावा री । ओडां रा डेरा रा डेरा रोज नवा नवा आवै । तळाव रे कनें ही आप रा तंवूडा तांण दीघा, सारो दिन ओड खोदै, ओडणियां रासवा भर भर होवै, टावरिया पाळ बांधै, कामैती वैख्या हाजरी मांडै, राजाजी दिन में दो दांण आवै, मन में आगत, कद यो तळाव यूरो व्हे ।

जसमल ही दूजा ओड ओडणियां रे लारै तळाव पै माटी खोदै, हेलां न्हांके । चांदी री घूघरियां लागी, ओडणी रा पल्ला सूं मूंडा रो पत्तीनो पूंछती तो घूघरियां रा छणकां लारै देखवा वाळा रा मन रा घूघरा वाज जाता । दोई हाथां में फावड़ो पकड़ माटी खणती तो दूरं सूं लागतो, वायरा सूं चंपा री डाळ भोला खाय री है । रासवा सूं माटी री भरयोड़ी गुणती उठायनै न्हाकती जद वीरी कमर बेंत री कामड़ी ज्यूं लुळ जावती ।

ऊनाळा में वैसाख रो मीनों दिन ढळ रियो, सांझ पड़वा आई । मजूरं छुट्टी कीधी, दिन भर रा धाक्या ओड ओडणियां आपग रासवा संभाळ्या, टावर कुदाळ फावड़ा कांवा पै मेल्यां डेरा कानी चाल्या, ओडणियां चूल्हा सलगावा लागी, कोई माथै घड़ा मेल्यां पाणी लावा ने चाली ।

सांझ रो वगत, सूरज भगवान अस्ताचळ रो गैलो पकड़्यो. तपी घरती निसासा छोड़ती ठंडी पड़वा लागी, पंछियां रा जोड़ा चांचां में चुगो भरचां घुंसाळा साम्हा उड़्या, घुंसाळां में वच्चा मूंडो काड़्यां चुगा री बाट देख रिया । आंथमणी दिमा री मंगरी डूबता सूरज री किरणां सूं पीळी पीळी व्हेयरी, वीरे नीचै भरी तळाई में सारस रो जोड़ो चांचां सूं पाणी उळीच रियो । लाल मखमल रो जीण कस्योड़ो, अवलक घोड़े सवार राव खंगार हाथ में सोना री मूठ री तरवार लीधां, दिन में तळाव पै हुयोड़ा काम ने देखतो देखतो वठी ने निकळयो ।

जसमल माया पै घड़ो मेल्यां पाणी लेवा ने आई, घड़ो पाळ पै मेल घूळा सूं भरचो मूंडो घोय री ।

राव खंगार री द्रिस्टि मूंडो घोवती जसमल पै पड़ी, द्रिस्टि ही जठै नी जठै अटकनी। हाथ री लगाम ढीली पड़गी, घोड़ा री लगाम रकगी, खंगार तो चित्राम व्हे ज्यूं ऊभो रैग्यो, नीं हालणी आयो नीं चालणी आयो। माटी सूं लयपय व्हीया पगां ने जसमल पाणी में धाल मसलया, भाटा पं एडी रगड़ी, लाल लाल एडी री भाई सूं पाणी गुलाबी गुलाबी व्हेग्यो। राव खंगार रो काळजो हालग्यो।

जसमल आपरे सहज भाव सूं पग घोया, मूंडो घोयो, कुरछा करया, घड़ो भरयो। राव बीरा रूप ने एकवार आंख्यां सूं पी रियो। जसमल अणजाण, भोळी, पवित्तर। राजा सोच रियो यो रूप ! यो योवन !! अर यो भोळापणो !!! कठं ही देख्यो नीं, कदे ही सुण्यो नीं। भारो रावळो गुललंजा सूं भर राख्यो है परा ईं रूप री तो छाया ही नजर नीं आवं।

ये माटी सूं लयपय व्हीयोड़ी एड़ियां ही असी लाल है तो रणवास रा गलीचा माथै ये पग फिरै तो कजाणां काई व्हे ? ईं ओढ़ण रा पान खायां विनां ही होठ अस्या लाल बूंद है तो तंबोळ चवायां तो यां होठां रा रंग ने मारणक ही कोनीं पगं।

तावड़ा में तपी लगी व्हेवा सूं ही ईंरो लाल पड़ी आंख्यां में अतरो उनमाद है तो आसा रो पियालो पायां नैणां में ललाई आवैला जद तो काईं गजब व्हेला।

मोटी रेजा री ओढ़णी में ही ईंरो अंग यूं लागं जाणै कवळ रो फूल भोला लेख रियो है तो जद या सोळा सिणगार कर राजसी ममनद पै वंठेला तो अपछरां ही लजाय जावैला। यो रतन भूपड़्यां में रैवानै घोड़ो ही विघाता सिरज्यो है, रतन तो राज मेलां रा सिणगार व्हे।

पवित्तर आतमा जसमल, माथै घड़ो राख'र चाली, काम सूं त्रिघ्योड़ो राव खंगार ही बीरे लारै लारै घोड़ो छोड़ दीघो। जसमल रा छोटा छोटा पग धूळा में मंडता जावै, बीरी कंकु वरणी एडी ने निरखतो लारै लारै खंगार चाल्यो। थोड़ी सी जसमल चाली। राव खंगार सूं रियो नीं गियो, आड़ो घोड़ो ऊभो करनै वोल्थो,

राजाजी वृलावै जसमल ओढ़णी ए,
जसमल ! मे'ल जोवण आव।
केसर वरणी कामणी ए,
थां पर रोझ्यो, राव खंगार ॥

जसमल चमकी, राजा ? कांपणी केळ रा हंख ज्यूं। संभळ'र हाथ जोड़्यां बोली,

काई तो जोव' थारा मे'ल ने ओ,
भूल्या राजा, म्हाने म्हारी सरक्यां रो कोड ।

राव खंगार बोल्थो, “म्हारा मे'ल देखवा नीं तो कुंवरां ने देखवा ने तो आ कदे
ही ।”

काई जोवू' थारा कुंवरां ने ओ,
भोळा भूपत म्हाने म्हारे ओडां रो कोड ।

जसमल यू' जवाव देतां ही आगै चाली । रावजी भट पाछो जसमल रो गैलो
रोक्यो,

राजाजी बुलावै ओ जसमल ओडणी,
ए जसमल ! राणियां जोवण् आव ।
आछी म्हाने लागै ओडणी ए,
जसमल थां पर रीझ्यो राव खंगार ॥

जसमल ने रीस आई वीं ऊपड़तां ही जवाव दीधो, “परजा ने विगाडू राजा ! थारी
राणियां ने म्हूं काई देखूं ?”

काई जोवू' थारी राणियां ने ओ,
भोळा राजा, म्हाने म्हारी ओडणियां रो कोड ।
रैत विगाडू रावजी ओ,
भोळा राजा ! भूल्यो भूल्यो राव खंगार ॥

राव खंगार फेरु' नीं मान्यो, वींज दंग री वात सुरु कीधी,

जसमल घोड़ला जोवणा घर आव
काजळ रेखी ओडणी ए
जसमल थां पर रीझ्यो राव खंगार ।

जसमल रीस सू' राती पड़गी । बीरा पतळा पतळा होठ धूजवा लाग्या,

“रावजी, थारा घोड़ा थारे घरै राखो, म्हारा गवेड़ा सू' ही म्हूं राजी हूं । गुणहीरा
राजा, यू' भूल रियो है, म्हने समझी काई है ?”

यूं कंती जसमल रावजी रा घोड़ा ने टल्लो देती आगै निकळगी । रावजी जाण्यो यू'

या वातां में नीं आवै । ईने लाळव देणों चावै । लारै लारै धोड़ा पै चाल्या, गैला में बीने केता जावै,

बसवा ने देस्यां हो जसमल धोरियो ए,
जसमल ! खिणवा ने देस्यां तळाव ।
आभै केरी बीजळी ए, जसमल !
थां पर रीझ्यो राव खंगार ॥

जीमवाने देस्यां जसमल वाजरी ओ,
जसमल ! दुवा ने देस्यां धोली गाय ।
सावण सुरंगी तीजणी ए जसमल,
थां पर रीझ्यो राव खंगार ॥

ओड खोदे ओडणी ठोवै ए,
जसमल ! भूलरिया तो बांधै पाल ।
सदा ओ सुरंगी ए जसमल,
थां पर रीझ्यो राव खंगार ॥

जीं दिन सूं राव खंगार जसमल ने देखी बीं दिन सूं ही घायल मिरग री नाई धूमै । ने'लां ने छोड़ दीघा, नवा खुवता तळाव री पाळ पै आप रा ही डेरा तरांय दीघा, कोई काम न काज, ओड ओडणी खोदै, जठै बैठ्यो रैवै । जसमल रो मोटचार देवर जेठ खोदै, जसमल बीरी देराणी जेठाणी गवा भर भर माटी लावनै गेरै । पनीनों टपकतो जावै, जसमल फावड़ा सूं माटी खोदै । राजा देखै अर अचभो करै, या अतरी मेनत कर री है । भूहारा दियोड़ा लाळव साम्ही नीं भांक री है । राजा धणी कोसीस बीबी पण जसमल तो राजा साम्हीं नीं भांकी जो नींज भांकी ।

राव खंगार भूलग्यो वो राजा है, जसमल बीरा आसरा में आघोड़ी परजा है । एक तो यूं ही राजमद ऊपर सूं काम रो मारघोड़ो । राजा ने चेतो नीं रियो के वो कर कांई रियो है ?

घन जीवन अर ठाकरी, तां पर अविवेक ।

ये चारुं भेळा हुवं अनरथ करै अनेक ॥

तळाव री पाळ पै बैठ्यो रैणो, जसमल सूं कांई न कांई मिस बात करणी बीने तो ।

जसमल माटी री ठोकरी उठाय ज्यूं ही पाळ माथै न्हांकी, खंगार बोल्यो,

थोड़ी थोड़ी ढोवो जसमल ! ढोकरी ए ।

जसमल ! पतळी कमर वल खाय ॥

सुरातां ही जसमल रे लाय लागी । वा पग पटकती पाछी फिरी, रीस री भाळ सूं हियो सुळग गियो, आंख्यां मे पाणी भरग्यो, पर कैवे कीने ? राजा ही यूं करण लाग्यो जद । रीस तो बीने असी आई के मार दे कै मर जावै । जसमल मरोड़ो खायनै जी वगत तो निकळगी पण जाती कठै ? पाछो आणो तो तळाव री पाळ पै ही पड़तो ।

माटी खोदतां ओडों ने कह्यो, 'चालो आपां अठा सूं चल्या चालां दूजा देस मे जाय मजूरी करां ।'

"हो, हो" करने सारा ओड हसवा लागग्या,

"गेली री वात सुणो । लागी मजूरी छोड़'र दूजी जगां चल्या चालां । राजा कतरो सुख आपां ने देय राख्यो है ।"

जसमल जाणै सुख देवा रो कारण कांई है ।

वा डरपती डरपती पाळ पै जावै, काम करै, पण बीरी छाती घड़ घड़ करती रैवै । राव रे रणवास में जायनै रैवा सूं तो आखो दिन मेनत मजूरी करनै पेट भरणो ही चोखो । सीळ ने गवायनै मे'लां रा सुखां माथै धूळो पड़्यो, आपणी भू'पड़ी भली । जसमल ने खंगार धराणै धराणी भोळाई पण वा सत सूं नीं डिगी । जसमल पाळ पै रासवा खाली कर री, खंगार लेर कांकरो मारयो ।

राजाजी बैठा है पाळ तळाव री,
जसमल ! चुग चुग कांकरड़ी सी वाय ।
मिरगानैणी मरवण ए जसमल,
थां पर रीभयो राव खंगार ॥

कांकरी री लागतां ही जसमल रे भाळ उठी, पाछी फिरतां ही बोली,

मत नां वावो राजाजी कांकरी ओ,
सामी राजा, देवै म्हारा देवर जेठ ।
अकल अलूणां राजवी ओ हरामी राजा,
भूल्यो भूल्यो राव खंगार ॥

“थें म्हारा धरणी हो, धरणी व्हे परजा री इज्जत लेवो । थाने लाज नीं आवै ।
हरामी राजा ! अकल राखो ।” जसमल रीस सूं कांप री, छाती सांस सूं ऊंची
नीची व्हेयरी ।

राव खंगार वीं सती री आतमा री आवाज नीं समझ्यो, वो तो वीं रूप पै और ही
रीभग्यो । वीरा सीळ ने नी कूंत सक्यो । वो समझ्यो या देवर जेठां सूं डरपै । हंसते
लगै पूछ्यो,

किसड़ै उगियारै थारो घर धरणी ए,
जसमल ! किसड़ै उगियारे देवर जेठ ।
तनक मिजाजण मोवणी ओ जसमल,
थां पर रीभग्यो राव खंगार ॥

जसमल आंगली उठाय माटी खणता सांवळा रंग रा मोट्यार ने, लाल दुमालो
बांध्यां देवर जेठां ने बतायां ।

राजा वारें साम्हें भांक मुळक्यो । जसमल आडी ने पांवड़ो भरतो बोत्यो, “बस,
यां सूं ही थूं डर री ही ?”

कैवै तो मरा दूं थारो घर धरणी ए,
जसमल ! कैवै तो मरा दूं देवर जेठ ।
ऊजलदंती ओडणी ए जसमल,
थां पर रीभग्यो राव खंगार ॥

राव खंगार हाथ पकड़वा लाग्यो, जसमल बीजळी री नाई तड़पगी ।

“खबरदार, जो म्हारे हाथ लगायो । पापो ! हट जा अठा सूं ।”

खंगार आपा मे नीं रियो । ईं ओडणी री या हिम्मत ! एक मजूरणी अर म्हने
गाळ दे ! ईं री ओकात कांई ?

“मान जा जसमल, अवै ही मान जा, ज्यूं थारो मन राख रियो हूं ज्यूं थूं माथें
चढ़ती जाय री है ? म्हूं जबरदस्ती थंने रावळा में लेजायनै वैठाय दूंला, थूं कर
कांई लेवैला ?”

कैवतो कैवतो खंगार, जसमल रो हाथ पकड़्यो । जसमल तो एक हाथ सूं दीवो

राव खंगार ने धक्को । भूखी सिंघणी री नाईं थिकराळ व्हीयां हाथ में फावड़ो ले राजा रे साम्हीं तण'र ऊभी व्हेगी ।

“माथो फोड़नै मार दूँला अर मर जावूँला, जो एक पांवड़ो आगै दीघो ।” सती रो तेज सूरज रा तेज सूँ ही घरणों व्हे ।

“अवै ही समभ जा जसमल ! अवै ही समभ जा, हाल मोड़ो नीं व्हीयो ।” कैवतो कैवतो राव खंगार पाछो फिरग्यो ।

दिन उगतां ही राव खंगार जसमल रा तंबूडा साम्हीं भाक्यो । वठै तो सून पड़ी, माळवा सूँ आयोड़ा ओडां रो एक ही डेरो नी । डेरां में चूल्हां री राख पड़ी । गधेड़ां री लीद रा दुगला रँग्या, ओड जायो एक नीं । डेरा पै कागला पड़ रिया अर कुत्ता भुस रिया ।

ओडण लदी समी सांभ री ओ,
कामी राजा ! ओड लदिया ढलती रात ।

जसमल रे साथै राजा रो यो बरताव देख ओड सारा ही उचाळो घाल आधी रात रा लदग्या । जसमल कोसां पार व्ही । यो हाल देख्यो तो राव खंगार घरणों पछतायो । घरणों दुखी व्हीयो ।

इसड़ी जाणूँ तो जसमल ओडणी ए,
जसमल ! डैरा थारा देतो लुटाय ।

“गजब व्हेगी । असी जाणतो तो यां ओडां रा डेरा लुटाय देतो याने मराय देतो, जसमल ने खोस लेतो । जसमल हाथां बारै परी गी ।”

“मूँ गुजरात रो पराकरमी राजा, मूँने एक ओडणी ठोकर मार ओड रे लारै चलती व्ही ।” “जसमल, जसमल” करतीं राव उठ्यो,

घोड़ा दोड़ाया राव खंगार ओडां रे पाछै रा पाछै ।

“मार दो ओडां ने मुकावलो करै तो । पकड़ लावो जसमल ने । राजी करो, जबर-दस्ती करो, पण जसमल आवणी चावै ।”

खंगार रा घुड़ सवार दोड़्या । ओड पाछै फिर फिरनै देखता जावै, चाल्या जावै । पाछै देखै तो घोड़ां री खेह उड़ती दीखी ।

“मारचा, खंगार री फोज आयगी। आंपां ने मारैला, जसमल ने पकड़ ले जावैला।”

जसमल कांपगी, खंगार म्हंने बंधाय ले जावैला। सीळ बिना जीवणों कस्यो ? ईं सूं तो मर जावणो ही भलो। जसमल ओड़ां रे हाथ जोड़चा “म्हारी वेइज्जती मत कराओ, चिता चुण दो, म्हूं जीवती वळ जावूं पण वीं राजा रे रावळा में नीं जावूं।” वीरे मोटचार रोवतै रोवतै लकड़चां भेली कर दीधी।

जसमल अगनी में वैठगी।

राव खंगार आयो, देखै तो जसमल वळ री “जसमल, जसमल ! पकड़ो, पकड़ो ! चिता में सूं काढो, काढो।”

चिता में सूं जसमल बोली, “जसमल री राख चावै तो लेजा।” चिता री भाळां में जसमल छिपगी। खंगार देखतो रैग्यो।

जसमल, सतियां री सिरताज जसमल सीळ रो मोल चुकायगी।

ऊजली

कड़ड़ ! बीजली चमकी, आँखों में पलको पड़यो तो पलकों मीचणी । जाँण सारा डूंगरां में लाय लागगी व्हे । घररर ! घररर ! बादल गाज्या । बिछाणां में दब्योडा टाबरां आपरी भावां ने काठी पकड़ लीधी । बीजलियां रा सल्लाका लाग रिया । लारै री लारै इन्दर री गाज ! जाँण हजारों हाथी एक लारै चरलाया व्हे । वायरो वाजै तो अस्यो के घरां री छातां ने उड़ाय लेजावै, परलै रो रूप कर आचो । हड़ड़ाटा वायरा रा लाग रिया । ढांढा, डांगर वध्योड़ा, रीकवा लाग्या, खूँटा तुड़ावै, खलभलाटो मचग्यो । घटता में बाकी रैण ने ओला तडातड़ तडातड़ पड़ण लाग्या । मोटा मोटा ओला जाँण भाटा बरस्या । रुंखड़ा माथै बैठ्या पछ्यां रो साथरो बिछग्यो । डूंगर रा जिनावर भाड़ां नीचै जाय जाय माथो छिपायो । पाणी सू पीटयोड़ा, सी सू घूजता अठीने वठीने लुकता फिरै । जीव जंत सारा बेकल व्हेग्या ।

बरड़ा रा डूंगरां में चारणां रो साथ, आपरे पसुवां ने चरावा ने आयोडा हो । डूंगर रा खालचा में दूरा दूरा आप आपरी भूँपड़्यां बांध्या पड़्या । ईं परलै काळ सा ओला, आंधी में आप आपरी भूँपड़्यां में से घंस्या बैठ्या ।

पोह रो मीनो । ईंयां ही ठंड घणी अर आज रा ओला मेह सू तो चोगणी व्हेगी । वासदी सुलगाय तापै । टावर भावां ने नी छोड़ै । डोकरा डोकरा बैठ्या, “राम राम” करता, इन्दर सू कोप कम करणै रा अरदास करै ।

एक भूँपड़ी में अमरो चारण, अस्सी वरसां रो बोभो उठायोड़ो । हाथ में माळा ले गूदड़ी में बंस्यो माळा रा मणियां सरकाय रियो । फाटी गूदड़ी सू ठंड किसी जावै ? ठंड सू हाथ घूजतो जावै । लारै होठ हालता जावै । सी मरता ने नीद आवै कोयनी । आधी रात, मंभ आधी रात । घोड़ा री टापां री आवाज आई । डोकरा रा कान ऊंचा व्हीया । ईं वेळा अठीने घोड़ा ? घोड़ा री पोड़ सुणी, घोड़ा री हीस वींरी भूँपड़ी रा दरवाजा कर्ने । अचम्भे में आय उठयो । देखै तो घोड़ो वरणा रे माथै टाप मार रियो, हींस रियो ।

“कृण व्हेला ?”

कोई जवाब नहीं। घोड़ा री हींस कोरी। एक घमाको व्हीयो जांणै कोई पड़्यो व्हे। अमरो भूंपड़ी में जाय हेलो मारयो। “वेटा ऊजळी, उठ वारै आ, म्हंने अंधारा में सुभै कोयनी।”

ठड सूं कांपती, गूदड़ी फैंक ऊजळी उठी। संटी वाळी, बीरा उजाळा में ऊजळी री काया असी चमकी जांणै काळा वादळां में चांद। वारै निकळ सटी रा चांदणा में देखै तो घोड़ो ऊभो। जीण में सूं पाणी भर रियो, घोड़ा रे पगां कनें सवार गांठ व्हीयो पड़्यो। चेतो कोनी, कपड़ा में सूं पाणी टपक रियो, सारो सरीर करड़ो पड़्यो, होठ लीलायगिया, आंखियां री पलकां बंद। डोकरै भट बीरी छाती पै हाथ मेलनै देख्यो, सांस तो आय रियो, नाड़ी पकड़ी, जीवै तो है। गद गद पोठचा कर ऊजळी बी ने भूंपड़ी में लेगी, गूदड़ी पै न्हांक्यो।

“काक, जीवै तो है सवार?”

“जीवै तो है वेटी, पण ठड सूं अकड़्यो। भट वासदी सलगा। ईं ने तपावां, नी तो मर जावैला। होठ लीला पड़्यो ईं रा।

“लकड़ी तो घर में एक नीं काई सलगावूं? घर रा सारा गूदड़ा ईं ने ओढाय दीवा।”

अमरा रे ललाट पै चिता रा सल पड़्यो। घरै आयो वटाऊ मर जावैला। घोर पाप! सब सूं मोटो घरम ईं री सेवा करणो। दो पल सोच में डूब्यो मन काठो कर ऊजळी रा माथा पै हाथ राखतो बोल्यो,

“वेटी असवार मर जावैला तो आंपा ने नरक में ही जग नीं मिलैला। ईं ने गरमी पूगाणी है। घर में लकड़ी नीं, गूदड़ो नीं, म्हूं अस्सी वरसां रो वूढो, म्हारा डील में गरमी कठै? एक उपाय है वेसा, थूं जवान है। थारा डील री गरमी ईं असवार ने दे तो यो जीवै। थारा कपड़ा उतार, थारा डील री गरमी ईं रा देह मे साथै सोयनै दे।”

बीस वरस री कुंवारी कन्या बाप रो मूंडो देखती रंगी।

“वेटी यो घरम है पाप नीं” नीचो माथो कर ऊजळी आज्ञा मान लीधी।

अचेत सूता असवार रे दो फेरा खाय इसवर ने साक्षी दे, “आज सूं म्हारो पति यो परदेसी असवार” बीरी सैय्या में गरमी देण ने सोयगी।

“थारो उपकार जनम भर नीं भूलूँला” ऊजळी रा हाथ पकड़चां परदेसी सवार कै रियो है।

काल रो परदेसी असवार आज आंपरां, ऊजळी रा अंतर रो स्वामी बगन्यो। काल री आसमान सू ओळा रा गोळा वरसाती अंधारी रात आज री रूपावरणी रात व्हेगी। ऊपरै आसमान में चांद हंस रियो, नीचै मेहो जेठवो, पोरबन्दर रो राजकुमार, हंस हंस ऊजळी रा मन में उजाळो कर रियो।

“आंपरां मिलणो, एक संजोग हो। डूंगरा मे पारस पत्थर मिल्यो, वन में सकुन्तला मिली।”

“सकुन्तला ने भूल दुष्यन्त राजा मेलां में जाय तो नीं बैठ जावैला कठै ही?” ऊजळी रे मन में वैम आयो।

“मेलां मे तो जाय बैठेला, पण ऊजळी राणी रे साथै।”

“चालो आपा चालां, साथै ही ले चालो।”

“यूँ नीं। म्हुं थांने पगणवां ने आवूँला। हजारों घोड़ों री जान चढ़ाय ढोलां रे ढमाकै ले जावूँला।”

“लाओ वचन दो।”

विनां थाम्भा रा आसमान रे नीचै ऊभो व्हे सोगन लेवूँ। “म्हुं थांरो जीवतो’र मरचो” वाथ मे घालता जेठवै परतिज्ञा कीधी। “बोलो, थें ही थांरा सांचा मन सूँ परतिज्ञा करो।”

ऊजळी परतिज्ञा कीधी, “म्हुं भव भव मे थांरी, थां सिवा संसार रा दूजा मानवी म्हारा भाई, थां परणो नी परणो पण म्हे थांने पति रे रूप में अंगीकारचा। सूरज चांद डिगै तो म्हुं डिगूँ।”

सुख रा दिन तो बात करतां निकळै, रातां भागी जावै। मेह नै पांवणा कतरा दिनां रा? एक दिन घोड़ा साथै जीण कसतां कसतां मेहो जेठवो सीख मांगी। ऊजळी हिचक्यां भरती सीख दीधी। जेठवो कोल करग्यो, “एक पखवाड़ा मे पाछो आवूँला।”

जेठवो, राजाजी सूँ सिकार करणै री इजाजत लेवै, सिकार रे मिस डूंगरां कानी आवै। ऊजळी सूँ छानै छानै मिल जावै। दिन में दोय घड़ी ऊजळी री गोद मे माथो मेल मन रो नै सरीर रो थकेलो मेटै। रूपावरणी रात में बैठ व्याव रा

मनसूवा बांधै । डूंगर रा वनफूलां रो गैएँ वणाय ऊजळी ने सिएगारै । फूल कुमलावै नीं जठा पे'ली, काळजा पै भाटो मेल, आपरे डेरै पोह फाटचां आय सोवै । दो घड़ी रा संजोग में हिवड़ा री वातां करै पण विजोग री नांगी तरवार माथै लटकती रैवै । यूं करतां मीना वीत्या । वात छानै कतरा दिन रैती । राजा जाण्यां, मिनख जाण्यां । राजा रोस में आया । पिरजा में चरचा चालण लागी ।

“चारण री वेटी, रजपूत रे वेन ज्यूं, घोर पाप, हाहाकार मच जावैला ।”

मेहा री छाती पड़ी नीं, राजा रो कोप भेलगै री । संसार रे सामै खुलो छाती आपरी परतिजा पालगै री हिम्मत पड़ै नीं । मेहो जेठवो आपरा अंतकरण ने कचर भे'लां में जाय वैठ्यो । ऊजळी ने मन में सूं काढगै री कोसीस करै । वठीने ऊजळी वैठी आसा री बेलड़ी में लाल लाख घड़ा सींच जेठवा री वाट जोवै । दिन पै दिन निकळता गया । कोई समाचार नीं । घर गे काम अर बूढा वाप री चाकरी छोड़ मारग पै वैठी गैलो देखै । एक दिन देखै, दूरां सूं घोड़ां रो भूमको रो भूमको, जेठवो आतो वीं व्हाला वाट पै खड़ियो आय रियो हूँहै । ऊजळी री नस नस में उमंग री लै'र दोड़गी । वीरा मन रा आणंद ने जीभ जोर सूं हेलो मार कैय दीघो,

“वै आवै असवार, घुड़लां री घूमर कियां ।”

दोड़'र ऊपर मंगरी माथै चढ, आख्यां फाड़, जेठवा ने सोधवा लागी । नैणां सूं टळ टळ करता गालां पै अर्णविध्या मोती विखरग्या ।

“अबला रो आधार, जको न दीसै जेठवो”

“हाय, म्हारो आधार जेठवो तो यां में कोयनी” ऊजळी, जेठवा री याद में रात तारां सूं वातां करै, दिन में डूंगर रा भाड़ां ने वाता पूछै । असाढ रा बादळा निकळ्या, मेह री भड़ लागी, मेह रा नाम रे साथै “मेहो” नाम ने जोड़ विलाप करवा लागी,

मोटो उफण्यो मेह, आयो घरती घरवतो ।
मुभ पांती रो एह, छांटन वरस्यो जेठवा ॥

“ओ मेह तो मोटा मोटा छांटा वरमाय, घरती ने घपाय दीघी पण म्हारो “मेहो” तो म्हारे माथै एक छांटो ही नीं पटक्यो ।”

वसंत में लड़ाखूँव फूलां ने देख, लपटी बेजड़्यां ने देख रोय दीघी । जेठवा ने बुलावा देवा लागी,

फागण मीने फूल, केसूड़ा फूलया घरां ।
मूँघा करोनी मूल, आवी ने आभपरा धराणी ॥

डूगरा री खोहां में पसु पंछियां री लीला देखै । सारस चकवा री प्रीत देख सोचै,
मानवी सूं तो पछी चोखा जो आपरी प्रीत तो निभावै,

दुनियां जोड़ी दोय, सारस ने चकवो सुरांह ।
मिल्यो न तीजो मोय, जो जो हारी जेठवा ॥

दुनियां मे प्रीत निभावण्यां कै तो चकवो कै सारस री जोड़ी । जेठवा मूं तो देख
देख थाकगी पण तीजो नजर आयो नी ।

ऊजळी जेठवा रे आरां री आसा छोड़ वैठी । वीं मेहा ने कैवायो, समाचार कैवायो,
अंतर री वेदना रा गीत, दूहा वणाय वणाय भेज्या,

ताळा सजड़ जड़चाह, कूंची ले कीने थयो ।
खुलसी तो आयांह, जड़िया रहसी जेठवा ॥

म्हारा अन्तकरण रे थूं मोटा मोटा ताळा जड़, कूंची ले कठी ने परो गियो । जेठवा,
थूं आय, या ताळा ने खोलैला तो खुलैला नी तो ये ताळा जनम भर जड़चा ही
रैवैला ।

टोळी सूं टळतांह, हिरणां मन माठा हुवै ।
व्हालां वीछड़चांह, जीवै किरण विध जेठवा ॥

आंपणी टोळी सूं, जोड़ी सूं विछड़तां, हिरणां रा, पसुआं रा मन ही दोरा व्हे ।
जेठवा, आपरा प्यारां सूं विछड़चां किया जीवीजै, थूं ही बता ?

थें पटकी पाताळ, ऊंची ले आकास तक ।
पगत्यो वण पाताळ, जीव उठूं रे जेठवा ॥

थूं म्हने, प्रीत कर, आकास जतरी ऊंची उठाय अवै छिटकाय'र पाताळ में जाय
म्हांकी । जेठवा, अवै ही म्हने सहारो दे पगत्यो वण जा । मूं जीव उठूं ला ।

चकवा सारस वांण, नारी नेह तीनूं निरख ।
जीणों मुसकल जांण, जोड़ी विछड़चां जेठवा ॥

चकवा री सारस री अर नारी री एक सी वाण है । जोड़ी विछड़चां पद्ये ये तीनूं
ही जीवै कोयनी ।

जिण विन घड़ी न जाय, जमवारो किम जावसी ।
विलखड़ी वीहाय, जोगण करग्यो जेठवा ॥

जीरे विना एक घड़ी रैणो ही दोरो लागै, वीरे विना यो जमारो जनम कियों वीतैला ? मूँ विलख री हूँ थूँ मूँने जोगण कर चलयो गियो, जेठवा !

ऊजळी घणां कळळापा कर कर जेठवा ने भूली प्रीत याद देवाई ।

जेठवै उत्तर में कैवायो, “आंपणी जूनी प्रीत भूल जा । घणां ही चारण है, कीरे ही सायै व्याव कर घर वसा । थूँ चारण री वेटी मूँ रजपून, आंपां रे तो जात रे कारण सून भाई वेन रो सम्बन्ध है ।”

ऊजळी रे पगां नीचली जमीन निकळगी । सपनां में नीं सोचै जो वात सुणी । “भूठी बात कदे ही नीं । प्रीत रो, जात रे सायै कांई ताल्लुक ?”

जिण सून लाग्यो जोय, मन सो ही प्यारो मनां ।
कारण और न कोय, जात पांत रो जेठवा ॥

जिण सून मन लाग्यो, जो प्यारो लागै वो ही आंपणों । प्रीत में जात पांत रो कोई कारण नीं जेठवा !

वीणा जंतर तार, थें छेड़या वीं राग रा ।
गुण ने रोवूँ गंवार, जात न भीकूँ जेठवा ॥

थें प्यार री वीण बजाई, प्रीत री राग गाई । मूँ तो थारी वीं प्रीत ने रोय री हूँ, गंवार, जात ने थोड़ी ही भीकूँ हूँ ।

तावड़ तड़तड़तांह, थळ साम्हो चढतां थकां ।
लाघो लड़थड़तांह, जाडी छायां जेठवा ॥

तरकाळ तावड़ा में रेत रा टीवा पै माम्हा चढतां री गत व्हे जो गत म्हारी व्हेय री है । मूँ लड़खड़ाय री हूँ, जेठवा, ईं वगत थूँ जाडी छायां वण मूँने थारी छाया दे ।

जळ पीघो जाडैह, पावासर रे पावटै ।
नानकियै नाडैह, जीव न धापै जेठवा ॥

जों मानसरोवर रो पाणी पी लीघो दीरो जीव तळायां रा पाणी ने थोड़ो ही दुकै । थारा सून प्रीत कर जेठवा, दूसरा साम्हें नजर ही नीं उठै ।

घरां घरां ओलमा लिख ऊजळी भेज्या, कैवायो पण जेठवा रो भाटा जस्यो मन पिघळचो नी । कायर रा काळजा में थीज्योडो लोही ऊनो व्हीयो ही नी ।

कैवाई “थंने जात रो विचार नीं है, राज ही चावै तो और घरां ही मोटा मोटा राजवी है, वांने अरदास कर, वे थारी मनसा पूरण करैला ।”

ऊजळी रे माथै जाणै वजर पड़चो । हूं हूं सूं रीस री लपटां निकळवा लागी । धिक्कार है । आपरे संगैती चारण खीमरा ने कह्यो,

खीमरा, खारो देस, मीठा बोला मानवी ।

नुगरां किसो सनेह, जेठी राण भल्यो नहीं ॥

खीमरा, यो देस ही खारो निकळचो । खारा मन रा मिनख, कोरा मूंडा सूं मीठा बोलै । अस्या नुगरां मिनखां सूं किस्यो सनेह । जेठवा सूं नेह रो भार भेलणी नीं आयो ।

काचो घडो कुम्हार, अणजाणेह उपाड़ियो ।

भव रो भांगणहार, जेठी राण जाण्यो नहीं ॥

अरे म्हूं अणजाण में कुम्हार रा घर सूं काचो घडो (काचा मानवी रो प्यार) उपाड़चो । म्हूं ईं जेठवा राणा ने म्हारी जिन्दगानी ने भांगवा वाळो नीं जाण्यो ।

परदेसी री प्रीत, जेठी राण जाणी नहीं ।

तांणी नै मारचा तीर, माथा भर भर जेठवा ॥

ईं जेठवै म्हारी परदेसी री प्रीत री पीड़ा समझी नी । वी तरकस भर भर दुख रा अर जीभ रा बाण म्हारे माथै तांण तांणनै मारचा ।

दुख सूं दाइयोड़ी ऊजळी, आभपरा रा डूंगरा में भटकती भटकती पोरबन्दर गी । जेठवा रा मेलां आगै तीन दिन भूखी अर तिमी बैठी री ।

“म्हूँने एक'र जेठवा थारो मूंडो बतायदे ।”

गोखड़ा री वारी खोल जेठवै मूंडो काढचो, “थूँ थारे जात रा वेटा ने परण ले, आघो राज थंने देयनै वेन वणाय दूलां ।”

कनें ही रतनागर समदर हिलोळा लेय रियो हो । ऊजळी उठी, संमदर री लै'रां में जाय कूदगी ।

ढोला मारू

सपनो तो आयो अर परो गिया पण मारवण री आख्या में पाछी नींद नी आई ।

आख्यां खोलै तो बारँ अंधारो अंधारो लागै अर मीचै तो अन्तस में घोर अंधारो ।
उठै, बैठै अर पाछी सोवै पण जीव ने जक नी । गांव रे वारै ताल में कुरजां
कुरळायी ।

घर में सूती कुरजां रा बच्चा री लांबी गावड़ बाळी मारवण रो हिवड़ो ही वां
कुरजां रे लारै रो लारै कुरळायो ।

सपना में दीख्योड़ो ढोलो अणसैधो व्हेतां ही माखणी ने लाग्यो जांणै भव भव रो
सैधो वीरो ढोलो है ।

बाळपणां में व्हीयोड़ा व्याव ने वा सपना री नाईं भूलगी ही पण आज सपनो
आयनै परतख ढोला ने आख्यां आगै ऊभो कर दीधो । बीने चीतां आयो वीरो ही
कोई है पण वा बीने नी जांणै, वो बीने नी जांणै । सपनो काईं आयो, वीरा तन
ने, मन ने भंभेड़नै जगाय दीधो । कालै सांभ ताईं सायण्यां रे लारै दोड़ दोड़'र
दड़ी रमती टाबरी यां चार पांच घड़ी में ही भावना रो भार उठायां जोध जुवान
लुगाईं व्हेगी । हिड़दै री वीणां माथै सपना री आंगळ्यां फिरतां ही सनेह रा सुर
बाजण लाग्या । जठीने भांकै वठीने ढोलो ही ढोलो दीखै ।

ताल में कुरजां यूं ही कुरळाय री ही, मारवण ने लाग्यो जांणै वारी जोड़ी बिछड़गी
जदी तो म्हारी नाईं कुरळाय री है । नीं तो वारी आख्यां में नींद है, नी म्हारी
आख्यां में ही । यारी अर म्हारी एक सी गत है पण यारि तो पांखड़ा है मन करतां
ही उड़ जावै, म्हारे पांख कठै जो उड़नै मिल आवूं ।

मा देख्यो मारवणी अणमणी रैवै । सायण्यां सागै दूल्यां खेलणों आछो नी लागै,
काम करवा रो जीव नीं करै । पे'लां ज्यूं दोड़, मां रे गळा में वांहां घाल लटकै नीं ।
हंसणी आख्यां री कोर में ठावस री रेखा साफ साफ दीखै । मां थोड़ा में ही घणां

समझगी। चिन्ता व्ही। बेटी मोटी व्हेगी, सासरा सूं कोई समाचार नी। मौको देख राजा पिगळ ने कह्यो, “मारवण ने सासरें भेजणें री तयारी करणी चावै।”

‘हां अतरा वरस व्हेग्या। नरवर सूं कोई समाचार लेर ही नी आयो।’

‘बठा सूं नीं आयो तो काई, आपां ही भेजां। ढोला ने बुलावो भेजो। ढोढ वरस री ने परणाई जद ढोलाजी तीन वरन रा हा, बाई मोटी व्ही, वे री जुवान व्हीया। या ढील काई काम री?’

सांची बात तो या है, देवड़ी, म्हूं कतरा ही मिनखां ने कागद दे दे ढोला ने बुलावा भेज्या, जो गियो वो पाछो आयो ही नीं, म्हारा समाचार ढोलाजी ताईं पूगं ही नीं। ढोला रो व्याव माळवणी रे साथै व्हीयोड़ो है, जो माणस पूगळ रा मारग सूं जावै जीने माळवण मराय दे।” पिगळ घणा उदास व्हे बोल्या।

देवड़ी सलाह दीधी, ‘अवकाळं कोई जाचक ने भेजो जो वीरे माथै कोई वैंम नीं करै। मांगतो खावतो नरवरगढ़ जाय ढोलाजी ने वाता सूं, गीतां सूं रिभाय अठं राजी कर ले आवै।

पिगळ रे सलाह जंचगी।

राग रा जाणकार, वातां रा वणावण्या ढाढ़ी ने ढोला कनें जावा रो हुकम दीधो। मारवण दासी ने भेज, ढाढ़ी ने ड्योढी पै बुलाय, ढोलाजी कनें कैवा ने सनेसो समझाए लागी,

“थूं जाय ढोलाजी ने कीजे, थारी मारवण बळर कोयला व्हेगी है, जायर वीं री भसमी तो भेळी करो। वीं रा पींजर में प्राण कोयनीं। थारा साम्हा वीं री लौ बळ री है। वीं भला आदमी ने जायनै थूं कीजै, आतमा थारे कने है सरीर ने भला ही दूरो राख। ढाढ़ी, थनें ढोलो मिलै तो थूं जरूर कीजै मारवणी री आख्यां थारी वाट देखतां, सीपां री नाईं खुब री है, थां स्वाती री वूंद ज्यूं आय वरसो। योवन चंपा रे मोड़ आवा लाग गिया है, आय कळियां तो चूंटो। थारी याद कर कर मारुणी कणोर री कांवड़ी ज्यूं सूखगी है।

पंथी ! ढोलाजी ने थूं कैवणों मत भूल जाजे के विरह री लाय लाग री है, आय ईं दावानळ ने बुझावो। थारी घण कंवळ ज्यूं कुम्हलायगी है थां सूरज वण उगो। योयन धीर समंदर व्हेय रियो है, थां आय रतन क्यूं नी काढ़ रिया हो?”

मारवण री आंख्यां में आंसू भर रिया, सांस नीं माय रियो, पग लींगरी काढ़ती, हंघ्यां गळा सूं ढाढ़ी ने समझावा लागी, “ढोलाजी ^{अंगूठा सूं} ^{परा नाम} सूं हाथ जोड़ कीजे, आप म्हाने भूलग्या, कोई सनेसो तक नीं भे जीवूं तो कीं रा आधार पै जीवूं । जो थां फागण में नीं आया तो ^{वतावो} ^{भाळ} में कूद पड़ूं ला ।”

मारु राग में दूहा वणाय ढाढ़ी ने दीघा, “ये ढोलाजी रे मूंडागै गाय ^{रु}, ढाढ़ी मुजरो कर सीख लीघी, “जीवतो रियो तो ढोलाजी ने लेर आंवूं ल ^{यो} तो वीं देस में रैय जावूं ।”

वादल छांय रिया, अंधारी रात में बीजळ्यां ओळां खैचती, आंटा खा कानी चमक री, जाणै इन्दराणी रा काळा घाघरा में सुनैरी जरी रो रियो व्हे । माळिया में ढोलो सूतो बीजळ्यां खिदतो देखै, माळिया रे नं सूं गाणै री तान ऊंची ऊठी । सीली रात में मलार राग, भीणीं भीण मेंह री वूदां रे सागै, मघरा मघरा चालता पवन में भरगी । ढोलो, प कीघां नाग ज्यूं राग पै भूमवा लाग्यो । गवा वाळा मीठा गळा सूं स सवदां में कह्यो,

“ढोलो नरवर सेरियां, धरा पूंगळ गळियांह ।”

ढोलो चमक्यो, वीं रो अर वीं री वाळपणां में परणी मारणी रो नाम ? ^{मा ने} ध्यान एक जगां कर सुणवा लाग्यो । वाळपणा रो व्याव ! ढोला रे ? ^{मा ने} जावणो !! मारणी रा रूप रो वखाण !!! जाणै पोथी खोल आगै राख द ओछा पाणी री माछळी ज्यूं ढोलो तड़फै ।

वरखा वरसती री, ढाढ़ी गातो रियो, ढोलो सुरां ।

आंखड़ियां डंबर हुई, नयण गमाया रोय ।
के साजरा परदेस में, रह्या विड़ाणां होय ॥

आंख्यां लाल व्हेगी, रोय रोय नैण गंवाय दीघा । साजन तो परदेस में पराया रिया है ।

वहु धंवाळ आव घर, कांसूं करै विदेस ।
संपत सगळी संपजै, आ दिन कदी लहेस ॥

सारी रात ढाढ़ी गातो रियो, ढोलो सुणतो रियो । आंगणों, पोळ, ओवरा सा

घर जाणै मारुणी रा संदेस सूं भरग्यो । ढोलो सुणतो रियो, ढोल्या पै सूतो पण
जाणै तातो हूँ पै लोट रियो व्हे । दिन ऊगतां ही गावा बाळा ने बुलायो ।

“थां कठा सूं आय रिया हो?”

“पूंगळ सूं, मारवण रो सनेसो लेर । ढोलाजी री बाट देखतां देखतां, मारुणी
कुंभ रा बच्चा री नाई लांबी गरदन री व्हेगी है । वीं कंचन-वरणी कामणी सूं
भट जाय मिलो ।”

दुज्जण वयण न सांभरी, मनां न वोसारेह ।

कुंभां लाल बचांह ज्यूं, खिण खिण चींतारेह ॥

खोटा मिनखां री वातां मे आय बीने मन सूं मत उतारो । कुंजा रा लाल बच्चां
ज्यूं पल पल थांने याद करती रैवै वा मारुणी ।

आसू सूं आला व्हीयोड़ा चीर ने निचोवतां निचोवतां वींरी हथेळ्यां में छाला
पड़ग्या है ।

जै थूं साहिब ना आवियो, सावण पहली तीज ।

बीज तणै भवूकड़ै, मूंध मरेसी खीज ॥

जो थां सावण री तीज पेलां कोनी गया तो बीजळी खीवती देख वा मुगधा
खीजनै मर जावैला । थांरी मारुणी रा रूप नै गुण रो बखाण नीं व्हे । घणां
पूरव रा पुन्न करचांड़ा व्हे जीने असी अस्तरी मिलै ।

नमणी, खमणी, बहुगुणी, सुकोमळ सुकच्छ ।

गोरी गंगा नीर ज्यूं, मन गरवी तन अच्छ ॥

घणां गुण वाळी, खमणी, नमणी नै कोमल है । गंगा रा पाणी सरीखी गोरी,
आछा तन अर मन री ।

गति गयंद, जंघ केळ ग्रभ, केहर जिमी करि लक ।

हीर डसण विप्रभ अधर, मारण भूकुटि मयंक ॥

हाथी जसी चाल, हीरा जस्या दांत, मूंगा सरीखा होठ है । थांरी मारवण के सिंघ
सरीखी कमर, चन्दरमा जस्या भूंवारा है ।

आदीता हूं ऊजळो, मारुणी मुख व्रण ।

भींणां कपड़ा पैरणां, जाणै भांकेई सोव्रण ॥

मारवणी रो मूंडो सूरज सूं ही ऊजळो है । भींणां कपड़ा में सूं सरीर चमकै जांगै सोनो भांक रियो है ।

ढोला रो कालजो उछाला खावा लाग्यो । मन पंछी व्हे अर प्राणां रे पांखां व्हे तो ईं वन ने उलांघ वठै जाय पूगै । मन, मारवणी कनें जाय पूगो जांगै बाज पंछी ने मूठ में भरनै उड़ाय दीघो व्हे ।

आख्यां में हंसती, छाती पै मोत्यां रो हार हलावती माळवण, मुळकती ढोला कनें आई । ढोला रा डोल देख, उठचोड़ा पग थमग्या । “यूं क्यू ? काल हा जो आज नीं । ललाट माथै तिसूळ, नाक में सळ घाल राख्या है । काई बात है ? कठै ही मारवण री बात तो याद नीं आयगी ।”

कनें बैठ पूछण लागी “आज हंसो नीं, बोलो नीं, काई म्हारा सूं रुसाया हो ? चिन्ता कीं री ? बतावो तो ।”

“यूं स्याणी है । सब समझै । हिरणाक्षी, राजी व्हे सीख दे तो दिसावर जावूँ । देस देसान्तर देखूँ ।” ढोले भोळावो दीघो ।

तंती नाद तंवोळ रस, सुरही सुगंध ज्यांह ।

आसण तुरी घर गोरड़ी, तिको दिसावर क्यांह ॥

“जींरा घर में मीठा सुर रा वाजा वाजता व्हे, तांवूळ रस नै सुगंधी व्हे, । चढवा ने आछा घोड़ा, घर में रूपाळी स्त्री व्हे बीने दिसावर जांगै री जरूरत काई ?” माळवण उत्तर दीघो ।

“ईंडर जावूँ तो थारे गैणां घड़ाय लावूँ । ”

“घर बैठचां ही गैणां मंगाय लेवांला ।”

“मुलतान सूं घोड़ा खरीद लाणा है ।”

“सौदागर अपणै आप अठै लेय आवैगा । थां छांट छांट नै वांका मूंडा रा घोड़ा खरीदजो ।”

ढोला घणां आळखा लीघा, कच्छ में यो काम, गुजरात में वो काम । गैणां लावूँ, चीर लावूँ, मोती लेर आवूंगा ।

“ढोलाजी, थां अणमणां व्हे रिया हो, नखां सूं भींत खुरच रिह्या हो । सांच सांच बतावो मन में काई है ?” माळवण रो वंम बढ़तोग्यो ।

“मारुणी सूं मिणै री इच्छा-व्हेय री है” धीरै सूं ढोलो बोल्यो ।

माळवण तो सुणतां ही घड़ाक आंगणै जाय पड़ी जाणै सांप खायग्यो व्हे । वीभरणी कर, पाणी रो छांटो दे चेतो करायो । ढोलो जाणै री त्यारी कीधी । जद माळवण बोली,

“अवार चोमासा में कदे ही कोई घर सूं बारै नीसरै ? ईं रित में तो बुगला ही घरती माथें पग कोनी देवै । पपीया बोल रिया है, कोयलां सुरंगा सबद कर री है, डूंगर हरया व्हे रिया है । इसी रित में बारै कुण जावै ? कै मांगवा वाळा, कै चोर अर कै चाकर घर छोड़ै नीसरै । नदिया चढ़ री है, वादळा भर गिया है, यां सुवांवणां दिनां मे म्हूं थां बिना किस्या रैवूंगी । घरती तो लीली लीली दीखैला अर थांरी माळवण थारे गया सूं पीळी पड़ जावेला । म्हंने यां वादळ्यां री नाई रोवती छोड़ कठै जावो । चोमासै चोमासै ठैर जावो ।”

“दसरावा ताई और रुक जावूला” ढोलो निसासो न्हांकतो बोल्यो ।

आज धरा दस ऊनम्यो, काळी धड़ सखरांह ।

वा धण देसी ओळंवा, कर कर लांबी बांह ॥

इन्दर घरती साम्हो उलळ रियो है, मंगरा रा दूंचकां ने वादळ्यां छाती सूं लगाय राखी है । वठै बैठी वा मारुणी बांहा आधी कर कर म्हंने ओळंवा देय री व्हेली ।

दिन जातां कांई देर लागै ? चोमासो निकळचो, दसरावो ही निकळयो । अबै ढोले पूंगळ जाणै री त्यारी कीधी,

“अबै पूंगळ जावा दो, थारे कैवा सूं चौमासो रुकग्यो, सियाळो आयग्यो अबै जावू हंसैर बिदा करदो ।”

ये सियाळै रा दिन ही कोई जाणै रा व्हे ? पाळो पड़ै, घोड़ा ने ही टापर ओढाणी पड़ै । जीं रित में सीपां में मोती नीपजै, हिरण्यां ग्यामणी व्हे, उत्तराध रो तीखो पवन चालै अस्या दिनां में ही कोई घर छोड़ैर जावै ? यां दिनां में तो सांप ही विल नीं छोड़ै ।

उत्तर आज स उत्तर ही, वाजै लहर असाधि ।

संजोगणी सोहावणो, विजोगण अंग दाधि ॥

उत्तर रो पवन वाज रियो है, पाळा री लैरां चाल री है । संजोगणियां ने तो सुख देवै पण विजोगणियां ने वाळनै राख कर देवै ।

माळवण कैती री । ढोलो सवार व्हेयो । माळवण डव डव आंख्यां करती, भव भव करती पागड़ा रे भूंगी ।

ढोलो बोल्हो, म्हुं जावूँला जरूर । थाने नींद आय जावैला, सूता ने छोड़ विदा व्हेय जावूँला ।

अव माळवण सोवै हीज नीं, एक पल ढोला ने एकलो नीं छोड़ । ढोलै आछा तेज चालण्यां ऊंट ने जो एक दिन में सो कोस रो गैलो काटै, पलाण त्यार कर राख्यो ।

माळवण ने जक नीं । यूं करतां करतां पनरा दिन बीतग्या । माळवण री आंख्यां सुजगी, एक दिन नींद री हारी री पलकां जपगी । ढोलै तो ऊंट ने पागड़ लगाएँ रो हेलो मारयो । चट ऊट पै सवार व्हे एड़ मारी । ऊट 'वळवळ' बोलतो उठ्यो । ऊंट री बोली सुणतां ही तो माळवण चमकी, देखै तो कनें ढोलो नीं । गोखड़ा में जाय नीचै भांकें तो ऊंट पै सवार ढोलो जावतो देख्यो । ढोलै गोखड़ा में ऊभी माळवण ने देखी जाणै बीजळी तड़की व्हे । ऊंट री मोरी खैची जो एक पल में गाम रे वारै जातां ऊंट रो पळको माळवण ने पड़्यो ।

माळवण हाका करती रैयगी, “कोई ढोलाजी ने रोको कोई ढोलाजी ने रोको ।”

ढोलो ऊंट ने दोड़ायो जाणै उड़ रियो व्हे । माळवण, कळपवा लागी । कदे ही विलाप करै, कदे ही ओळवा देवै, ऊंट ने सराप देवै, कदे ही याद कर भूरै । वीरी चूंदडी रा चारूँ पल्ला आंसूडां सूं भीजग्या, आंख्यां रो सारो काजळ वैयग्यो । कांचळी निचोवै जसी आली व्हेयगी । ढोला रा जाती वेळा आंगणां में पग मळ्या वीं धूळा री मुठ्यां भर भर छाती रे लगावै ।

ढोलो उमंग भरयो, पूंगळ रो मारग पकड़्यो । घणां घणां कोड करतो मोटा मोटा मनसूवा वांवतो काळा ऊंट रे कामडी मारतो “सांतरो चाल, सांतरो चाल” करतो, घाटी, वन डूगर पार करतो वढ्यो । गैला में टीवां रे मायें एक गुवाळिये देख्यो, ऊंट रा गळा में भींगां भींगां धूधरा बाज रिया है दोई आड़ी ने जीण रे लाम्बा लाम्बा फूँदा लटक रिया है, ऊंट अस्यो चाल रियो है जाणै पाणी रो रेलो वैंवतो आय रियो व्हे । सवार रो मूंडो कोड सूं चमक रियो है ।

गुवाळियो बोल्हो, “घर कोई गोरी वाट नाळ री है जीरे खातर अस्या सी पाळा में भाग्यो जाय रियो है ?”

“चांद जसी माहणी सूं मिलवा जाय रियो हूं ।”

“वा तो म्हारी सायण है म्हुं मारवण रो मितर हूं ।” गुवाळियो मन में हंसतो बोल्हो ।

ढोला रा हाव सूं ऊंट री मोरी छटगी । कनें ही ऊमरा रो चारण आय रियो ।

ढोला ने पूंगल जातां देख वीरे लाय लागगी । भट साम्हो भांक निसासो भरतो बोल्यो, “ढोलाजी, जीं मारवण रे खातर उमग्या जाय रिया हो वा तो बूढी व्हेगी, सारो माथो धोळो व्हेग्यो । अवै जाय कांई करोला ? घरा मोड़ा चेत्यो ।”

ढोला रो मन पीपळी रा पत्ता री नांईं कांपग्यो । आगै पग पड़ै न पाछै । वठै हीज ऊंट री मोरी थाम ऊभो व्हेग्यो । कांई करूं कांईं नीं ? अवै घरै जाय गाम रा मिनखां ने कस्यो मूंडो बताऊं ।

साम्हो एक आदमी आतो दीख्यो । उदास व्हीया ढोलै पूछ्यो “पूंगल री मारवणी कांई बूढी व्हेगी है ? जाणातां व्हो तो सांच सांच बताओ ।”

“थांरी अकल कठै गी ? थांरो ब्याव हुयो जद थां तीन बरस रा हा मारवणी डोढ बरस री ही, थां तो जोध जवान हो अर वा बूढी कियां व्हेगी ?” बटाऊ सवाल कीघो ।

एक पल रुकनै कह्यो, “मारू जिसी अस्त्री आज तांईं नीं देखी अर नी सुणी । मेलां में जद वा बोलती व्हे जद यूं जाण पड़ै कठै ही वीणा वाज री है । गळा में चांदी रो गैणों पैर ले तो मारूणी रा बदन री छाया पड़्यो सूं वो ही सोना रो सो दीखवा लाग जावै ।”

ढोलै भट मृट्टी भर मोहरां वीं ने देय ऊंट हकाळ्यो । पागड़ी ने कसर बांध लीधी, मोरी ढीली मेली ।

ऊंट तो वायरा सूं वातां करवा लाग्यो । सांभ पड़तां पड़ता पूंगल जाय पूग्यो । ढोलो मारवणी सूं मिल्यो मारवणी ढोला सूं मिली । जाणै उनाळा मे जेठ री लू सूं वळी वेलड़ी पै सावण री भड़ी लागी ।

ढोलो चार दिन रै, सीख मांग मारूणी ने लारै ले घरै विदा व्हीयो । ऊंट ने संगारयो । आगै ढोलाजी अर पाछै मारूणी ऊंट पै चढ्या । घर रो आसूधो ऊंट, उमहाया ढोलाजी, वे ही आगता नै ऊंट ही आगतो । ऊमरै सूमरै सुणी ढोलो एकलो मारूणी ने लीधां जाय रियो है । बी देख्यो मारूणी ने लेवा रो घरणो आछो मोको । गैला रे बीचै जाजम ढाळनै बैठग्यो । ज्यूं ही ढोला रो ऊंट आयो रोकनै मनवार कीधी,

“आओ ! आओ ! मनवार लो । घरां मूंधा पांवण पधारचा ।”

ढोलो, मारूणी ने ऊंट पै बैठी छोड़, आप जाजम पै बैठ मनवार लेवा लाग्यो । ऊमरा सूमरा रा मन में तो पाप, मोको देखनै ढोला ने मारवा री घात घाल राखी ।

मांझल रात

मारुणी ने कांई बैम नीं । ढाढ़ी दूहा देय रिया, ढोलाजी अमल री मनवार लेय रिया ।

ढाढ़ी री लुगाई पूंगळ री । वा ऊमरा सूमरा रा मन रो पाप जांणै । छानैं सूं मारुणी रा कान में जाय कह्यो, “धांने लेवा री घात है । ढोला ने ले भागो नीं तो मारघो जावैला ।”

मारुणी तो भट ऊंट रे कामड़ी री दीधी । ऊंट तो कामड़ी री लागतां ही उठ वैख्यो, चालवा लाग्यो । ढोलै देख्यो ऊंट भाग रियो । भट ऊंट लारै भाग्यो पकड़वा ने ।

मारुणी बोली, “घोखो, भट ऊंट पै चढो ।”

ढोलो तो देतां ही पागड़ा पै पग नै ऊंट पै चढनै मारी कामड़ी री, ऊंट भाग्यो । ऊमरो “अरे अरे” करतो रैयग्यो । भट घोड़ा पै चढनै लारै व्हीयो पण वो काळो टोरड़ो ! घोड़ा ने पूगवा कद देतो । घोड़ा पाछै रैग्या । ढोला मारुणी घरै आया ।

ढोलाजी मारुणी रे अर माळवणी रे साथै घणा आणंद सूं रैवा लाग्या ।



लालां मेवाड़ी

गागरुण रे गढ़ रे में दरबार लाग रियो है। रावजी अचलदासजी खीची, गादी मसनद लगायां बैठचा है। चाकर ऊभा चंवर ढुळाय रिया है। भाई बेटा दोई ओळां में बैठचा धीरै धीरै वातां कर रिया है। अमलां गळ री है। कविता सुणणै रा सोखीन अठीने वठीने आगा पछा ऊभा है, बैठचा है। ऊपर भरोखा री जाळी में, लालां मेवाड़ी, मेवाड़ रा घणी मोकळजी री बेटो बैठचा, नीचै दरीखाना मे भांक रिया है। आपरे वाप दादां रा विड़द रा गीत सुण सुण हंस रिया अर बगसीसां नीचै भेज रिया है।

ब्रीठू चारण, आपरी बेन भीमां ने लारै ले जांगलू सूं मांगणी पै आयोडो है। आज वीरो रावजी कनें मुजरो है। खीचीयां ने पे'लां विड़दाया, अचलदासजी रा आपरा गीत बोलया, रावजी राजी व्हीया, सिरोपाव दीधा, इज्जत दीधी।

अवै भीमां, आपरा रच्योड़ा गीत बोलण लागी। दूहा अर सोरठां री वा भड़ लगाई के सारी सभा चतराम री व्हीयोड़ी बैठी रैगी। वीरो दमकतो मूंडो ! बोलणै रो ढग !! कोयल ने लजावा वालो कंठ !!! वा'वा' करता रैग्या सारा जणां। रावजी मन में कैण लाग्या, “धन है मारवाड़ रो देस जठै भीमां जस्या नारी रतन नीपजै।”

“भीमां बाई, धन हो थां अर थांरी कविता। थांरी कविता सुणणै रो मन में चाव है। थां कालै फेर आवजो, थांरी कविता सुणांला अर वातां करांला।”

“जसी थांरी कविता वसी ही थांरी वात करणै री चतराई। भीमां बाई, थांरे देस में म्हाने परणावो। कोई असी ही रूप, गुण अर चतराई वाली कन्या म्हाने बतावो। मारवाड़ रे समंद में मोती नीपज्या करै है।”

“म्हारे जांगलू में खीवसी सांखला रे बाई उमा सूं वत्ती और कुण व्हेला” भीमां भट बोलै।

कस्याक है थारे वाईजी ?”

चंदवदनि मृगलोचनी, सिंघ कटी गज गत्त ।
एहवी उमा सांखली, मनहरणी ज्यूं कवित्त ॥

चट दूहो, रच भीमां सुणायो ।

“भीमाजी, वारो वखाण करो, गुण सुणावो म्हांने ।”

भीमां वखाण करण लागी,

“आसमान री उत्तरी इन्दर री अपसरा ! सरोवर रो हंस ! सरद रो कंवळ ! वसंत री मींजर ! भादव रो वादळ ! असाढ री बीज ! हंस री वच्ची ! लिछमी रो अवतार ! परभात रो सूरज ! पूनम रो चांद ! गुण रो प्रवाह ! रूप रो मंडार ।”

“वस वस, रैण दो घरणों ।”

“रावजी पूरी बात तो सुणों,”

“वांह जाणै चढ्यो धनुस, पातळा हाथ ! नान्हां नख ! दांत जाणै अनार रा बीज अघर जाणै त्रवाळी ! हंस री गत चालै । चांवळ रो चोथो हिस्सो खावै । फूंक री मारी आकास उड़ जावै ।”

“रावजी, जिए आदमी पूरवला जनम में आछा पुन्न करछा व्हेला जिए ने उमा सांखली मिलैला । आछा भाग बिना राज अर पदमणी मिलै कोयनी ।”

“वाई ! चाहे जो व्हे म्हुं थारा वाईजी रे लारै परणूला, थाने करारो ही पड़ैला यो सगण ।”

“आप रा कामदार सरदार म्हारे लारै भेजो जो सावे थरपा ।”

लाखपसाव ले बीठू अर भीमां जांगळू आया । खींवसी ने कह्यो ।

खींवसी राणी सूं जाय सल्ला करी ।

“गागरूण रो घरणी वाई उमा ने मांगै ।”

“सोनो’र सुगंध देखणों काई । सोना रूपां रा नारेळ ले पिरोत ने भेजो, सावो थापो ।”

“लालांजी, एक बात कैवू, मानोला ? मानो तो कैवू एक अरज ।”

“हुकम री चाकर ने अरज क्यूं आज ? फरमावो ।”

अचळदासजी सूं कैवणी नीं आवै । लालां मेवाडी आंख्यां में आंख्यां घाल पूछ्यो,

“असी बात काई है ? कैवो तो ।”

“जांगळू सूं म्हारे नारेळ.... ..”

“हैं !” जाणै आसमान पड़्यो व्हे । लालां मेवाड़ी रो बोल नीं नीसरयो ।

“मेवाड़ीजी, म्हने माफ करो । व्हेणो जो व्हेयो, राज थांरो, पाट थांरो, हुकम थांरो, म्हूं थांरो उमा थांरी । राजी व्हे थां कै दो, परणवा ने जावूं ।”

डसूका भरती लालांजी बोली, “थांरो मरजी, पण म्हने एक वचन दो ।”

“एक नी दस, लालां !” खीची हाथ आघो बीघो ।

“आप परणो, सासरे रैवो, गैला मे चालो जतरा दिन आप उमा रा । गागरुण में आवो जी दिन सूं थां म्हारा । उमा सूं पछै बोलो नीं । ये वचन दो ।”

रावजी हाथ पै हाथ दे विदा व्हीयो । तयारयां करै । लालांजी ने रात जक पड़ै नी दिन में जक पड़ै, सारी रात सीटयां देता फिरै ।

जांगलू में गाजा बाजा व्हे रिया । नंगार खाना बाज रिया । मे'लां में रावजी अर उमा बैठ्या । मान मनवारां, राग रंग व्हे रिया । रावजी तो उमां ने देख मोहित व्हेग्या । रात री खबर पड़ै नीं कोई दिन री । वानें खबर नीं कदी तो दिन उगै'र कदी आंथै । एक पल उमा ने दूरा करै नीं ।

उमा अचळो मोहियो, ज्यूं चन्दण भूयांग ।

रात दिवस भीनो रहै, भमरो सुमनां राग ॥

अचळदासजी ने तो उमा अस्या मोह्या के ज्यूं काळो नाग चन्दण सूं लिपट्यो रै अर ज्यूं भवरो फूलां री वासना पै भ्रमतो रै ज्यूं रावजी उमा कने बैठ्या रै ।

यूं करतां सात दिन व्हेग्या । उमराव परधान, जान में आयोड़ा, रावजी सूं मुजरो करण ने हाजर व्हेवा री अरज करावै पण वांरी सुणाई नीं व्हे । वां घणी अरज कराई तो वारै आय मुजरो भेल सारा सिरदारां ने ववड़ाय परधाने ने कह्यो ।

“म्हूं घणो दुखी हूं ।”

“उमा जसी अस्त्री मिली फेर आप दुखी हीज हो ?”

“हां जद हीज तो दुखी हूं । म्हें लालांजी ने वचन दीघो के वारे हुकम वगैर उमा सूं गढ़ गागरुण में गियां पछै बोलूं नीं । बताओ, म्हांरो सरीखो दुखी और कुण संसार में व्हेला ? सांखली तो असी है के एक पलक दूरी नीं करीजै ।”

ना दीठी ना सांभळी, रूपै इधकी रेख ।

एहवी उमा सांखली, जाणै सह विवेक ॥

परधानां ने गागरुण जांणै री सीख दीधी । सारी जान ने बिदा कीधी । रावजी वठै ही सात आठ मीनां रैणै रो विचार कीधी । परधानां सोची या तो गजब व्ही । एक कासीद भेज्यो लालांजी कर्ने “राणीजी, रावजी तो सांखली सूं रीझ रिया है आवै कोयनी । म्हाने, वाने कागद लिख भट बुलावो । म्हारो कह्यो सुणै कोयनी ।”

कासीद जाय कागद लालांजी रे हाथ में दीधी । कागद वांचतां ही पगां री भाळ माथा तक गी । आंख्यां में तरवरा आयग्या पण जोर काई ? कागद लिख कासीद ने दोड़ायो । लिख्यो “कागद वांचतां पाण उमा ने ले वेगा पधार जो, देर लागी तो म्हने मरी जाणजो ।”

कासीद कागद लाय परधान ने दीधी । परधान डोढ़ी पै जाय डावड़ी रे साथै रावळा में नजर करायो । उमा कागद देखतां ही बीने पढ़ फाड़'र सो टुकड़ा कर फैंक दीधी । आंख्यां कांठ बोली “जा परधानां ने कैदे, रावजी तो आंख्यां ही कागज नीं देखै, फाड़'र फैंक दीधी ।”

कामदार, परधान सारा ही सोच में पड़्या । अवै काई व्हे । आपां री पूंच भीतर तक नीं । रावजी दरसण दे नीं । कागद पूंचै नीं । अठै कतराक मीनां वैठ्या रैवालां । फेर कासीद दोड़ाय लालां मेवाड़ी ने सारा समाचार कैवाया ।

लालां तो लाल पीळी पड़गी । आंख्यां सूं आंसू री धारा देंवे । मूहता ने बुलाय कह्यो, “मूहताजी, अवै तीजी होवेला । कै तो रावजी ने घरै लावो कै म्हूं अमल खायनै मरूं ।”

“खमा करो, अन्दाता । अमल खावै आपरा दुसमण, अस्या क्यूं बोलो ।”

लालांजी रुदन करता मे'लां सूं वारै निकळवा लाग्या । लालांजी ने मूहतो हाथ पकड़ पाछो लायो'र आप जांगळू चाल्यो । लालांजी वैठ्या विलाप करै । सारो गैणो फैंक दीधी । चूंदड़ी रा चारू पल्ला आंसुवां सूं भीजग्या ।

खिण बाहर खिण महल में, खिण खिण करै विलाप ।

आंख्यां नावै नींदड़ी, सोकरा तराँ संताप ॥

सोक रा दुख सूं आंख्यां में नींद आवै नीं । रोय रोय नैण सुजाया ।

“मूहता क्यूं आयो ?” एक दिन मूहता री अरज रावजी तक पूंचगी ।

जिण राजबीं रे आपरो राज नीं व्हे वो परायै घरै आयनै वैठै । जवाँई चार दिन रा

पांवणा । आप रे मन व्हे तो गैलां में बीस दिन वत्ता ठैरांला पण सासरै रैणो फूटरो नीं लागै ।”

रावजी रे जचगी, “बात सांची, चालो सीख मांगो ।”

रावजी विदा व्हीया । द्रव दायजो, हाथी घोड़ा, दास दासी सब दीधो । दो दो कोस पै डेरा करता आगै बढै । हंसी खुसी राग रंग करता घीरै घीरै मुसाफिरी करै । उमा बीणा बजावै रावजी ने रिभावै । भीमां कविता सुणावै, रावजी रीभां दे । मारग मे सिकारां खेलता चालै । भीमां रो घणों मान राखै, घणी खातर करै । उमा बैठै जीं पालकी में भीमां ने बैठावै । छोरचां उमा री चाकरी करै जीं सूं सिवाय भीमां री करै ।

उमा कदे ही कदे ही पूछै, “भीमां, ये सुख कतराक दिनां रा ?”

“उमा घबरा मत, माथा पै आवैला जीने भेलणो ही पड़ैला ।”

यूं करतां करतां मारग में छै मास लागग्या । ज्यूं ज्यूं गागरूण रो गढ़ नजीक आवै ज्यूं ज्यूं रावजी रो मन उदास व्हेतो जावै । उमा मनावै ये घड़ियां लांबी क्यूं नीं व्हे जावै ।

भीमां समभावै, “म्हारी चतराई पै भरोसो राख । रावजी ने लालांजी रा मे'लां सूं काढ थारा मे'लां में बिलमाय दूला । म्हारी बीणा पै सांप तक कुंडाळो मार बैठ जावै, रावजी तो मिनख है ।”

चालतां चालतां एक दिन गागरूण गढ़ आयो हीज । मे'लां में बघावणां कर लीघा । आगै लालांजी तो नो ना'र बारा चीतरा व्हीया वैठ्या हीज । सारी रीस ने आख्यां सूं अर मूंडा सूं काढता बोल्या, ‘रावजी, जसी थां म्हारा सूं कीधी कोई कीसू' ही नीं करै ।”

ठंडो छांटो न्हांकता रावजी कह्यो, “म्हूं थां सूं बदल्यो नीं । म्हें वचन दीधो जो पूरो करूंला । आओ, नाराज मत व्हो ।”

रावजी नै मेवाड़ीजी तो एक व्हेग्या । उमा ने न्यारा मे'ल दे दीधा जांमें रैवे । नीं तो रावजी आवै नीं बोलै । अचछदासजी ने आख्यां देख्यां उमां ने वरस व्हेग्या । दिन रात वरस बराबर बीतै । रात दिन उमा, भीमां रे आगै विलाप करै । विरह रा दूहा वणाय वणाय बीण पै गावै । जूनी वार्ता याद कर कर रोवै । उमा रोय रोय भीमां ने सुणायो,

सुपना में अचछा कर्ने, सूती थी गळ लाग ।
जागी नै विलखी भई, जांणै इसी भुयांग ॥

उमा कैती री,

प्रीतम छेहनां दीजिये, मुभकूँ वाली जांण ।
जोवन फूल सुवास रित, भमर भले परमाण ॥

“भीमा, बीने धीरज वंवावै” थारा ही दिन आवैला, ठैर, धवरा मत ।”

“भीमां, जीं वीणा पै थूं घमंड खावै के सुणार दोड़ता हिरण रुक जावै, वीं वीणा रे कांई व्हीयो थारे ? वजाय एक दांण खीची ने तो म्हारे कर्ने दुलाय दे, एक दांण तो ।”

“म्हूं रावजी ने देखूं तो सब करलूं परण वे तो म्हारी छाया कर्ने ही नीं आवै । एक दांण म्हारा कर्ने आय जावै तो सारा काम सारलूं ।”

उमां भीमां दोई वैठी उपाय सोचै, यूं करतां करतां वरस बीतग्या । एक दिन भीमां चतराई चाली । लालांजी रे गैणा रो सोख घणो । उमा रा हार री तारीफ करण लागी । लालांजी री छोरचां सुण वाने कह्यो । लालांजी ने वीं हारने देखवा री हूंस आई । हार मंगायो । भीमां जाय भट लालांजी रे गळा में हार न्हांक दीघो । हार ने देख लालांजी रे मूंडा में पाणी आयग्यो, “म्हारे ही अस्यो को अस्यो गढ़ावूं । एक रात म्हारे कर्ने छोड़ दो । काले पाछो भेज दूंला ।”

“एक रात रावजी ने म्हारा मेंलां भेज दो तो यो हार थारो ।”

भीमां निसांणो मारचो । लालांजी मानगी एक रात में कांई है ।

रात ने रावजी आया तो मेवाड़ी सोळा सिणगार कर गळा में हार पैर मुजरो कीघो । रावजी री नजर हार पै अटकगी ।

“लालां यो नोलखो हार ?”

“म्हारा पीहर सूं आयो”

“राणाजी रो घर है । सैस मेवाड़ रा धणी । क्यूं नीं अस्यो गहणा दे ।” “आप काले उमा रे मेंलां जाय पोढ़जो परण कमर बन्धो खोलजो मत, बोलजो मत ।”

रावजी अचरज सूं लालां रो मूंडो देखवा लाग्या । आज ईं मूंडा सूं ये बोल, कह्यो तो कांई नीं परण मन में घणा राजी ।

“भीमां, आज थारी चतराई, समझदारी करणो व्हे जो कर लीजे” घड़कती छाती उमा कह्यो ।

उमा रा मे'लां में आज उजाळो व्हीयो । ताक ताक में घी रा दीवा संजोया । चंदण काठ रा ढोल्या ने आज कसाय भीमां त्यार करायो । भीतां पै गुलाब जळ छिड़क्यो । छोरचां सवेरा सूं त्यारचां करवा लागी । भीमां आपरी वीण रा तारां ने कस'र बांध्या । इत्तर री सुगंध री धोरां उड़ री । उमा री छाती घड़क री । एक पल मूंडा पै नूर चढ़ै दूजे पल आख्यां में उदासी । हाथ जोड़ देवता मनाय री । सांभ पड़ी । उमा सनान कीधो । पोसाक सात बरसां सूं काढ'र पैरी । नैणां में काजळ सारचो । ललाट पै कस्तूरी रो तिलक लगायो । बाळ बाळ मोती सारचा जतरा सात बरसां में आख्यां सूं मोती टपकाया जतरा ही ।

रात पड़ी रावजी आया । खमा, खमा कर भीमां बधाय लाई । लाखां मनोरथ हिवड़ा में दवायां सात सात बरसां रा वियोग पछै मिलवा री घड़ी आई । खांत भरचोड़ी उमा साम्ही गी । है ! पण बीरा पग बठै रा बठै थम गया । हालणी नी आयो बोलणी नी आयो । रावजी उमा साम्हां भाक्या तक नी । तरवार सिराणै राख, बंध्योड़े कमर बंदै ढोल्या पै मूंडो फेर सोयग्या । उमा धीरै धीरै आय ढोल्या कने पगांत्यां ऊभी रैगी । रावजी उमा साम्हा भाक्या तक नी । रावजी बतळाया नी । भीमां ये हाल देख वीण ले माळिया बारै बजावा ने बैठी । वीण रा तार हाल्या, लारै लारै आसावरी राग में गावा लागी ।

घिन उमादे सांखली, थें पिव लियो मोलाय ।
सात बरस रा बीछड़्या, तो किम रैग विहाय ॥

घन है, उमा थनें । थें आज थारा पीव ने मोल ले लीधो । सात सात बरसां रा थां बिछड़चोड़ा हो, अर या रात ईया किया बिताय रिया हो ?

किरती माथै ढळ गई, हिरणी लू'वा खाय ।
हार सटै पिव आणियो, हंसै न सामो थाय ॥

“किरत्यां रा तारा ढळ गया । हिरणां रो तारो नीचै उतर गियो । आधी रात बीत गी । हार रे साटै पिव ने लाया पण यो तो नीं तो हसै अर नी माम्हो ही भाकै ।”

उमा रे आख्यां में सूं तो आंसू री बूंदें टपकै । ढोल्यां कने ऊभी ऊभी रावजी रा पग दबावै । रावजी सूता सूता भीमां रा दूहा सुराँ । उमा रे आंसू पड़ता देख्या तो भीमां ने अबकाई आई । दूहो गायो,

चनण काठ रो ढोलियो, किस्तूर्यां आवास ।
घरा जागै पिव पोढ़ियो, वाळूं यो घरवास ॥

चंदण रो ढोल्यो व्हे तो कांई ? किस्तूरी रो सुगंध आय री है तो कांई ? कांई पड़चो यां में ? जीं घर में लुगाई तो जागै आंसूड़ा टपकावै अर पिवजी सूतो नींद लेवै, अस्या घर में वासदी मेलो । कांई काम रो अस्या घर ?

लालां लाल मेवाड़ियां, उमा तीज बल भार ।

अचल एराक्यां ना चढै, रोड़्यां रो असवार ॥

लालां तो खैर लालां है, उमा री होड़ कांई करै । अचलदासजी तो रोड़्यां रा, टट्टां रा सवार है, एराकी घोड़ा पै थोड़ा ही चढ़ जाणै ।

अवै भीमां जीभ रा तीर छोड़वा लागी । मन रा दुख ने वीण रा तारां पै चढ़ायो ।

काले अचल मोलावियो, गज घोड़ां रे मोल ।

देखत ही पीतल हुयो, सोकड़ल्यां रे बोल ॥

काले हीज तो ईं अचलदासजी ने म्हां हाथी घोड़ां रे भाव मोल लीधो, ओ तो देखतां देखतां सोकड़ल्या रे सिखावा सूं पीतल व्हेयो ।

धन दिहाड़ो धन घड़ी, में जाण्यो थो आज ।

हार गयो पिव सो रह्यो, कोई न सरयो काज ॥

म्हें तो जाण्यो आज रो दिन धन है आज मिलांला पण म्हांरो तो हार ही गियो अर पिव ही सूतो पड़चो है । म्हांरो तो एक हीं काज सरचो नीं ।

निस दिन गई पुकारतां, कोई न पूगो दाव ।

सदा विलखती धरण रही, तोई न चेत्यो राव ॥

रावजी सूता सूता सुणै । काळजा में खटका तो पड़ै पण बोलै नीं । उमा रो काजळ बैय बैय टप टप पड़ै । पग दवातां दवातां बीरा हाथ दूखवा लाग्या । भीमां देख्यो, अस्या अस्या बोल सुणाया यां ने रीस देवावा ने पण बोल्या नीं, अवै यां ने रस री वातां कैवूं तो यां रो सूतो लगो नेह जागै ।

तिलक न भागो तरुणि को, मुखै न बोल्या बैण ।

माणक लड़ छूटी नहीं, अजेस काजळ नैण ।

मूंडा सूं थें कोई बोल्या नीं । तरुणी रा माथा रो तिलक ही कोनी बिगड़चो । मोतियां री लड़ां ही नीं बिखरी । आख्यां रो काजळ ही ओजूं यूं रो यूं है ।

हार दियो छेदो कियो, मूक्यो मांण मरम्म ।
उमां पीव न चक्खियो, आडो लेख करम्म ॥

गांठ रो हार दीवो, छच्छन्द कीधा, आपणो मान गमायो । अतरो करतां ही उमा रो तो पिव सू संयोग ही नीं व्हीयो । करम में आडो लेख है ।

ओढण भीणां अंवरां, सूत्यो खूंदो ताण ।
ना तो जायो वालमो, ना वण मूक्यो माण ॥

भीणी चादरा ओढ़, खूंदो तांणचां सोय रिया है । नीं तो पिव ही जागै नीं वण ही मान ने छोड़ै । रात यूं ही बीत री है ।

अस्या अस्या कामोत्तेजक दूहा सुणाया पण खीची तो हात्या नीं । वचन निभावता रिया । भीमां ने रीस आई तो वीं जोर चूं कह्यो,

खीची वेचां हे सखी, जे कोई खीची लेह ।
काल पचासां म्हां लियो, आज पचीसां देह ॥

खीची ने वेचां हां, कोई खीची ने मोल लो, कोई मोल लो । घरों सूंधो । काले पचास में म्हां मोल लीवो आज पचीस में ही देवां । कोई लेणो व्हे तो लो ।

यूं गावतां रोवतां सारी रात बीतगी । पौ फाटवा लागी लालांजी री छोरी रावजी ने लेण ने आय ऊमी री । आसा छोड़ उमा, भीमां ने कह्यो,

मांग्यां लाभै जव चणां, मांगी लभै जुवार ।
मांग्यां साजन किम मिलै, गहली मूढ गंवार ॥

मांग्योड़ी चीज कदे ही आपणी व्ही है के ? मांग्यां तो जी, चणां मिलै । गहली, कदे ही मांग्या ही साजन मित्या है ? यांरा यांने ले जाए दे ।

लालांजी री छोरी बोली,

पोह फाटी पगडो भयो, व्हाला वीछडियाह ।
मेल सखी म्हारो वालमो, थांका कज सरियाह ॥

जद भीमां वीण ने फैंक कह्यो,

पोह फाटी पगडो भयो, विछड़ण री है वार ।
ले सखि थारो वालमो, उर दे म्हारो हार ॥

सेजा थारा वालमां ने म्हांने म्हारो हार सूं ।

रावजी जाए लाग्या तो भीमां ने पूछ्यो,

“थो थां राते काई कह्यो, हार साटै पिव आणियो ।

“रावसाब, म्हां तो आपने हार रे साटै मोल लीघा हां एक रात सारू । म्हारो तो हार ही गयो’र थां ही चाल्या, काम सरघो नीं एक ।”

“मेवाड़ी री या हिम्मत के मनें वेचै” रावजी रे ललाट में तीन सळ पड़ग्या, आंख्यां राती व्हेगी ।

भीमां भट बळती में पूळो मेल्यो,

लालां मेवाड़ी करै, बीजो करै न कोय ।

गायो भीमां चारणी, उमा लियो मोलाय ॥

और लालां सिवाय कुण वेचैला ? उमा थाने मोल लीघा है अर भीमां गाय गायनै या बात दुनियां में केय री है ।

“उमां अचळ मोलाविया ज्यूं सावण री लूंम”

रावजी रे काळजा में भीमां री वातां चुभगी । बोल्या, “लालांजी ने म्हारा सूं ही हार आछो लागै ।”

उमा दांतण करो, कैवो तो लालां रे मे’लां में पग देवा री सोगन ले लूं ।” उमा बोली “अवारू तो आप पघारो म्हुं बुलावो भेजूं जद बैठ्या व्हो ज्यूं रा ज्यूं म्हारे पघार आजो ।”

लालां मेवाड़ी रे मे’लां में बैठ्या रावजी चोपड़ खेल रिया । उमा री छोरी आई ।

“वाईसा बुलावै ।”

हाथ रा पासा फैंक रावजी उठ्या । लालांजी पल्लो पकड़ खिंचता बोल्या “जावो कठै ? रमत पूरी करो ।”

“थां तो, म्हांने सांखली ने वेच दीघा, फेर काई ?” पल्लो छुड़ाता रावजी चाल्या । “थां सूं घरवास करूं तो राणाजी री सोगन” लालांजी रीस में आय सोगन खाय बैठ्या ।

उमा रा चीत्या व्हीया । रावजी उमा रे मे’लां रैवा लाग्या ।

सोरठ

खळळ खळळ करती नदी बँय री, ऊगता सूरज री किरणां सून चमक चमक करती लैरां एक दूजी रे पाछै भागी भागी जाय री। जाणै होड़ लगाय री व्हे के कुण आगै निकळें।

नदी रा किनारा ऊपरली सिलाड़ी पै कपड़ा पछांटता घोवी री नजर नदी रा पाणी में बैवती, कोई चीज पै पड़ी जो सूरज री किरणां में चमकती धीरे धीरे बैवती आय री।

कनें ही चांपो कुम्हार माटी खोद रियो, घोवी हेलो मारचो, “डेख तो कांई बैवतो आवै?”

दोई जणां 'ऊभा व्हे देखण लाग्या, “है कांई? पींजराघटी कोई चीज बैवती आय री है, ईने काढ़ां।”

घोवी बोल्चो, “पींजरो म्हारो, मांयने जो चीज व्हे वा थारी।”

चांपो अर घोवी लंगोट बांध दोई पाणी में कूदचा, रस्सो घाल, खैचनै किनारा पै लाया, सोना रो काम व्हीयोड़ी पींजरो। पींजरो खोलै तो मांयने रुई रा पैल में दवायोड़ी टावरी, दो च्यार घड़ी री जनम्योड़ी, जाणै गुलाब रो फूल व्हे। “हाय, हाय, कुण हत्यारो है? है तो मोटा घर री पण बैवाई क्युं?”

चांपो कुम्हार टावरी ने उठाय छाती रे लगाई, “भगवान री इच्छा है, म्हारी नपूतिया री भगवान ने गोद भरणी ही।”

“पींजरियो घोवी लियो, सोरठ लई कुम्हार।”

कुम्हार लेजाय कुम्हारी री गोद में दीधी।

“ले भगवान भेजी है, पाळनै मोटी कर।”

कुम्हारी छाती रे लगाय लीधी, छाती में मोह सून दूध उत्तर आयो। आख्यां री

पलकां ज्यूं ईं ने राखै ।

सांचोर रा राजा रायचन्द देवड़ा रे घरै मूळ नखतर रा पैला पाया में वेटी जनमी, ज्योतसियां कह्यो, “वाप रे अनिष्ट कारक है ।”

राव अहैड़े नीसरिया, साम्ही मिली छै धाय ।

मूळां जाई डीकरी, नदियां देवो वैवाय ॥

राव तो मूळां जाई डीकरी ने नदी में वैवाई पण चांपा कुम्हार रे आंगणां में आणंद उतरग्यो । दोई मोट्यार लुगाई पल पल मुंहगी करै, वारी बरसां री आसा, कदे ही वारा ही आंगणां में, “भूख लागी, भूख लागी” करतो टावर पगां ने पटकतो घूघरिया वजावतो रोवैला, पूरी व्ही । “मां” सवद सुणवा री भूख वृम्हारी रा काळजा ने चूँटती रैती, टावरी ने पल्ला नीचै ढांकनै मूँडा में वोवो घालती वा निहाल व्हेगी ।

चांपो पालणां में हुलरावतो बोल्यो, “आखा.सोरठ देस में फिरजा जो थने असी रुपाळी कोई लाव जावै तो । सारा सोरठ रो रूप भेलो व्हे ईं में आयग्यो है ।”

नाम राख्यो सोरठ । सोरठ तो मोटी व्हे सुकल पक्ष रा चांद री नाई, घड़ी वघतां पल वघै । कुम्हार री भूँपड़ी में जांगै चांद पवास्यो ।

चांपो ज्यूं सोरठ मोटी व्हे ज्यूं वींरी घणी सम्हाळ राखै । बारणै मांयनै नीं आवा जावा दे । कुम्हारी ने समभावतो रै,

“देख कठैई कोई मोटा राजवी री नजर सोरठ पै नीं पड़ जावै । नीं तो आपणो अभाग व्हे जावैला, सोरठ ने मांग लेगा, खोस लेगा । थूं ईं ने घर वारै मत निकळवा दे ।”

हूध अर पूत ही कदे ही छिपायां छिपै के ?

पोळ री धेली कनें दूजी कुम्हारां री छोरचां साथै सोरठ ऊभी । अतराक में गिरनार रो राव खंगार वींभा ने लारै लीबां, सिकार खेलतो खेलतो वीं गैले व्हेने निकळयो वींभा री नजर सोरठ माथै पड़ी, दृष्टि डिंगायां डिंगै नीं ।

सोरठ थानें देखिया, जाभा भूलर मांहि ।

जांगै चमकी वीजळी, गुदळै वादळ मांहि ॥

वींभो तो वठै रोवठै लट्ठू व्हेग्यो । राव खंगार रो घोड़ो बीस कदम आगै निकळयो, पाछै फिरनै भाकै तो वींभो अटक्यो ऊभो । घोड़ो पाछो मोड़यो ।

राव खंगार ने आता देख वींभो सोरठ साम्ही आंगळी करतो बोल्यो,

कुम्हारों री डीकरी, ऊभी मांड तळांह ।

वींभो पूछै राव ने, कहो तो मोह करांह ॥

अतराक में कुम्हारी आई, सोरठ ने पोळ में ऊभी देखी, वारै घोड़ा सवारों देख्या,
भट सोरठ रो बांवटचो पकड़ नै खैच लेगी ।

आव परी कै जाव परी, अघबिच ऊभी कांह ।

कोयक गरास्यो देख सी, कळंक लगावै मांह ॥

जाती जाती सोरठ रो पळाको राव खंगार ने पड़्यो । माथो घूण लीघो । वींभो कह्यो “ई” ने मूंडै मांग्यो धन दे मोल लेलां ।”

खंगार हूंकरो भरचो । बीभै जाय नै चांपा ने कह्यो । चांपै जवाव दीघो, “परथी रो राज दे दो तो ही म्हंने वेटी वेचणी नीं ।”

राव खंगार बोल्यो, “वेच मत । म्हूं गिरनार रो राजा हूं म्हंने परणाय दे ।”

चांपै कुम्हार हाथ जोड़्या, “सगपण आपरा वरोवरिया सूं चोखो लागं आप राजा म्हू कुम्हार, आपने परणाय दूं तो काले म्हारी वेटी ने वीरीं सोक्यां मोसा वोलै “दूरी रै कुम्हार री छोरी ।” ईं वास्ते परथीनाय म्हूं तो म्हारी छोरी ने म्हारा जसी जात वाळा ने ही परणावूंला ।”

वींभै घरणो ऊंचो नीचो लीघो पण चांपो मान्यो नीं । दोई मामा भाणेज गिरनार आडी ने चाल्या पण बीभा रे काळजा में तो सोरठ री तसवीर कोरणी आयगी । असी ऊंडी उतरगी के काढ्यां कढै नीं । रात दिन सौचतो रैवै किस तरै सोरठ ने लावूं ।

चांपा कुम्हार ने सोच लाग्यो, अवै सोरठ ने परणाय देणी । चोखो घर वर देखतो फिरै । भाग री वात वणजारा रो राव रुड़, सांचोर आय निकळ्यो । लखपती वणजारो, मोकळो धन आगं दीघां पाछै पड़ै । “भाड़ भंजण” जीरो विड़द लाख पोठी लारै लदै ।

चांपै मन में विचारचो ईं ने-सोरठ ने परणाय द्यां, वैठी राजस करैला । रुड़ ने परणवारो कह्यो । सोरठ जसी नार ने कुण नटतो । राव रुड़ रे लारै व्याव कर दीघो । रुड़ जीं रो जीं वगत काठ रो जाळीदार पींजड़ा-घट्टो मे'ल वणायो, जीरे पैड़ा लगाया । वीं मे'ल में सोरठ ने वैठाई । जठै आप जावै जठै लारै रो लारै, पींजड़ा जस्या मे'ल रे वल्ल्या जोताय साथै लीघो फिरै ।

वींझा ने खबर लागी सोरठ रे व्याव री । मन में राजी व्हीयो खैर बणजारा तो फिरता ही रैवै, कदी न कदी तो गिरनार आवैला हीज ।

छै मीना व्हेग्या, सोरठ रूड़ रे लारै गांव गांव पैड़ा बाळा मे'ल में बैठी फिरै । गिरनार रो तरभंगर जंगल, भाड़ी सूं भाड़ी अड़ री । खलखल करता भरणां भर रिया । पहाड़ में बब्बर ना'र डक्कर रिया । गिरनार रा पहाड़ पै टम टम करती साधुवां री सैकड़ा घूणियां बल री । ऊंचा खूँखड़ा पै हजारों दम दम करता आग्या (जुगनू) ईं डाळ सूं वीं डाळ पै उड़ उड़नै बैठ रिया । आधी रात रो वगत, बणजारा रूड़ री बाळद आय री । बैल्यां रा गळा में बंधी लगी घंटियां भरण भरण करती जाय री । रमभम रमभम छांटा पड़ रिया, वींझो ऊंचो माळिया में सूतो पण आंख्यां में नींद नीं, सोरठ री तसवीर रै रै नै आंख्यां आगै आय जावै । बैल्या री घंटियां रो भणकारो सुण वींझो आदमी भेज्यो खबर लावा ने, आधी रात कुण आयो ।

आदमी खबर लायो, बणजारा रूड़ री बाळद आई । वींझो सूतो ज्यूं रो ज्यूं ऊभो व्हेग्यो, खंगार रे मे'लां चाल्यो । खंगार पोढ रियो, परधान सींहो पोळ पै बैठयो ।

वींझो तो जाय राव खंगार ने भंभेड़चा, “वघाई बगसो, राव रूड़ आयो ।”

राव खंगार कोटवाळ ने बुलाय हुकम दीघो “बाळद ने आछी जगां डेरा देवावो, तंवू ताण दो, आछी सरभरा करो ।”

वठी ने तो बणजारा रा डेरा लाग रिया, सरभरा व्हेय री, अठी ने वींझा ने सारी रात नींद नीं आई । कदी दिन ऊगै अर कदी जावूँ ।

पोह फाटतां सोरठ री नींद जागी, उठ'र जाळीदार काठ रा मे'लां में बैठगी ।

वींज वगत वींझो बणजारा रे डेरे पूग्यो । वींझा री नजर सोरठ सूं मिली, चो नजर व्हीया । वींझो तो पे'लां ही घायल व्हीयोड़ो हो, सोरठ ही आपो भूलगी । एक दूजा ने देख्यो अर एक दूजा रो व्हेग्यो, ऊमर भर सारूँ । एक दूजा आंख्यां में मन री सारी पोथी बांच लीधी पण तीसरा ने खबर पड़ी नीं ।

वींझो, आछी तरह सूं रूड़ बणजारा री खातरी कर मे'लां आयो । आय अरज करी ।

“सोरठ ने सेवणी व्हे तो बणजारा रे लारै चौपड़ खेलां ।”

राव खंगार बात मानी, रूड़ रे लारै घणी वातां चीतां व्ही, चौपड़ री वाजी जमी ।

राव खंगार चोपड़ खेलै अर वींभों पासा फैंकै ।

खेलतां खेलतां वणजारा रो सारो माल सोरठ रा पीजड़ा सूधी जीतग्यो ।

वींभो जीत्योड़ा माल ने लेवा वणजारा रे डेरे चाल्यो ।

माल तो सारो राव खंगार रे मै'लां पूगतो करायो अर सोरठ रो पीजड़ो आपरे मै'लां रवाना कीधो ।

मे'लां री चानणी पै ऊभो ऊभो राव खंगार देख रियो, सोरठ रा पीजड़ा ने वींभा रा मे'लां साम्हा जावता देख ने हुकम दीधो, “यो पीजड़ो म्हारो मे'लां में लावो ।” वींभो मूंडो देखतो रैग्यो, सोरठ रो मूंडो उतरग्यो । राव खंगार देखै तो पीजड़ा में सोरठ बैठी जांरै इन्दर लोक सूं अपसरा उतरनै आई व्हे । खंगार री खुसी रो हिसाव नीं ।

वींभा ने कह्यो, “वणजारा सूं जीत्योड़ो सारो घन थारो, यो पीजड़ो म्हारो ।” वींभो तड़फग्यो ।

“सारो जीत्योड़ो घन आप राखो, म्हंने तो पीजड़ो दे दो, म्हारे तो ईं पीजड़ा मांयलो घन चावै और कांई नीं चावै ।”

राव खंगार मान्यो नीं, सोरठ ने आपरे रावळा में भेज दीधी ।

वींभो मन मार दरवार में जाय बैठ्यो ।

ऊंचो गढ गिरनार, आवू पै छाया पड़ै ।

सोरठ रो सिणगार, वादळ सूं वातां करै ॥

ऊंचा गिरनार रा, ऊंचा गढ़ में बैठी जद सोरठ सिणगार करवा लागती तो वायरा रे लारै उड़्या जावता वादळा ही गैला में दो पल सोरठ ने देखवा ने रुक जाता ।

सुपारी रा रंग जसी सांवळी सोरठ रा लूंगां जसी चरपरी देह गन्ध तर व्हीयोड़ो वायरो, गिरनार री सारी वणराय ने मैहकातो बैवा लागतो । सोरठ रा रूप री महक सूं सारो गिरनार पहाड़ सुगंधित व्हेग्यो ।

सोरठ रंग री सांवळी, सुपारी रे रंग ।

लूंगां जेड़ी चरपरी, उड़ उड़ लागै अंग ॥

सोरठ रा भांभर री भणकार सूं गढ़ घूजवा लागतो, गिरनार पहाड़ गाज उठतो ।

भांभर रा घूघरा रा भणकारां सूं मे'लां री भीतां गूंजवा लागती ।

सोरठ गढ़ सूं ऊतरी, भांभर रे भरणकार ।

धूज्या गढ़ रा कांगरा, गाड़्यो गढ़ गिरनार ॥

सोरठ रा रूप ने देख ने कुण थिर रै सकतो ?

सोरठ सिरणगार करनै गोखड़ा में चढ़ती तो गिरनार रा गढ़ रा कांगरा एक टक देखता रै जाता, गिरनार पहाड़ आपरी चोटी ने ऊंची कर भांकवा लाग जातो । विरछ भोला खाय खाय आपणां पानड़ा ने सरावणां रा सनेसा दे दे गोखड़ा में उड़ाये देता ।

विरछां रा कांधा पै लटव्योड़ी बेलड़्यां डाळां ने गाढी पकड़ लट्ठवण लागती । आंवा रा मोड़ां रा रस पीवता भंवरा ही मींजरां छोड़ बठीने भणणाटा लेवा लाग जाता । सोरठ रे रूप में अस्यो आकरसण हो जो देखवा वाळो एक दाँण चेतो खोय देतो । बाणिया बैपार करणो भूल जाता, करसां रा हाथ सूं बलद छूट जाता ।

सोरठ गढ़ सूं ऊतरी, कर सोळा सिरणगार ।

वरणज गमाया बाणियां, बलद गमाया गंवार ॥

सोरठ बैठी राजस करै राव खंगार हुकम हुकम करै, पल पल पाणी उतारै । सोरठ रा मन में तो वींभो बैठ्यो लगो । राव खंगार सोरठ ने लारै ले घणा रंग राग करावै, गोठां माठां करावै, रात दिन आणंद करै । राज काज रे काम ने भूल राख्यो । यूं करतां करतां छै मीना व्हेग्या । राव खंगार ने वारै मूंम पै जावणो, अतरा दिन तो टाळ्या पण जावणो ही पड़्यो । जाती वगत सोरठ ने पूछ्यो,

“धारो जीव किस तरह लागैला ।”

सोरठ उदिया ढोली ने मांग लीघो के ईं ने हुकम दे जावो जो म्हारी ड्योढी पै गाणो करवो करै ।

राव तो मूंम विदा व्हीया नै वींभा ने पाछलो काम सूंप्यो, कूंचियां जनाना री सूंपी । राव चाल्या । वींभा रो जीव उथल पुथल व्हे रियो, दिन में सौ सौ निसासा न्हंकि । सोरठ सूं दो बात करवा ने उमगायो रैवै पण ओसर लादै नीं ।

सोरठ डाळी अंव री, ऊगी विखमी ठाय ।

वींभो वंदर हो रियो, कद टूटे कद खाय ॥

वींभा रा भाग सूं एक दिन डाळी टूटी । सोरठ बैठी माथो गुंथाय री । उदियो ढोली ड्योढी पै माढ रा दूहा देय रियो । सोरठ री नजर दरवाजा पै बैठ्या, जीवन

में छक्या वींभा पै पडी । एक बुलावो भेज्यो, दूजो बुलावो भेज्यो । वींभो आयो ।
सोरठ बोली,

वींभा म्हाके आंगणां, नित आवो नित जाय ।
घट की वेदन वालमा, तो सूं कही न जाय ॥

वींभै आपरा मन री दसा बताई,

वेदन कहां तो मारिजां, कहतां लाज मरांह ।
म्हे करहा थे बेलड़ी, नीरो तोही चरांह ॥

सोरठ बोली, “राव खंगार म्हुने चोपड़ में जीती तो कांई ? जीत्यो तो म्हारो सरीर
ही । परा म्हारा मन ने जीतवा बाळा थां हो । सरीर रो धणी मन रो मालक नीं
वण सकै, मन रो मालक सबरो मालक व्हे ।”

वींभा ने लाग्यो जांणै आकास सूं अमरत री बरखा व्हेय री । निहाल व्हीयोड़ो
वींभो सोरठ रा हाथ ने हाथां में भाल लीधो ।

सोरठ खुलासा कीधो, “आखी ऊमर निभावो तो हाथ पकड़जो ।”

वींभै सूरज ने साक्षी कीधा, “जीवतो तो थारा सूं बीछड़ूं नीं मर जावूं तो दोस
मत दीजे ।”

दोई जणां सूरज ने अर भगवान ने साक्षी कर, मन रो गठजोड़ो बांध आतमदान
दीधो । परतंग्या लीधो, “एक दूजा सूं अळगा कदे नी व्हां ।”

वा ! वींभो तो अस्यो रमियो के फिरै नै सोरठ रे मे'लां में जावै । सोरठ उमगी
बैठी बाट जोवै । वींभा रो तो सोरठ रा मे'लां में आवणो व्हीयो नै उदियै ढोली
दूहो दीधो,

वींभो बाळक डावड़ो, हिलयो वागां जाय ।
डाळ मरोड़े रस पिवै, फळ लाखीणा खाय ॥

वींभै सुण्यो, सोरठ सुण्यो, दोई जणा दूहा रो मरम समझ्या एक दूजा साम्हा
भांक्या । सोरठ गळा रो हार उतार नै उदिया ढोली ने नीचै फैंक्यो ।

अवै तो रात दिन वींभो सोरठ रा मे'ल में रैवै । उदियो गावै अर वे रीभां करै ।
दिन तो घड़ी ज्यूं जावै अर घड़ी पल ज्यूं बीत जावै ।

सोरठ अर वींभो तो दूध अर पाणी ज्यूं मिलग्या । फूल अर गन्ध ज्यूं एक जीव
एक मन दो सरीर ।

वे जाणता हा कस्या खतरा सून वे खेल रिया है, कदे ही बींभो गळगळो व्हे सोरठ ने पूछतो, “थू सांची बता कठै ही राव रे आयां वांरा मै सून कमजोर तो नी निकळ जावैला ? म्हारा सोना, कठै ही थू पीतळ मत निकळ जाजे ।”

सोरठ सोना रो टको, पर हत्थ लो परखाय ।
खोटा कळजुग वापरचां, (राणी) मत पीतळ व्हेय जाय ॥

सोरठ कदे ही पूछती, “म्हंने भूल तो नीं जावोगा ? देखो म्हारा सून दूरा तो नीं व्हे जावोला ?”

“सोरठ थू असी ऊंडी गङ्गी है काळजा में । जीवतो तो कांई म्हूं मर जावूं नै थू आय मसाणां में हेलो मारै तो म्हारी भसमी बोल उठैला ।”

अस्या समै में उदियो गावतो,

सोरठ थां में गुण घणां, कदियन ओगण होय ।
गूंदगरी रा पेड़ ज्यूं, रतियन खारो होय ॥

सोरठ री तारीफ सुण बींभो बाग बाग व्हे जातो । तपता तावड़ा रो तातो वायरो ही सीतळ लागवा लाग जातो । अंधारी रात ही उजाळी उजाळी दीखवा लागती । सारो जगत एक घेर घुमेर आंबा रा पेड़ जस्यो दीखतो, जो पाका आंबा सून लडालूँव व्हेय रियो व्हे । डाळ डाळ पै तिरपत कोयलां बोल री व्हे । रस सून छाक्या भंवरा मांजरा रै ओळूं दोळूं घुमर घाल रिया व्हे । जांण ईं जगत रो पत्तो पत्तो कैवतो व्हे,

“आंबी रस पीवजो पिलावजो”

पण यो सुख रो संसार कतराक दिनां रो ?

अठीने वठीने चरचा चालवा लागी, कानां में वांतां व्हेवा लागी । सोरठ रे ही भणकारो पड़्यो, चमकी । बींभा ने आयनै कह्यो ।

बींभो बोल्हो, “डरपगी ? बावळी ! प्रेम ही कदे छिपायां छिप्यो है ? फूलां री सुगन्ध कदे ही छिपी री है ? फूल रे खुलतां ही सुगन्ध ने पवन ले भागै अर च्यारू आडीने दिखेर देव तो फेर प्रेम रो पवित्तर फूल खुलै जीरी खसबोई तो दस ही दिसा में फूट्यां विनां किए तरै रै सकै ?”

सोरठ वांरां पवित्तर अर गाढा नेह पै सोचती लगी कैवती, “बींभा ! पूरवला जनम में आपां रा हाथ सून कोई मोटो पाप व्हीयो जो ईं जनम में आपां अतरा दूरा पड़्या । कोई सराप रे कारण विछोड़ो व्हीयो ।”

जीवण रा अतरा बरस जो एक दूजा बिना अवार तेक गमाया, वां वीत्योड़ा बरसां पै नजर न्हाकता, पछताता लगा मोटो नीसासो न्हांक देता । संजोग रो एक एक पल अमोलक लागतो, अभिलाखा करता या सारी जिन्दगानी यां दिनां री एक घंडी बण जावै, परा यूं व्हे कठै ? संजोग री घंडी तो पल ज्यूं वीतै अर विजोग रा पल बरसां ज्यूं लांवा बघ जावै ।

अंधारी राति तारा टम टम कर रिया, गिरनार पहाड़ रा खाळचा में फूल्या केवड़ा री सुगध सूं घीमो घीमो वाजतो वायरो गरणाय रियो । उत्तराघ सूं वादळा गढ़ रा धूमटां रे अड़ता लगा निकळ्या । घूंसाळा में पंछी, घरां में मिनख सूता पड़्या । मांभ रात रो वगत, हिरणी रो तारो गढ़ रा कांगरा री सूध पै चमक रियो । मे'लां मांयने हिंगळू पागां रा हिंगळाट माथै सोरठ अर बीभो निसंक सोय रिया । कूणां में अतर रो दीवो बळ रियो । मंधरो मंधरो उजास व्हे रियो । चांदी री सांकळां में घल्यो हिंगळाट घीमो घीमो हाल रियो । धीरै धीरै हींडा लाग रिया जीसूं सुख री नींद ओर ही गाढी नैणा में घुळ री । टूट्योड़ी मोगरा रा फूलां री चोसरां अठीने वठीने बिखरी पड़ी । सेज में बिछायोड़ी गुलाब रा फूलां री पांखड़्यां सूं भीनो भीनो सारो मे'ल महक रियो । सोरठ अर बीभो सुध खोय गाढा सोय रिया । राव खंगार तो खड़ खड़ करता, बिना खबर कीधां मे'लां में चढ़ आया । खंगार ने देखता ही पोळ बाळा पोळ दीधी, ड्योड़ी बाळा ड्योड़ी रो ताळो खोल दीवो । राव तो सूधा सोरठ रा मे'लां में आया । देखै तो हिंगळाट पै बीभो दीख्यो । रीस रा मारयां सारो डील धूजवा लाग्यो । होठ थर थर कापवा लाग्या । हाथ सूधो कमर मे कटारा पै पड़्यो । कटार खैच नै दोवां री छाती में मारवा नै हाथ छाती तक पूगनै रुक्यो । राव ने विचार आयो, मारयां सूं काई ? ईं में तो म्हारो ही नाम कुनाम व्हेला ।”

बीभो मारूं तो भाणजो, सोरठ घर री नार ।

जांघ उघाड़्यां आपणी, भूंडो कह संसार ॥

हाथ पाछो खैच लीघो, रीस में भरया थका खंगार वारे सिराणै थांभो हो जीं में जोर सूं कटार री मारी तो मूठ तक कटारो थंभा में घंस्यो । भाळां निकळती आंख्यां सूं भांक खंगार पग पटकतां ज्यूं आया ज्यूं वारै निकळ्या ।

सोरठ अर बीभो तो नसा में मस्त ब्हीया सूता । वां ने खबर नी के कुण आयो अर कुण गियो ।

दिन ऊग्यो, उठ्या अर नजर पड़ी तो थांभा में कटारो गड़ रियो राव खंगार रो । “मूंडो धोळो पड़्यो, बीभो तो भट पाग रा अटपटा पेचां ने सूधो करतो माथै मेल

वारै किलियो । अब मेला में बैठी तो सोरठ भूरै अर वारै फिरतो वींभो तलफ । रात ने जक पड़े न दिन में । मिलै तो मरै, नीं मिलै तो रियो जावै नीं ।

सोरठ रे हिया में तो होली ऊठै, मूँडा पै दिवाली बतावणी पड़े । राव खंगार पूरी नीगै राखै । दोई जणां आप आपरा मन ने संभवा री करै पण मन समझ नीं । फल काई मिलैला जो जाणै, छानो कोयनी, पण मनायो मन मानै नीं । आपस में कीधा कौल याद आवै ।

आखैर रैवणी आयो नीं, औसर देख वींभो सोरठ कने आयो । ऊनाळा रा तावड़ा में तपी, भाळां निकलती घरती ने सावण री उमड़ती घटा घपावा ने उललती आवै ज्यूं वींभो आयो । सोरठ बरसता बादळा ने देख मोरड़ीं ज्यूं साम्ही भागी । दो पल सारूं भूलग्या के वे कठै है ? कुण है ? वाने औसाण नीं रियो के वारा माथा पै तो नागी तरवार लटक री है ।

सोरठ ने चेतो आयो, “वींभा परो जा । ऊभो मत रै अब अठै ।”

वींभो तो पूंगीं पै रीझ्या फण हलावता नाग री नाई माथो हलायो,

“भरणो एक दांण है सोरठ, कोई ईं बगत आय म्हारो गळो ही काट दे तो म्हने अफसोस नीं । थारी गळवाथ मे कोई मार दे तो म्हारी मुगती व्हे जावै । ईं वेळा री तो मोत आयोड़ी ही मीठी ।”

सोरठ साकर री डळी, मुख मेल्यां घुळ जाय ।

सिवडै आय विलूवतां, हेमाळो दुळ जाय ॥

खैर, राव खंगार ने खबर लागणी ज ही । सोरठ ने डराई घमकाई ।

वीं खंगार रे आगै साफ साफ कैय दीघो, “म्हारो सात सात भव रो पति वींभो । मारो चावै जीवावो, आप धणी हो, मन व्हे ज्यूं करो ।”

अबै सोरठ रो खंगार करै तो काई करै । सिवाई मारवा रे और काई कर सकै ? वींभा ने तुरंत देस निकालो देय दीघो । सोरठ री ब्योडी पै करड़ा पैरा लगाय दीघा वींभो देस में घुसै नीं जस्यो परबन्ध कर दीघो । जीं दिन सूं सोरठ तो राव खंगार सूं रूसणो कर लीघो । राव खंगार आवै, सोरठ री गरजां करै, मनावै । सोरठ तो विजली ज्यूं कड़क नै राव खंगार पै आवै । मूँडा पै तो सावण री घटा ज्यूं उदामी छाई रैवे अर आख्यां में सूं भादवारी झड़ी आंसुवां री लागती रैवै । उदियो सोरठ री वेदना समझै । वींभा कने जाय उदियै सोरठ री दसा रो वरणन कीघो, जाणै

सोरठ री आतमा वींभा ने हेला दे दे कैयरी व्हे ।

सोरठ नागण हो रही, ज्यूं छेड़ै ज्यूं खाय ।

आजा वींभा गारूड़ी, लेजा कंठ लिपटाय ॥

यो दूहो सुणतां हो वींभो तड़ाछ खायग्यो । सोरठ ने लावा ने उतावळो व्हेग्यो, उन्मत्त व्हेग्यो । वीं ने कांई नीं सूभी । एक नवाव हो जी ने लाळच बताय गिरनार पै चढाई कराय दीधी ।

नवाव री फोजां गिरनार ने जाय बेरचो, जुद्ध व्हीयो, वींभो सोरठ ने लेवा री आसा में दीड़चो पण ननाव सोरठ ने आपरा कब्जा में कर लीधी । वींभो कांई करै । वीं नवाव ने जतरो कैवणो हो जतरो कह्यो । जो कुछ वींरी सामरथ में ही सब कीधो पर वींभां रो कोई उपाय नीं चाल्यो । वींभो, निरास व्हे उन्मत्त व्हेग्यो, जठीने भांकै जठीने सोरठ दीखै, सोरठ रो नाम ले ले भींता सूं माथो फोड़ै, नवाव रा मेलां रे नीचै माथो फोड़ फोड़ तड़फ वींभो मरग्यो । उदियो वींभा रा मसांण में जाय बैठयो । मसांण में बैठयो वींभा सोरठ रा प्रेम गीत गावै ।

वठी ने नवाव सोरठ ने लाळच, ढरावणों, धमकाणो कर सब तरै सूं हारग्यो । सोरठ रो प्रेम वींभा सारूं अतरो अटल देख नवाव ही माथो झुकाय दीधो । नवाव सोरठ ने पूछी,

“वोल, थूं कैवै जठै थनै भेज दूं । राव खंगार कर्नें, थारा वाप चांपा कुम्हार कर्नें, कै थूं कैवै तो बिणजारा रुड़ कर्नें ? जठे जावणो चावै बता ।”

सोरठ रोवती थकी बोली, “कठेही नीं जावणो चावूं । वींभा रा मसांण में म्हंने भेज दे तो थारी मोटी मरवानी ।”

नवाव पालकी में बैठाय सोरठ ने वींभा रा मसांण में पाँचाय दीधी । आगै उदियो मसांण में बैठयो गाय रियो । सोरठ ने देखी तो उदियो पुलकित व्हेग्यो, झट गायनै वधाई,

भलां पधारी पदमणी, जहं वसिया विजचद ।

“यें थांरो सत निभायो, नेह निभायो अर वचन निभायो । खम्माघणी ! म्हारी धणियाणी, आज थाने वींभा रा मसांण में देख म्हूं निहाल व्हेग्यो ।”

सोरठ रोवा लागगी । उदिया ने याद देवाई, “धारो धणी तो कैवतो के म्हूं मरजावूं

नै थूं मत्तारणा में आय हेलो मारैला तो म्हारी भसमी बोल उठेला । ऊदिया ! बींभा ने रोय रोय हेलो मार री हूं वो आय नीं रियो है, बारो वणीं कठै गियो ? बोलायां बोलै नीं ।”

सोरठ सूरज रे साम्हे ऊमी ज्हेगी । प्रार्थना कीधी, “हे सूरज भगवान ! थूं सब देखवा वालो है, थारां सूं कोई छानै नीं । जो म्हे बींभा ने मन वचन करम सूं तेह कीघो ज्हे, जो म्हां सुद्ध ज्हां अर सती ज्हां तो थूं अगनी प्रकट कर म्हांने बींभा कने पुगाय दे ।”

सूरज री किरणां सूं अगनी प्रकट ज्ही । बींभा री भसमी भेळै सोरठ री भसमी मिलगी ।

ऊदियो तंबूरो ले जीवतो रियो जतरै फिर फिर सोरठ बींभा रा जस गीत गांव गांव में चुणावतो रियो ।



जलो

“बूवना री जोड़ रो वर कठै हेरू ?”

सिंध समंदर रा नवाब भवर ने घरणो सोच छोटी बेटी बूवना रे वर हेरवा रो ! बूवना रूप रो भंडार ! गुणां रो दरियाव !! बूवना चाले जठीने अंधारा में उजाळो व्हेतो जावे । हंसै तो यूं लागै जाणै फेफ रा फूल खिर रिया है, फिरै जदी लागै जाणै कंकू रा पगल्या मंडता जाय रिया असी एडियां री राती राती भाई पड़े । बूवना बोलती जद छाळ मारता हिरण वीणां रे भरीसै पाछा फिर न्हाळवा लाग जाता । वीरा डील में सूं भीणी भीणी सुगन्ध आवो करै ।

स्यांणा समभणां बादसा ने कह्यो, “बूवना पूरी पदमणी है, अस्त्री में जतरा लक्षण व्हेणां चावै सगळा ई में है, पूरा ही बत्तीस लक्षण ।”

नवाब रो बेटी पै लाड घरणो, “चावै जो व्हो देस हेरू परदेस हेरू पण बूवना री जोड़ रो वर लावू ।”

ठावा आदमियां ने बुलाय बूवना री तसवीर दे, वांने हुकम दीवो, “देस जावो परदेस जावो । एक एक रजवाड़ी देखलो । बूवना री जोड़ रो वर हेरो । बूवना पूरी पदमणी है, वर ही पूरो छैल व्हेणो चावै । मन माफक वर नी मिलै जतरै थां पाछा अठै मत आवजो ।”

खरचो खातो देय विदा कीधा । देस देसान्तर फिरता फिरता थटाभखर जाय पूगा । वठा रा बादसा मृगतमायची री बेन रा बेटा जलाल ने देखनै राजी व्हेग्या । आखी दुनियां में फिर आया पण अस्यो जवान सुलखणो कठै ही नजर नी आयो । बूवना री जोड़ में जंचै तो यो ।

जलाल ने खानगी में लेजाय बूवना री तसवीर बताई । जलाल तो तसवीर देखतां ही लट्टू व्हेग्यो । मन में बैठगी । जलाल ने लाग्यो जाणै भगवान बूवना ने वीरे सारू होज घड़ी है । तसवीर लेय लीधी ।

भला मिनख ही राजी राजी नवाव कनें गया, “हुकम मुजब आपरे मन रे माफक वर तै कर आयां हां । जलाल ने भगवान जाणै बूबना वास्ते हीज सिरज्यो व्हे । आखी पिरथी पै म्हां फिर आया परण अस्यो जोधो जुवान म्हारी नजर में नीं आयो । गोडां गोडां तक तो हाथ पूगै, एक बिलांत लांबी गावड़, पूरो पांच हाथ डीगो, चालै तो धरती घूजै । मूँछां भूँवारा सूँ अड़ै । देख्यां भूख भागै । ससतर विद्या में परवीण । राजवी में जो सातूँ बसतुवां री परीक्षा व्हेणी चावै वां सगळां रो जाणकार । तरवारा रो पारखी, एक एक रा लोह री किसम् न्यारी न्यारी बताय दे । संगीत विद्या रो पूरो जाणकार, छत्तीसूँ राग रागणी रो समझण्यो, आपरे कनें टाळघोड़ा कळावत राखै । घोड़ां री जात रो पूरो ग्यान । रतनां रो पारखी, नवरतनां रो न्यारो न्यारो भेद अर मोल बताय दे । कविता रा मरम ने समझण्यो, कवियां ने लाख लाख री रीभां करै । चित्तर कळा रो प्रेमी । इत्तर रो घणो पारखी, आप खुद इत्तर री भाटी कढावै वीं इत्तर री खसबोई छानी हीज नीं रै । पांचसी पांवडा दूरां सूँ खबर पड़ जावै के जलाल आय रियो है । बैठणै रा माळिया ने भीमसेनी कपूर मिलाय केसर सूँ पोताय राख्यो है । म्हांने तो जलाल जस्यो वर कठै ही ओर दीख्यो नीं ।

काछ ब्रढा कर बरसणां, मन चंगा मुंह मिट्ट ।
रण सूरा जग बल्लभा, सो हम विरला दिट्ट ॥

“ये सगळा गुण जलाल में म्हांने दीख्या ।”

नवाव रो मन राजी व्हेग्यो । भला मिनखां जलाल री तसबीर काढ नवाव रे नजर कीधी । घणो राजी व्हीयो । बूबना कनें जलाल री तसबीर भेजी । बूबना तो मगन व्हेगी । वा मानगी वीने विधाता जलाल साहूँ हीज वणाई है । तसबीर ने पेटी में काठी कर मेल दीधी ।

नवाव हरख्यो लगो । काजी ने वीज वगत बुलाय थटाभखर रवाना कीधो, “बूबना रा सगपण रा नारेळ जलाल ने जाय भेलावो । बड़ी बेटी मूमना री सगाई लारै री लारै आछी जगा देख कर आवो ।”

काजी थटाभखर आयो । वादसा मृगतमायची ने जलाल रा सगपण री अरज कराई । मृगतमायची बूबना री तसबीर देखी तो वींरो मन हाथ वारै निकळग्यो ।

“काजीजी, बूबना रो नारेळ तो हमकूँ भेलावो ।”

काजी सोच में पड़्यो, या आछी व्ही । यो बूढो खांपो । मूँडा में दांत एक नीं, कवर में पग लटकाय राख्या, बूबना सूँ परणणो चावै । काजी सलाम कर अरज कीधी,

“आलीजापनां रा हकम सूं इनकारी नीं पण वूवना पूरी पदमणी है, जलाल सांव पूरा छैल है। यां री दोवां री जोड़ी बराबर री है। स्यांणां लोगां री राय सूं सारा लक्षण मिलाय यां रे नारेळ भेज्यो है।”

“हम कोण से छैल नहीं है?”

“हजूर तो घणा आछा है पण उमर कुछ ज्यादा व्हेवा सूं.....”

“नहीं, वूवना रे साथ हम सादी करेंगे।”

काजी हैरान व्हे कह्यो, “वड़ी बेत मूमना रे साथ आपरो ब्याव करदां, वूवनां रे लारै जलाल सांव रो।”

वादसा नीं मान्यो। काजी ने वठारा वजीरां घणो ऊंचो नीचो समभायो मोटो वादसा है आड़ी वगत फोज फांटा, हर तरै सूं थारे फायदो है। काजी ने लाळच दे देवाय राजी कर लीघो।

वूवना रो नारेळ वादसा ने भेलायो, मूमना रो जलाल ने भेलायो। सावा थिरप काजी चाल्यो।

जलाल ने घणो दुख व्हीयो पण मामा ने कांई कैवै। दूजां लारै कैवायो पण मान्यो नीं।

जान चढ़ी, जलाल वींद वण्यो। वादसा तो आपरा खांडा ने भेज्यो। एक हाथी पै वींद जलाल, दूजा हाथी पै वादसा रो खांडो। जान पूगी, हरख वधावणां व्हेवा लाग्या। काजी जाण्यो अवे तो कैवणों ही पड़ेला। छिपायां काम नीं चालै। नवाव ने कह्यो, “मूमना ने जलाल परणोला वूवना रो ब्याव वादसा लारै करणो तै व्हीयो है।”

नवाव ने घणी रीस आई, “नालायक गजब कर दीधी।” काजी ने जूता सूं ठोकायो। घर खोस लीघो, काळो मूंडो कर गधा पै चढ़ाय गाम बारै कढायो।

काजी कजिया चुकावतो, पड़ियो कजिया मांहि।

वूवना ने खबर लागी जाणै माथै वजर पड़्यो। माथो फोड़ लीघो। मन में निस्चै कीघो परणवा रो दसतूर यां रो मन व्हे जीं रे लारै करो म्हें तो जलाल ने पति धार लीघो, वो म्हारे सात सात भव रो भरतार, म्हूं वींरी स्त्री। दासी नेत्रवांधी ने कह्यो, “थूं जा जलाल साव ने कैव वूवना थारी है अर थारी हीज रैवैला। बांरो खांडो मांग लाजो पैलां बांरा खांडा रे साथै फेरा खाय लूं।”

वूवना तो जलाल रा खांडा ने मंगाय फेरा खाय लीघा ।

अवै जलाल चंवरी में आयो । नवाव घणां दुख सूं वादसा रा खांडा कने वूवना ने ऊभी कीघी । जलाल कने मूमना ने लाया । जलाल, वूवना ने चंवरी में आवती देखी जाणै पावासर री हंसणी आय री व्हे । धीरै धीरै पगल्या भरती वूवना यूं आयरी जाणै सिंगळ दीप री हथणी आय री । केळ री कांव री नाई वा भोला खाती आय री । वीं चीतालंकी वूवना ने देख जलाल माथो ठोक्यो “अहियो भाग अल्लाह” ।

परण घरै आया । वूवना घणी दुखी, मोटा वादसा री वेगम व्हेगी परण मांयलो जीव सोरो नीं । वूवना रे न्यारा मे'ल न्यारी ब्योढी, सब ठाठ वाठ परण सन कुछ व्हेतां थकां ही जाणै काई नीं । मन अमूझ्यां वूवना वैठी रै । वादसा रे आगै ही घणी वेगमां, रावळो भरयो । वूवना री वारी, वारा मीनां में एक दांण आई । वादसा आयो, वूवना चतराई सूं टाळ दीवो । वूवना रा मन में जलाल वस रियो । मिलवा रो ओसर नीं । मन मारचां, काळजो दवायां दिन काटै ।

जलो ही मन में घणो उदास रैवै, मूमना सूं वात करै, वतळावै परण जीव उब्बो उब्बो रैवे । मन में वो ही घणो दुखी, भाग ने दोस दे । वूवना रा भरोखा नीचै ही सिणगार चौकी, मोटा मोटा उमराव वठै चौकी पै बैठा रैवे, वातां करै चौपड़ां खेलै, सांझ पड़्यां आपरे घरां जावै । जलाल ही परभाते उदास वहीया वीं चौकी पै आय वैठै, मोको देख ऊपर री जाळी साम्हो भांके कठै ही वूवना रो भांको ही पड़ जावै । सांझ पड़्यां सगळा ही परा जावै जदी वो ही निसासा न्हांकतो, दूहा बोलतो, परो जावै, वूवना रा दीदार ही किसमत में नीं लिख्या ।

लोचन प्यासे दीद के, निरखें नित्त की नित्त ।

दरसरण ही पावै नहीं, मिलवै कहीं न मित्त ॥

वूवना रा एक भांका साह' जलाल तरसतो रै । एक दिन वूवना, नेत्रवांधी ने पूछयो “जलाल सा'व ने देख्या ही नीं, वै कदे ही अठीने आवै ही नीं है काई ?”

नेत्रवांधी बोली, “वै तो आखो दिन नीचै सिणगार चौकी पै रैवै, आपणां भरोखा साम्हो मूंडो कीवा बैठा रै, आवतां जावतां निसासा भरता दूहा कैवो करै । सगळा उमरावां सूं पै'लां आवै, सगळा सूं पाछै जावै ।”

वूवना रा काळजा पै जाणै करोत चालगी । नैणां में आंसू आयन्या । क्यूं नीं म्हूं जलाल नूं मिलूं । म्हारो पति है, मन अर वचन सूं अंगीकार करचोड़ी, करम सूं ही है, पै'लां ब्याव म्हें वींरा खांडा सूं कीवो । मृगतमायची सूं म्हारो लेखो देखो

ही काँई । यूँ पकड़ लाय घर में बैठाय देवा सूँ कोई पति पत्नी थोड़ा ही व्हे जावै । जलो म्हारो, म्हूँ जला री । म्हाने मिलवा सूँ रोकण्यो कुण ? नेत्रवांधी ने कह्यो, “थूँ जा जलाल सूँ मिल वाने अठै ला ।”

नेत्रवांधी नीचै उतरी, मोको देख जला ने पूछ्यो, “जलाल साँव, आप उदास उदास रैवो निसासा म्हान्को । अठै आवो जदी तो आगै देखो, जावा लागो जदी पाछै भांकता जावो । आपरा मन मे दुख काँई है ? चावो काँई हो ?”

जलाल बोल्हो, “काँई चावां अर काँई नीं चावां जो कुण सुराँ म्हारी । म्हान्को मन तो रात दिन सैरां में लाग्यो रै ।”

कीं चवां कीं न चवां, कवरण सुरांदा कथ ।

मनड़ो चावै रातदिन, सैरां हंदो सत्थ ॥

नेत्रवांधी धीरेक कह्यो, “आज रात रा थे वाग में आवजो, लेवा ने म्हें आवांला ।”

जलो भट आपरे मे'लां जाय सनान सपाड़ो कर पोसाक कीधी । इत्तर में तो यूँ गरक रैवतो ही हो और ही इत्तर लगायां । कद घड़ी रात पड़ै, एक एक पल वरस ज्यूँ लाग री । अंधारो पड़तां ही अकेलो चाल्यो, यूँ लाग रियो जांगै पग घरती पे नीं पड़ रिया, पाँखड़ा आय गिया व्हे । तनामनां नाम रो जलाल रो मित्तर जो हमेसा साथै रो साथै रै, वीं अर फूलमद खवास देख्यो, यूँ तो जलाल कदे ही अकेला कठै ही नीं जावै, आज राजी व्हेता, मुळकता अकेला कठै जाय रिया है, यांरा पग ठिकारो नीं पड़ रिया है । वूवना रो वैम आयो जदी तनामनां जावता जलाल ने कह्यो, “जावो जो चोखा पण सोच समझ पग दीजो । घर में हांण, जग में हांसी व्हे जसी जगां मत जावजो ।”

जलाल ने अँवली लागी, पाछो बोल्हो नी । वाग में जाय, चमेली री, जूही री गैरी भाड़्यां में छिप बैठ्यो ।

नेत्रवांधी चार दूसरी लुगायां ने ले फूल लावा रे मिस वाग में चाली । डोढ्यो वूवना रे डायजै आयोड़ो । आंख्यां रो आंधो पण हिया री आंख्यां खुली लगी । सूभतां सूँ चोगणी नीगै राखै । पग वाजतां ही डोढ्यो पूछ्यो, “कुण, नेत्रवांधी ?”

नेत्रवांधी हूँकारो भरयो ।

“अवार ईं वेळा कठै जाय री है ?”

“वादसा मे'लां पधारे जो सेज बिछावा ने फूल लेवा जाय री हूँ ।”

“ला, म्हारा हाय पै हाय मेलती जावो ।”

कोई मरद रावळा में परो नीं जावै ज्यू हाय लगाय डोड्यो पारख कर लेतो । पांचू ही चुगायां, डोड्या रा हाय पै हाय मेलती बाग में आई ।

कटपट मोटा छावड़ा में जलाल ने बैठाया, ऊपरे फूल न्हांक, माथे छावड़ो मेल ले चाली ।

पांचू ही जप्यां डोड्या रा हाय पै हाय मेल्या । डोड्यो बोल्हो “ठैरो, ईं छावड़ा में कोरा फूलां रो बाँझो नीं । फूलां रा बोझू सूं पग अस्या धम धम नीं वाजै । छावड़ो उतार, नांयने कींनि बैठाया राख्यो है ?”

नेत्रवांघी बोली, “आंख्यां तो फूटी है पण हियो ही फूट्यो है काई ?”

डोड्या ने आई रीस, “रांड, मारी जावेला । म्हने ही भूवो कर री है । उतार छावड़ो बता म्हने ।”

जलाल जांप्यो कान विगड्यो । आखिर वूवना रा पीयर रो है । लिहाज तो राखैला हीन । कट छावड़ा दारै निकळ बोल्हो, “सादास, पैरादार व्हे तो अस्यो । घारी हुस्पारी पै मन राजी व्हेयो । आज आज माफ करदो ।”

आंघो पैरावाळो बोल्हो, “जलाल सांव ये गैला अणूँता है । ये रस्ता छोड़ दो ।”

जलाल नाथो हिलाय धीरेक बोल्हो, “सिर दीघो वूवन सट्टे”

“ये मरोला अर म्हने मराबोला । अदखी तो घरीं ही लाग री है पण वूवना रे लारे आयोडो हूं । वूवना रो मुलायजो नीं टूटै । आज आज तो जावो पण आज पछै पण दीघो तो खैर नीं ।”

जलाल वूवना ने देखी, वूवना जला ने देख्यो । चुब नूलग्या, आपा में नीं रिया । सपना में देखता जो सागैसाग कनें ऊभा । वूवना ने लाग्यो जांणै तीन लोक री संपदा वीं रा कनें आयगी । जलाल जांप्यो मिनत जमारी सारयक व्हेयो, अब मरदां रो ही बोखो नीं ?

वूवना तो जला रे मेंदी ज्यूं रचणी, काजळ ज्यूं घुळणी । वूव में पाणी ज्यूं मिलणी । बांने खबर ही नीं कठीने ऊगै कठीने आये । तीन दिन व्हेग्या । नेत्रवांघी पूरी निगै राखै के कींनि पतो नीं लाग जावै पण कदे ही छिपायां छिपी है ये बातों ?

इश्क मुश्क छांसी, खुश्क, खैर खून मदपान ।

लाख जतन करो तो ही असी बातों नीं छिदै । दूनी वेगमां ने दैन पड़्यो । जला

री, गळती रात में खांसी सुण वां जाय वादसा ने कह्यो,

“जलो तो बूबना रा मे'लां में है ।”

वादसा नीं मान्यो । सोक्यां कह्यो, “आप अचाणचक रा पघार देखलो है के नीं ।”

वादसा ने रीस अणाय. सिखाय नै वेगमां भेज्यो । बूबना रा मे'लां में आय तो रियो परण मन में मृगतमायची रे पसतावो, “सांचे ही बूबना है जला रे लायक, म्हें परण खोटो काम कीघो ।”

वादसा ने आता देख नेत्रबांधी भागी । कूणा में फूलां रो ढेर हो जीं में भट जला ने छिपाय दोघो । ऊपरै घणां सारा फूल न्हांक दीघा ।

बूबना उठ वादसा सूं मुजरो कीघो ।

अवै वादसा वोलै तो कांई नीं । चारूंकानी चमक्योड़ा हिरण ज्यूं देखै । वठै तो कांई नीं, बूबना रो ढोल्यो अर कूणां में फूलां रो ढिगलो । जलाल फूलां रा ढिगला में दव्योड़ो घबरावै, सांस आगती आयरी जो सांस रे लारै फूल हाल रिया । या देख नेत्रबांधी जांणी जलो डरप रियो है जो हीमत देवावा ने बोली, “भंवरो कंवळ कळी में फंस तो गियो परण कायर कांप रियो है । अरे डरप मत, जीवतो रियो तो कंवळ वन रो आणंद लीजे, मर गियो तो ही कांई फिकर ! व्हाली जगां ही तो मरेला ।”

भमरा कळी लपेटियो, कायर कंपै कांह ।

जो जीत्यो तो जुग समो, मुवो तो मोटी ठांह ।।

दूहो सुणतां ही मृगतमायची पूछ्यो, “यो दूहो थें कीं ने सुणायो ?”

बूबना भट वात संभाळी, “हजरत, म्हारा कंवळ रा बीड़ में भंवरो आय बैठ्यो, रात ने कळी में बंद व्हेग्यो, जीं ने केय री है ।”

“जा, बीं ने छुड़ाय आ ।”

वादसा री संका मिटगी, कांई नीं देख्यो जो पाछो आपरे मे'लां चाल्यो, “म्हारो बेटो जलालियो अस्यो नीं, ये वेगमां, साळियां बीं ने मरावणो चावै ।”

जलाल बूबना रा मे'लां में हीज । घणां दिन व्हेग्या । तनांमनां मिस्तर, फूलमद खवास, गखडो ढाढी जांणै के जलो कठै है । घणां दिन व्हेग्या तो यां रा मन में संका, कठै हीं जलो मारियो गियो है । मूमना पुछावै जलाल सा'व कठै ?” ये बीने अठीली वठीली भूठी सांची कैय समभाय दे परण मन में घणां उदास । एक दिन

मांभल रात

वादसा तनांमनां ने पूछ्यो, “जलाल कठै है ? अतरा दिन व्हेग्या देख

वात जमाय पाछी अरज कीधी, “आप जस्या मामा है, जला ने कांई सोच । नादान ओस्था है मे’लां में खावै पीवै आणंद करै ।”

वादसा राजी ब्हीयो, “म्हारो बेटो जलालियो घरणो सोकीन है, वादसा रा सच्चा फरजन है ।”

घरणों ही इत्तर, चोवो, कपूर, केसर, कस्तूरी जला सारू वगसी ।

यूं करतां वारा मीना व्हेग्या ।

“सज्जण संग रहंतड़ा, वरस भयो इक मास”

खवर नीं पड़ी यां दिनां ने निकळतां, जलै वूबना सूं सीख मांगी । रेसम री डोर सूं भरोखा नीचै जलो उतरयो । जलो ज्यूं आवै ज्यूं सुगंध री घोर बंधती आय री । तनांमनां कह्यो, जलो जीवै, बीरा लगायोड़ा इत्तर री सुगंध है ।” सुगंध रे घोरे घोरे वे चाल्या । जलो आवतो दीख्यो, आंख्यां लाल व्हेय री है, लपेटा रा पेच अट-पटा बंध्या है, अमल में छक्यो लगो है । पग पाधरा नीं पड़ रिया है ।

ये हाल देख तनांमनां वोल्यो, “आक रो दांतण नीं करणो, सांप रो मांस नीं खावणो । जला, जठै जीव रो विणास व्हेतो व्हे बठी नै पग नीं देवणो ।”

अक्कां न दांतण कीजिये, सांपां न खाइये मांस ।

जला जेथ न जाइये, जेथ जीवड़ा विणास ॥

जला ने बीरी वात सुवाई नीं, सीख आछी नीं लागी । जलै जुवाव नीं दीघो, वोल्यो नीं ।

गखड़ै ढाढ़ी देख्यो, सीख ईं वगत में आछी थोड़ी लागै । अवार तो वूवना रो मोह रूम रूम में रम रियो है । जला ने सुवावतो दूहो वोल्यो,

“आकास में बेलड़ी है जीरे लाखीणां फळ लाग रिया है । जलाल, थारा सिवाय यां फळां ने चाखण्यो ही कुण ?”

अंवर लग्गी बेलड़ी, तिण फळ लग्गा लाल ।

तो विण किये ही न चक्खिया, हो गहाणी जलाल ॥

जलाल वोल्यो, “वाह, वाह, कांई बात कही है ।”

पूंगी पै काळो नाग भूमै ज्यू जलाल ई दूहा पै भूम गियो ।

जखड़ो दूजो दूहो बोल्हो,

सो मण तो केसर उडी, सो दस उडी गुलाल ।

बूवन हंदा महल में, रात्यू रम्यो जलाल ॥

जलाल आपरे गळा रो कांठलो खोल ढाढ़ी रे गळा में न्हांक दीधो ।

तनांमनां देख्यो, यो मामलो तो हाथां बारै जाय रियो है । समभावणो तो आपणो फरज है । चिड़तो थको बोल्हो, “जलालिया, गैलै गैलै चाल । अकास मे फूलड़ा लाग रिया है जो थारे हाथै किस तरै लागै ?”

चलियो जा जलालिया, सैरां हंदे सत्थ ।

अंबर लग्गे फूलड़ा, तो किम आवे हत्थ ॥

जलाल गावड़ मरोड़तै कह्यो, “भगवान देव जदी ऊंचा ही नीचा व्हे जावै । अण-व्हेणी, व्हेती व्हे जावै । वायरा सूं उड्या सेमर रा फूल री नाई अपणै आप घर में आय पड़ै ।”

तनांमनां जाल्यो, मानेगा नीं तो ईरा जीव ने खतरो है कदे ही मारघो जावैला । वी जोर देनै कह्यो, “कान खोलनै म्हारी बात सुणले । ग्रह दसा पूछनै रातड़िया रमवा पधार जो ।”

जला कन्नां देय कर, सुण अम्ह बत्तड़ियांह ।

डक्कण वातां बूभ के, रमजो रत्तड़ियांह ॥

फिस्तो ही जलो जुवाव दीधो “माथा पै कफन बांधनै फिरै ज्यां सूं देवता ही डरपै । अठैतो जीव हथेळी पै लीधां फिरा हां सोच कीरो है ?”

तनांमनां जाण्यो, “यो मानवा ने नीं । लाख कैवो चीकणा हांडा पै छांटो लागवा ने नीं ।”

जलो रोजीना रात ने बूवन। सूं मिलै । सट्ट करै पट्ट करै पण जावै । रंगभीनी बूवना ने नीं देखै जतरै जला ने जक नी, जोड़ी रा जलाल ने नी देखै जतरै बूवना ने जक नीं । सात सात पैरा लागै, डचोढी रे सात सात ताळा लागै, सोकड़ल्यां ताका भांका करै के जलाल ने पकड़ां । मोत साम्ही ऊभी हंसै पण जो धार ले वीं ने मोत रो कांई डर ? कुण रोक सक्यो है अस्या प्रेमी ने आज तांई ? जलो जावतो रुकै नीं, जावै अर जरूर जावै ।

मृगतमायची ने लोगां कह्यो के एक रात ये दो ही जराणें दूरा नीं रै ।

मृगतमायची बोल्यो, “दूरा नीं किस तरै रै, आज म्हारे साथै जला ने सिकार में ले जावूँला । देखां रात ने किस तरै आवै ?”

जला ने ले सिकार चाल्यो, रात पड़गी, आछो आंवा रो पेड़ देख, वीरे नींचै बिछायत कर बादसा सूतो, आपरे कनें जलाल ने सुवायो । आंवा री डाळ रे घोड़ा बांघ दीधा ।

चांदणी रात छिटक री, आंवा रा मोड़ री भीनी भीनी सुगंध आय री, मधरो मधरो पवन चाल रियो, चांदणी रात में तळाव रो ऊजळो पाणी अस्यो लाग रियो जाणें दूव रो कटोरो भरयो व्हे । मंभरात, भींगर बोल रिया, सियाळ्यां री, “हूकी हूकी” व्हेय री । कोचरी रैय रैय नै बोलती लगी माथा पै उडती निकळ जावै । भांय भांय रात कर ने ।

मृगतमायची ने नींद आयगी, सब साथ वाळा सोयग्या, जला री आंख्यां में नींद नीं, वीरो मन बूवना में “वा गुनलंजा म्हारी वाट देख री व्हेला । मिलवा रो वगत टळग्यो, वीं मानेतण रूसणों कर राख्यो व्हेला । डावरनैणी बूवना रा नैणां में आंसू भर रिया व्हेला, कर सोच री व्हेला । वा तनक मिजाजण नाराज व्हे री व्हेला, मन में ओळंवा देय री व्हेला । नाजकड़ी घबराय री व्हेला, बिछाणां पै पड़ी तड़फ री व्हेला काजळ रेखी बूवना रोय री व्हेला । वीं मीठा बोली ने भरोसो है म्हारा प्रेम पै जरूर वाट देख री व्हेला, नेत्रवांधी रे हाथ में रेतम डोर दे गोखड़ा में ऊभी कर राखी व्हेला ।”

फिलती जोड़ रा जला री आंख्यां आगै तसबीर सी मंडगी जाणें वा भाला देणी भाला दे दे वीं ने बुलाय री है ।

जला ने दूहो याद आयग्यो, पैदल तो पांच कोस दूरो व्हे नै आपणी सायबण सू जाय नीं मिलै । घोड़ा रो असवार दसकोस री दूरी पै न्यारो रात काढले तो बस जाण नावो कै तो लुगाई कुभारजा है कै मिनख नाजोगो है ।

पंच कोसां प्यादो रहे, दस कोसां असवार ।

कै तो नार कुभारजा, कै रांडुल्यो भरतार ॥

यो दूहो याद आवतां ही जलाल तो सूतो लगे उछळ नै ऊभो व्हेग्यो । चित्राम री फूतळी बूवना जसी तो मारणी ! म्हूं वीं पै पिराण निछरावळ करण्यो !! अतरा नजदीक रैतां थका रात न्यारी कटै ?

आंवा री डाळ रे वादसा रो अरवी घोड़ो बंध्यो हीज हो । घण हेताळू जलो तो भट चढ़्यो, राना नीचै घोड़ो व्हे पछे घर कस्यो दूरो ? घोड़ा री रास ने थोड़ी ऊंची लेतां ही परबत पार ।

यूं क्यूं मन में जांणजै, घोड़ां थी घर दूर ।

टुक ऊंचै रासां लिये, तो आवै परबत चूर ॥

अरवी घोड़ा री रास खैची, घोड़ो उड़्यो । जलाल रा इत्तर री लपट दूरां सूं आई, बूबना बोली, “नेत्रबांधी, छीको नीचै उतार, जलालो बिलालो आयग्यो ।”

छींका में बैठाय जला ने ऊपरै लीघो । बूबना ने लाग्यो अंधारा घर में उजाळो व्हेग्यो । जलो घड़ी दोय बातचीत कर पाछो घोड़ो दपटायो ।

घोड़ा रे मूंडे भाग आयग्या, फुरणा बोलवा लागग्या, पसीना सूं भगाबोळ व्हेग्यो । पाछो आय घोड़ा ने डाळी रे बांध दीघो, आप सागी जणां बादसा रे कनें सोयग्या । मृगतमायची जाग्यो आपरा घोड़ा ने संभाळै तो पसीना सूं तर, काछा में पसीनो टपक रियो, धूळा सूं भरियो लगे । मृगतमायची ने वैंम पड़्यो । पूछ्यो, “म्हारो घोड़ो अस्यो लागै जांणै चाल नै आयो व्हे ।”

जलो भट बोल्थो, “बादसा सलामत, म्हारा घोड़ा ने ही देखावो, यूं ही लाग रियो है । खुरीं कीषां बिनां परभाते घोड़ा यूं ही लागै । काले कस्या आपां घोड़ा ने थोड़ा दोड़ाया ? अरवी घोड़ो, अमीर जीव, घणां दिनां पछै ठांण सूं खुल्यो ।”

मृगतमायची ने वैंम तो पूरो व्हीयो पण मन ने समझाय लीघो । जलो कैवै जो ठीक है ।

खलक री हलक कुण पकडै ? जला बूबना री चरचा चालवा लागी । मृगतमायची ने कापरी गलती पै पछतावो ही घणां नै यांरा पै रीस ही घणी । जला ने अठा सूं दूरो करदू, या सोच जला ने बुलाय, गिरवरगढ़ री चढ़ाई रो बीड़ो भेलायो । हुकम दीघो,

“जोइयां रे साथै भगड़ो चाल रियो जो थां जांणै ही हो, मोटा मोटा उमराव भेज्या पण जोइया तावे नीं व्हीया, अठा सूं जावा बाळा कै तो मारचा गया कै भागनै पाछा आया । थां जावो गिरवरगढ़ ने तावे करो ।”

जलाल बीड़ो भेल्यो, फोज री तयारी कीघी । हथियार संभाळ्या । नाळां, घुड़नाळां, गजनाळां, रामचंगियां जुजरवा, तोपां लारै लीघी । घोड़ा रे पाखर घाली । जिरह

वस्तर पैर, टोप लगाय, जलो सिलहपोस व्हे बादसा सूं मुजरो कर कूंच कीधो ।
मोरत सजाय दो रस दूरा दीधा ।

बूबना नेत्रवांधी ने कह्यो, “जलाल सा’ब भारी मूंम पै जाय रिया है । पाछा कुण
जांणी कदी आवै । आपां चालां वारे डेरै, एक नजर तो देख आवां । जलाल कदे
ही दूरा नीं रैता, दस कोस व्हेता तो आय मिलता । आज घणां ही दो कोस दूरा है
पण जंग रा मैदान कूंच करचोड़ा पाछा किस तरै फिरै । नेत्रवांधी, हमेसा वे आय
आपां सूं मिलता, आज आपां चालां लसकरिया सूं मिल आवां ।”

छींका सूं नीची उतर बूबना नेत्रवांधी ने साथ ले चाली । नेत्रवांधी आगै जाय जला
ने खबर दीधी ।

“जला रे म्हें तो राज रा डैरा निरखण आई रे जलाल”

जलो तो आगुंद सूं उछळग्यो । बधाई में गळा री माळा उतार नेत्रवांधी ने देय
दीधी । बूबना रो अस्यो नेह देख जला री छाती भरगी, हीमत देख आंजस सूं
आख्यां चमकगी ।

दो घड़ी बातचीत कर बूबना सीख मांगी । पग आगै देतां पाछा पड़ै । अमरत पीत्रतां
ही कदे तृप्ति व्हे ? नीठ नीठ डेरा बारै नीकळी । गळगळी व्हे बोली,

सज्जन फळजो फूलजो, बड़ जिम विसनरजोह ।

मासे वरसे जो मिलो, तो इण ही रंग रहजोह ॥

जलाल भारी फोज ले गिरवरगढ़ पूग्यो, खबर लगाई गढ़ में सामान घणां, अन्न
भरचो, पाणी रो टोटो नीं, जोहिया चाळीस हजार भेळा व्हीयोड़ा । बारा वरस
घेरो लाग्यो रै तो वाने सोच नीं । जलाल फोज रो हमलो करै तो जोहियां रो गढ़
वांको, मोरचा अस्या जम्योड़ा के हमलो करवा बाळा पग एक आगी नीं दे सकै ।
जलाल तरकीब सूं काम लीधो । आपरा ठावा मिनख ने जोहियां कर्ने भेज्यो । वीं
जाय जोहियां ने कह्यो, “जलाल सा’ब थां सूं भगड़ो करणो चावै नी । बादसा भेज्यो
है, कांई करै आवणो पड़्यो । वठै नीं अठै बैठ्या हां । थां म्हारी कानी रो कांई
सोच करो मती ।”

जोहियां रा आदमी आयनै देख्यो तो जला रा डेरा में हमला री कोई तयारी नीं
दीखी । जोहियां ने ही भरोसो आयग्यो । बूबना री बात वां पे लां ही सुण राखी ही
और ही निस्चै व्हेग्यो कि जलाल ने वठा सूं टाळवा ने अठै भेज राख्यो है ।

जलाल तो जोहियां रे अठै आवणो जावणो वड़ायो। कैवतो रवै, “हुकम है जो पड़्या हां अठै।”

यूं करता करतां जेठ मीनो आयग्यो। असाढ़ आयो, धमकनै वरस्यो। जोहियां सोची, बाजरी वाणी चावै। यूं गढ़ मे छाना मानां बैठ्या काईं फायदो। हमलो तो व्हे नी रियो है। चार हजार घोड़ा आदमी तो गढ़ में रिया, बाकी रा खेतां में बाजरी वावा ने परा गया। जलाल जोहियां री पूरी खबर राखै।

वीं एक दिन अचाणक आपरी सारी फोज ते थटाभखर पाछा जावा रो हुकम दीधो, “बादसा रो हुकम आयग्यो है पाछा बुलाया है।”

कूच रो नगारो वजाय पांच कोस दूरा जाय डेरो दीधो। गढ़ रा जोहिया जाण्यां, घणां राजी व्हीया, गढ़ रा दरवाजा खोल दीधा, आप आप रे हल्ले लाग्या। जोहियां ने बिखरवा देय, जलो आपरी पूरी फोज ने सजाय एकदम रात ने गढ़ पै हमलो बोल दीधो, खटण जोहिया ने मार लीधो, गढ़ पै कब्जो कर लीधो। जलाल री आंण फिरगी। थटाभखर कासीद दोड़ायो। मृगतमायची घणों राजी व्हीयो, जला ने वठा रो पूरो जावतो कर फोज पाछी लावा रो हुकम भेज्यो।

दूसरी बेगमां मृगतमायची रा कान भरवा लागी, “जलो आवतां ही पे’लां वूबना कनें जावेला, आप सूं मुजरो करवाने पछै हाजर व्हेला, बीरे घरै पछै जावेला, वूबना सूं मिलवा ने पे’लां जावेला।”

मृगतमायची ने ही पूरी संका, जलाल वूबना सूं मिल नीं सकै ईं वास्ते तळाव में मे’ल हो जी मे वूबना ने भेज दीधी। मे’ल रे पूरा पैरा रो इन्तजाम कर दीधो।

वूबना मन में कह्यो, “कोई परबन्ध म्हने जलाल सूं मिलवा ने नीं रोक सके। यो तळाव रो पाणी अर ये पैरावाळा काई है जो लोह रा पींजरा में म्हने घाल दो, छुर्यां री वाड़ करदो, म्हारो माथो काटलो पण जला बिना म्हूं नी रैवूं।

कर लोह हंदा पींजरा, कर छुरियां दी वाड़।

जला बिन हूं ना रहूं, भावे गरदन मार ॥

तळाव री पाळ पै पैरावाळा बैठाय दीधा। वूबना पाणी रे बीचें मे’ल में रै।

जलो उमग्यो लगो मंजल चलयो आवै।

“चाल घोड़ा उतावळो” कैवतो, गला घाटा चीरतो, नदी दाळा पार करतो, परवतां ने उलांघतो, जलो वूबना सूं मिलवा ने आगतो, घोड़ो दपटायें आवै। वूबना पलकां रा पगमंडा बिछायां वाट देख री। जला ने लागै घोड़ा सूं गैलो क्यूं नीं कट रियो है, यो अतरो धीरै काई चाल रियो है। वूबना ने दीखै ये दिन अतरा लांवा क्यूं

व्हेय रिया है, सांभ क्यूं नीं पड़ै ।

जला ने गैला में खबर लागगी वूवना ने पाणी बीचै मे'लां में भेज दीधी है । पैरा रो पुरो परबन्ध कर राख्यो है । जलो कह्यो, म्हेने पैरा चौकी वूवना सूं मिलवा ने रोक देला ? ये पैरा कांई है, सांपां री वाड करदे सिघां ने आडा बैठाय दे, और तो और जमराज ने पैरा पै ऊभा करदे तो वूवना सूं मिल्यां विना नीं रैवू ।”

जलो घोड़ो दपटातो, दो घड़ी रात रा तळाव पै आयो देखै तो पैरा लाग रिया । जलो घोड़ा सूं उतर पैरावाळा कनें सूधो गियो ।

“हवलदारजी, दो घड़ी वूवना सूं मिल आवा री इजाजत दो ।”

“जलाल सा'व, माफ करो हुकम नीं ।”

जलो बोल्हो, “वूवना सूं मिल्या विना म्हुं नीं रैवू । चाहे जो व्हीजो । म्हुं म्हारो जीव पिराण वीं सारू अरपण कर दीधो । जावा दो तो दो घड़ी हंस वात कर लू नीं तो उठो, तरवार उठावो । मरग्यो तो ही अमर व्हे जावूला । करो फैसलो एक वात रो ।”

पैरावाळा देख्यो, जलाल रो हेत तो घरणो गाढो । वादसा वूवना ने जबर दस्ती परणी, परण्यां पछै एक रात ही नी दीधी । वूवना जलाल पै जीव दे, जलो वूवना पै पिराण दे । जलाल कैतो जायनै मिलेला कै पिराण दे देला । आपां अस्या गाढ़ा हेत वाळां रे बीचै पड़ पराछत क्यूं लां । जलो आखर वादसा रो भाणेज है, ईं री मां बैठी है । जलाल ने मारां तो साम्ही आपां पै आफत आय जावै तो कीने खबर । पैरा वाळा जलाल ने रोक्यो नीं जलो तो हो ज्यूं रो ज्यूं पाणी में कूद पड़्यो । मगर मच्छ पाणी में सरडाटा ले ज्यूं वूवना रा मे'लां साम्ही तिरचो ।

वूवना तो नैण बिछायां बैठी हीज ही, जला रा इत्तर री लपट वायरा रे लारे आई वूवना फड़फड़ाई, फोजां रो मांभी जलो आयो, वूवना जाणती जला ने, जलो अवेला अर जरूर आवेला । यो पाणी कांई है, वासदी रो तळाव भरचो व्हे तो वो नीं रुकै । नाव तयार कराय राखी, जला ने लावा लेजावा सारू । नेत्रवाधी ने कह्यो, “भट नाव खोल ” । नाव ले जला रे साम्ही चाली ।

तळाव मोटो, आधै आवतां आवतां जलो थाकग्यो, सांस भरग्यो, जांणी डूव्या । अतराक में तो नाव ले वूवना आयगी । हाथ पकड़ नाव में चढाय ले चाली ।

जला अर वूवना रो हेत दिन दिन ओर ही गाढो व्हेतो जावै । ज्यूं मिले ज्यूं बत्तो वढै । एक दूजा में अतरा रंग गिया के एक रंग व्हेग्या, एक जीव व्हेग्या । कोई तागत नीं जो वां ने मिलवा सूं रोक सकै ।

सोवयां ने खटे नीं. वादसा आगै चुगली करती रै । अठिने वठीने चरचा ही चालै ।

मृगतमायची घरों विचार में “जलो मरजावै तो पापो कटै ।”

एक दो तरकीवां कीधी परा भगवान ने राखणो जो जलो मरचो नीं । एक जरै एकांत में वादसा ने सल्ला दीधी, “जलाल ने मारवा रो उपाय म्हुं बतावूं । घरों सोरो । कीरे ही माथै दोस नीं आवै अपणै आप मर जावै । यां रे दोवां रे ही हेत घरों, एक विदा दूजो नीं रै । म्हुं बतावूं ज्यूं करो ।”

दूजै ही दिन मृगतमायची जला ने ले सूर री सिकार चाल्यो । वादसा तोत रच एक आदमी ने भेज्यो, वीं रोवतै लगै सहर में जाय खबर दीधी, सूर री सिकार करतां जलाल सा'ब मारचा गया । घायल सूर दांतली सूं चीर दीधा ।

सारा दरवार में रोवा कूटो मचग्यो । कफन री तयारी करवा लाग्या । बूवना सुण्यो, जलो मरग्यो । अणचींत्यो आकास सूं बजर पड़्यो । जलो मरग्यो नै बूवना जीवती रैवै ? जला बिना बूवना कठे ? “हाय जला” कैवतां बूवना रो पिराण उडग्यो । हरम में हाहाकार व्हेग्यो ।

आदमी दोड़्या, सिकार मे जाय वादसा ने कह्यो “वठे जलाल सा'ब रे फोट व्हेवा री खबर आई । खबर सुणतां ही वेगम सा'ब खत्म व्हेग्या ।” जलो कनें ऊभो, सुणी बूवना मरगी, “म्हारे मरवा री खबर सुणतां ही बूवना मरगी । यो प्रेम !”

जलो तडाछ खाय नीचै पड़्यो, “बूवना, थूं परी गी म्हु अठे काई करूं ?” ये अवखर निकळता निकळतां जला रो सांस निकळग्यो ।

दुनियां कह्यो प्रेमी व्हे तो अस्या व्हे । सांचा प्रेमी हा । दरसण करवा ने सहर भेल्लो व्हेग्यो । वाने भूंडा कैवा वाळा वारा भगत व्हेग्या ।

मृगतमायची अवै समझ्यो वारा प्रेम ने अर आपणी गलती ने । वादसा हुकम दीधो, “ये सांचा प्रेमी हा, यां ने एक साथै दफणावो ।”

बूवना अर जला ने एक कवर में दफणाया । वादसा फूल चढ़ाय वारी कवर पै गोडा टेक खुदा सूं माफी मांगी, “परवर दिगार, म्हे जलाल अर बूवना रे वीचै आय गुनाह कीधो, माफ कर ।”

शब्दार्थ

अक्का—आक

अगवाणी—स्वागत करवा ने साम्हा
जावणो ।

अड़वी तासा—एक तरै रो वाजो

अम्ह—म्हारी

अलिवंघ—एक डोरो जीने डाढी नीचे
सूं ले पागड़ी मायँ बांध दे जीसूं
पाग पडणे रो डर नीं रै ।

अहेड़े—सिकार

आड़े माळ—लम्बी चौड़ी जगां री
सीयाळू खेती जीं ने कूवा सूं सींच
नै पावा रो झंझट नीं व्हे । चोमासा
रा पाणी सूं ही धान नीपजै ।

ईसको—ईष्यां

एवड़ छेवड़—आसपास

ओड—एक जात जो माटी खोदवा रो
काम करे ।

अंवरों—कपड़ा

कडिंग धींग—नगरा रा डंका रो
बोल ।

कत्थ—वात

कसूं वो—गळी लगी अमल

कर वरसणां—दातार

कवण—कुण

कळळाया—विलाप

कळहळ—कोळाहळ

काळेर—काळो हिरण

कांकण डोरड़ा—व्याव रो मंगळ सूत्र ।

किम—किस तरै

केसवाळी—घोड़ां रा गावड़ परला
केस ।

केसूड़ा—टेसू रा फूल

कोरणी आयणी—खुदगी

खड़ो—चालो

खमणी—क्षमासील

गदगद पोठयां—मोरां पै लाद नै

गळडव्वे—कांधा पै पड़घोड़ो कमर पै
लटकतो चामड़ा रो पट्टा में तरवारां
घाल्योड़ी

गनीम—सत्रु

गुललजां—फूलां जसी फूटरी

गैदन्तो—हाथी सा दांत बाळो सूर

धूमटा—गुम्बज

घोड़ा ने हरिया बांध दीघा—घोड़ा
ने फागुण मीने घापमा हरिया जौ
चरावै, ठाणां सूं वारे नीं काढै,
खुराक बढावै आराम दे ।

घोड़ां रा पोड़—घोड़ां रे दोड़वारी
आवाज ।

घोड़यो—बखेड़ो !

चीतालंकी—चीता सी कमर वाली
 छेवरिया—सूर रा वच्चा
 जमीत—फोज
 जीण रो सिंघाड़ो—घोड़ा रा जीण रे
 दूंचको निकळयो व्हे जो ।
 जोतदान—चित्तरां रो संग्रह
 भोंक लागी भटकेह—भटकां री भड़ी
 लाग री ।
 टापर—सीयाळा, में, घोड़ा ने रात ने
 ओढावा रो कपड़ो ।
 डागळै—छात पै
 डांण—कर
 ढल्यां—गुडियां
 थोह—सूर रे रैवण री जगां
 दरीखाना—सभा
 धूंस्म—नंगारो जो घोड़ा पै कस्यो
 जावै ।
 धोरियो—रेत रो टीवो
 निसाण—झंडा
 नो दा'र वारा चीतरा—वीफरचोड़ा
 घणां नाराज व्हीयोड़ा
 नौकर्या—सिकार में हाको देवण री
 नौकरी वाला ।
 परवानो—आज्ञा पत्र
 पाखर मडी—घोड़ा पै जीण कस्या ।
 पाखर घोड़ा रे पैरवा रा लोह रा
 कवच ने कैवे ।
 पाखरिया—घोड़ा जां पै पाखर घली
 थकी व्हे ।
 पाळा—पैदल

पाळो—ठंड
 पोह फाट्यां—दिन उग्यां
 ववड़ाय—अलगाकर
 वत्तड़ियांह—वातां
 वांवटचो—वांह
 विड़द—जस गीत
 भालो—तरकस
 भूंई—भूमि
 भूयांय—भुजंग
 भोटपड़ी—जबरदस्त वार व्हेयरिया
 मनचंगा—सुद्ध मन
 मांगणी—जांचवा ने
 मूंम—रणयात्रा
 मू'हताजी—कामदार की एक पदवी
 मंगरी—पहाड़ी
 रत्तड़ियांह—रातां
 रावळा—जनाना
 रासवा—गधा
 रीठ—भोंक
 रुकां—तरवारां
 रोड्यां—टट्टड़ा
 लाख पसाव—एक मोटी इज्जत वालो
 पुरस्कार जी में लाख रुपया रो
 माल व्हे ।
 वागी—वाजी
 सरणायां—सहनाई
 सरभरा—खातरदारी
 सिरागार चौकी—गढ़ में बण्योडी
 मोटी चोकी जीं पै सभा जुड़ै, उच्छव
 बगैरा व्हे ।

सुणंदा—सुणै

सुभराज—भाट, नगारची वगैरा मुजरो
करे जीं ने सुभराज कैवे । सुभराज
में रोजा रा बाप दादां रो नाम
लेता लगा वंस रो बखांण करे ।

सोव्रण—सोनो

संपाड़ो—स्तान

हमैं—अवै

हूंकार री कलंगी—हूंकार नाम रो एक
पंछी व्हे । जीं री पाखां री कलंगी ।
वे पांख घणा कीमती व्हेता अर
मुसकिल सूं मिलता । राज रा
हुकम विना कोई या कलंगी पैर
नीं सकतो ।